

Lumingu Lwà Makùmì

Mwandamutekètè Lwà Danyèlè



Twasàkidila, wa manza tètè, Mwaneetu Neville. Mwoyi wènu awu, balunda bàanyi. Ndyèsè bwa kwikalakù baalùkile cyàkàbìdì mu tabernacle emu mu dinda emu, bwa kutùngunuka ne Diyiisha dinene edi ditùdì tuditàcisha bwa kuumvwija, *Lumingu Lwà Makùmì Mwandamutekètè Lwà Danyèlè* elu. Ne tudi ne disànkà dya kumòna mùdì bààbùngì menemene basangile mu ditùkù edi dya luuyà lukolè, kadi nansha nanku tudi tulòmba luse bwa mutùdì katùyikù ne cibambalu ciikàle ne myaba ya disòmba. Kumòna bantu bapàte patapata mushindu awu ne biimàne mu nyùngulukilu mwònsò, s'bidì byènza bibì be. Ne kanùyì bacyankàmè mùvwàbì bikèngela to, bidì byènza ne mbikolè bwa nwènu kuumvwà. Kadi netwènzè cyònsò citùdiku pèètù mwa kwenza aci bwa kuyabì lukàsà.

² Nenku—nenku, leelu, ndi ntèkemena ne nenwikalè, mèmè munèngèkù ndambu, nenùmfwilekù luse, bwalu edi ndìbà dya kupoopela musonso pa Diyiisha edi, dìbà mene dya kudìpooopela musonso. Tudi baditèèke mu bitùpà bisatu bwa twamònakù mwa kwikala batwishiiibwe bwa kuwùmvwà.

³ Mpindyewu, mu bushuwa bwa bwalu, di—disangisha dìdì òmwèka ne mèsù ndimanye ne òwò aa, anyi òwò Mayiisha aa, àdì àkwàciibwa pa mikàbà ya mèyi. Ne àdì àtùmiibwa pa buloba bujimà. Pàmwè ne ditùngà ne ditùngà dyònsò dìdì dipeta mikàbà ya mèyi eyi pa buloba bujimà. Nenku ndi muswe kwambila batèèleji bàà mikàbà ya mèyi bwalu ebu ne, mwaba wònsò wunùdì nusanganyiibwa, nì mmu citùpà kaayi cya buloba cinùdì nusanganyiibwa, kùdì mwa kwikala bìngà bintu mwómò emu binùdì bafwànyine kubènga kungiitaba pa malongesha àndì mèmè—mèmè mfla. Kadi ndi muswe kwamba, nwènu bàna beetu, ne pàmwàpa, wèwè mwa kucyùmvwija mu mushindu wùdì wèwè ucimòna awu, ncifwànyine kushiiilangana ne cìndì mèmè mufwànyine kwitabuujà. Kadi, mufwànyine kwikala ne disànkà dya kutèèleja cyùdì muswe kwamba aci.

⁴ Ne mmu meeji a ne ndi ntwàla Mayiisha aa, bifùmìne ku . . . Dìyi dya Nzambi, mu mwoyi wànyi. Mbwa diibaka dya Ekeleeziya, bwa Ekeleeziya mujimà, Ekeleeziya wa buloba bujimà; Ekeleeziya wa Kilisto, wa buloba bujimà. Ne ndi cya bushuwa ngiitabuujà ne tudi mu dituku dya ndekeelu. Ne didyènzeja dyanyì bwa kuumvwija cyòci eci, kadi ncìyi nteeta bwa kucyènza, kucisàka, bwa ciikalè mushindu kampànda anyì kansanga to. Kacya ncitukù mwanjì kwambula dipiila bwa ku dyànyì dimanya, dya kwenza nanku to.

⁵ Misangu yàbúngì bantu bàtu bùmvwila pa mikàbà ya méyi, kadi bamba ne: “Ee, mémè ndi mubènge aci. Yèyè kènà anu mumanye dilongesha dyèndè to, kí mmumanye Mifùndù to.” Ee, aci, cidi mwa kwikala cyònsò anu cilelèlà. Nwamònu anyi? Mémè ncyèna mufwànyine kwamba ne kí ncilelèlà to.

Kadi, bwànyì mémè, ndi—ndi nCìlonga, nciyikù ngangata méyi. . . Ntu mbala bidì bantu bakwabo bamba, ne ntu mbàanyisha. Cyònsò cidi ní nganyi ní nganyi yònsò wamba aci, mémè ndi ncyànyisha. Kadi díbà adi—díbà adi ndi nya naaci kùdi Nzambi, ne nshààla naaci too ne pàndì mwa kucyùmvwija, kubangila anu ku Genese too ne ku Bwàkabuulwibwà, ne pashiishe mmòna cyònsò ciswikakana mu Bible. Ne díbà adi ndi—ndi mmanya ne cidi mwaba kampànda pabwìpi ne kwikala cilelèlà. Nenku, mu bushuwa bwa bwalu, mwaba wùdi wèwè mubingè awu, ki mwaba umwèpelè wùndì mémè mupàtùke mu—mu njila. Ne pàmwàpa mwaba wùdi wèwè mupìile awu, anyi mubingè, ki wùndì mémè mupàtùke mu njila, eci anyi eci.

⁶ Pa nanku, tudi tunwànyisha nwènù bònsò bantu balenga bàdi mu batèeleji kaaba aka aba, mu dinda emu, ne nwènù bantu balenga bàdi batèeleja mikàbà ya méyi eyi abu. Nenku twètù. . . Byònsò bidì byenjiibwe, byònsò bidì bwa Bukalenge bwa Nzambi. Mémè ndi ne balunda bàabúngì bàà maalu malenga pa buloba bujimà, bàndì ngaanyisha bikolè bya menemene, ne ndi ngiitabuujà ne nèmpticishè Cyendeleele pàmwè naabò. Nenku kí mbifwànyinekù kwikala mu mwoyi wànyì bwa kuteeta bwa—bwa kuseeswisha bòbò bantu abu to, nansha bya munyi, kadi bwa kuteeta kwenza ne byònsò byènzekè mu mushindu wà ne ndikù mwa kubàmbulwisha.

⁷ Ndi ndyùmvwà mwàkadyùmvwà Solòmò pàakasambilàye, ne kwambayè ne, bàmpèèshè lungènyi bwa wàmònakù mwa kulombola cisàmbà cya Nzambi. Ki disambila dyànyì dya meeji matòoke ndyòdi adi.

⁸ Bakwàcishi bàdi nàanyì kaaba aka aba, mu nyùngulukilu mujimà, ndi mmòna Mwanèètù Mercier, ne—ne Mwanèètù Roy Borders, ne Mwanèètù Neville, ne Billy Paul, mwanàanyì wa balùme. Gene ùdi kaaba aka mwaba kampànda, ne bàna beetu, Teddy, ne bakwabo. Ndi ngaanyisha bantu bònsò bàdi bàlwa bwa kunkwàcishakù aba.

⁹ Ndi mvùluka kaaba aka anu abidi àdi panshi aa, Mwanèètù Leo, cì—cìkèènà—kumòna cìvwàye mupetè; cilòtòt, mwàkacibùkilàye, dilòlò kampànda ditwàkatwilanganà bwa musangu wà kumpàla; bìvwà ne yèyè wàkamòna lusongo lwa cipaapu cinènè cya musàkà, muulu mu mpepele. Ne mémè mvwa kuulu aku nyiisha, mwaba kampànda, ki kubàndayè bwa kumòna ne byònsò abi bìvwà cinyì. Nenku pààkabàndàye kumutuu menemene kwa lusongo elu, mòna’s, kwambayè ne, kule menemene mu bukènkè kampànda bwa mmwènekèlu wa

argent, anyi cyenzè bu mwaba wa cìbàtàbàtà, mvwa mwimane, nyiisha bantu. Nenku yèyè kukòka ntèmà yànyì, ne mémè kukènzakana e kutàngila kùdìye. Ki kwambayè ne: “Mmunyi mùdìku mukafikè aku? Mmunyi mùvwàyeku mùmvwàku mémè mufwànyine kafika aku?”

¹⁰ Mémè kwamba ne: “Leo, muntu nansha umwe kèna mwa kulwa apa to. Nzambi ngudi mwa kufikisha muntu apa. Mpindyewu, bùdi naabù kí mbwà kubànda kuneeku nansha. Bùdi naabu mbwà kutùluka ne kuya kajaadikila bantu panshi pààpa, paanyima pàà wèwè mumanè kucimòna ne, m’Bulelèlà, bwa ne Cyòcì aci m’Bulelèlà.” Leo kutùlukayè panshi, bwa kujaadikilayè bantu.

¹¹ Ciine aci ncyenzèke kùkaadi ntàntà bule kaayi, Mwanèètù Leo? Bidimu byàbùngì’s, kí mmwòmò anyi? Bidimu byàbùngì. Kacya anu piine apu, bwa ku dyànyì dimanya, yèyè ùdi ne lulamatu mu kwenza kwa cyòcì aci, ùjaadikila bantu ne mudimu wà bwambi ewu mmufùme kùdì Nzambi. Mpindyewu, nenku ncyèna—ncyèna muswè bwa wùfuminè kùndì mémè to. Wòwò wùfùmina kùndì, dìbà adi kí mwìmpèku to, bwalu kakwèna cintu cìmpè mu muntu to. Nwamònu anyi? Bikèngela wùfuminè kùdì Nzambi.

¹² Mpindyewu, pàndì nkènzakana... Makèlèlèla awu mu mapingaja, mvwa mulabùlàngàne ku cyanza ne mulunda wanyì, Mwanèètù West. Ncyèna anu mwanjì kumutwishila mèsù to, mu citanda emu; eyowa, nyewu ngààmònu mpindyewu, mu dinda emu. Ne nwnènu nudi bamanyè ntàntà udi abu bafùmina mu màshinyì, nkuumukila anu ku—ku Alabama kwàka, mu dyàlumingu, bwa kulwa kaaba aka, bùumukila ku Alabama kwònsò kwaka!

¹³ Mwanèètù Welch Evans, ndi mupange kumumòna mu dyàlumingu dishàale adi. Muntu wàmbi ne yèyè ùvwa kaaba aka leelu ewu. Bantu abu bàdi bèndesha màshinyì kuumukila ku Tifton, mu Géorgie, bwa kwikala kaaba aka. Ne mwanèètù wa balùme udi musòmbe apa ewu, beena dyèndè. Bùngibù’s! Mwanèètù Palmer wa ku Macon, mu Géorgie. Ne ndi mmòna, ngeela meeji, Mwanèètù wa bakàji Ungren ne bakwabo paanyima pààpa. Bònsò abu mbàà ku Memphis kwònsò kwàka, mu Tennessee. Mpindyewu, nudi nwela meeji ne... Ne bakwabo bàà ku mikwabo myaba. Ndi mufùme ku ditwilangana ne inábànzà kampànda kaaba aka wa ku, ku Caroline du Sud kwaka.

¹⁴ Mpindyewu, nudi nwela meeji ne bantu bàdì apa aba... Mvwa nkènzakana, mmòna bàà ku Chicago, ne bàà ku myaba mishìlèshìllàngàne, bèndesha màshinyì ntàntà wa nkàmà ne nkàmà ya kilomèètà, anu bwa kulwa kubwela mu disangisha. Pashìshe, pàdìbo bafika kaaba aka, mwaba wà kusòmba kawùyikù to. Kakùyikù cibambalu ciikàle ne bifidi bya citaleela;

citanda cikùlākàjì mwikàle luuyà lukolè, bwa kwimanamù, nudikùpula bisùuluulù. Bàngata mfrangà ya kutèeka naayi byākudyà ku mèèsà, bwa bânà baabo balela, bwa kulwa apa bwa kutèeleja Mukenji awu. Udi muswe kungambila ne... dyàmwàmwa dya musùlù ewu, mwaba kampànda, kakwènakù mwaba wàyàbo, dimwe dya ku matùkù aa anyi? Cya bushuwa, wùdikù. Aci's ki lulamatu's! Bantu abu mbafuci bàà byàdiikùmi. Kì ng'anu ne bàdi bàlwa to, bàdi bàlwa ne byàdiikùmi byabo ne milàmbù yabo, ne bàlwa naabi mu nzubu wa Mukalenge, bàteeta kwenza cìdì cijaalàme. Nzambi àbeneshèku mu mushindu mubanji ke cisàmbà cya lulamatu cya mushindu awu! Luse ne ngàsà wa Nzambi bìikalèku naabò.

¹⁵ Nyewu mmòna mulunda wanyì, Charlie Cox, ne aba bàdi bàfùmìne ku sud wa Kentucky kwàka. Ne myaba yònsò nàka, paùdì ukènzakana, udi umòna bantu bàdi bàfùmìne ku myaba mishìlèshìlàngàne.

¹⁶ Nsongàalùmè wa citende udi musòmbe pàapa wàwa, ncyèna mwa kumuvùluka dìnà dyèndè to. Ngàkatwilangana nendè mu Chicago. Kadi udi mufùmìne ku cilongelu kampànda cya Bible kule ne muneemu, mwaba kampànda, kì mmwòmò anyi? [Mwanèètù awu ùdì wàmba ne: "Springfield, Missouri."—Muf.] Springfield, mu Missouri; cilongelu cya Bible cya Assemblée de Dieu. Eyowa. Ee, mbilenga. Nudi numòna's, bàdi bàfùmìna anu myaba yònsò, mu kaèkèleeziya kakese menemene kàà kale emu.

¹⁷ Anji elàayi anu meeji, kùkaadi, bidimu bitwè ku makumi asatu kùngààkatèèkà dibwe dya mu ditumba mu dinda adi, mvwa mwimane mwaba wàwa mu mùsèèsù wa Septième Rue, ntàntà wa nzubu yibidi ne mwaba ewu. Ncìvwa nansha mwanjì kusèlangana to, ncìvwa anu nsongàalùmè wa citende. Kì mèmè kumòna cikèènà-kumòna cya bantu bapàte bafinàkàne munda emu bàfùmìne myaba yònsò. Ne mvwa ne disànkà dyàbùngì, mwimane mu cyambilu. Nenukù pòpò apu mpààkangambilàYe ne: "Kadi eci kì n'tabernacle webè to." Kì kunshikikayè mwinshì mwa maulu. Kadi nwènù biine's nudi bamanyè bikwabo bya bwalu abu bidì bifùnda pa dibeji dya Bible udi mu dibwe dya mu ditumba mwaba wàwa abi.

¹⁸ Ndi ne kusàkidila kwàbùngì bwenu nwènù aba. Ncyèna mwa... Aci, cìdì anu kakese cyanàànà, bwa—bwa kwamba anu ne: "Ee, ndi ne kusàkidila kwàbùngì bwenu nwènù." Kadi ndi nnùsambidila. Ndi nnwitabuuja. Ndi ngiitabuuja malabula enu a kùdì Nzambi. Ncyèna ngeela meeji ne muntu mulùme anyi mukàjì mmufwànyìne kwendesha màshinyì ntàntà wa nkàmà ne nkàmà ya kilòmèèta bwa kulwa kaaba aka, bwa kuleeja mushindu wà bilàmbà bìdiye muvwàle to. Ncyèna—ncyèna ngeela meeji ne mbafwànyìne kwenza nanku nansha. To. Kì mbafwànyìne kulwa kaaba aka anu bwa kubàmònabò to. Bàlwalwa kaaba aka bwalu bàdi mu ndòndò wabò ne meeji matòoke bwa lupàndù lwa misùukà yabo. Disambila dyànyi

didi ne: “Nzambi ànkwàcìshèku, ànkwàcìshèku bwa kwikalakù nansha ne cyàbìbidì cimwè cya meeji matòòke a mushindu awu, bwa kuteetakù kubàyiisha ne byònsò bidì mu mwoyi wànyì, ne kwikala mweyèmène kùdi Nzambi.”

¹⁹ Diyiisha, nudi numòna’s, mu dinda emu, ndizòla ku cibàsa eku. Cìdi anu bwa kwenza, bwa kuumvwija pàndì ngenda nya apu, bwa kuteetakù kwenza bwa nwamòna mwa kuumvwa bìndì nteeta kwamba abi.

²⁰ Nenu *Mbingu Makùmi Mwandamutekètè Yà Danyèlè* eyi yivwa ndilonga dinene, matùkù abidi a mundaamuunyà ne abidi a bufùku, pàmwè ne cyòci aci. Mvwa, ku ndekeelu wa lumingu eku, mvwa mufwàngane anu naabi, nteeta bwa kujandula ne mmèyi kaayi a kwamba bwa Bulelèlè. Bikèngela cipalakajiiwbè ne Bible mujimà. Nwamònu anyi? Kwèna anu mwa kuCyàngata to, anu kaaMufùndù kakese kàmwèpelè ne kwenza dyu—dyumvwa kampànda, ne pashìishe kwamba ne: “Ee, ncìdì cyòci eci cyàmba,” ne pashìishe kukùdimuka kadi kwamba ne: “Ee, kadi lwà apa nunku Cìdi—Cìdi cyàmba cikwabo cintu, cibèngangana ne eci” to. KaCyèna mwa kwenza nanku to. Bikèngela Cyàmbè cintu anu cimwecimwe aci dîbà dyònsò. Kabiyyi nanku to, kaa, aci, dîbà adi udi—udi mutùpàkàne. Nenu mushindu awu ngùntù mèmè muteetètètèe bwa kuCilongesha.

²¹ Byòbì biine, pa mikàbà ya mèyi, bu mùdibi ne bidì pa mikàbà ya mèyi. Kadyuwù kàà katàmbe bunene kàntù mpeta pa mikàbà ya mèyi, kàà kùdi bânà beetu bàà mu bitùpà bishiileshiiàngane bya buloba, nkàà kwitabuujà kwà ngàsà wa Nzambi, ùndì ndongesha mushindu wùndì ndongesha ewu, ne: “Tuvwa badyànjila kulongolola kumpàlà kwa dyulu ne buloba kutwàdijabi.”

²² Bânà beetu beena Mpenta, mu bushuwa bwa bwalu, ndi mumanye ne yenu mmwènenu nyà beena ne anu mikenji, nwamonu’s, ne ndi—ndi mumanye ne cidì cibindulakù ndambu yenu mmwènenu. Kadi udiku, wèwè bu mwanèètù mwena Kilisto, udikù mwa kucipèèsha anu ndambu mukùmbàne wa mushinga bwa kutwàku binù kumpàlà kwa Nzambi, ne Bible webè, ne kulòmba Nzambi bwa kuumvwijaci anyi? Udikù mwa kwenza nanku anyi? Udikù mwa kwangata mmwènenu wa bwena ne anu mikenji awu ne kuteetakù bwa kutwànganaja kuumukila ku Genese too ne ku Bwàkabuulwibwà anyi?

²³ Nenu: “Dimiinu dya nyòka,” s’ki cishebeyanganyi ncyòci aci; bantu bààbùngì kabèèna biitabuujà aci to. Kadi, bu wèwè anu mwa kubala mu Genese, Bible’s mmwambe ne nyòka ùvwa ne dimiinu. “Ne Nènteekè lukunà pankaci pàà dimiinu dya nyòka ne Dimiinu dya mukàji.” Pa nanku, nyòka’s ùvwa ne dimiinu. Nenu piikalàbi ne dimiinu dya nyòka òvwa dya nyuma, dîbà adi’s Yesu kàvwa muntu to, pa nanku Dimiinu dya mukàji’s òvwa dya nyuma. Bònsò babidi bàvwa ne mamiinu, ne

lukunà alu lùcìdikù. Nyòka ùvwa ne dimiinu. Nenku bu wêwè anu mwa kwangata Bible webè awu, kutwà binù ne kwikala ne kaneemu kàà menemene kumpàlà kwa Nzambi, ndi ngiitabuuja ne Nzambi neàkusokòlwèlèci.

²⁴ Kadi wêwè kùyi mucyũmvwè to, mèmè ndikù—ndikù, díbà kanà dyònsò, bwa kwenza ne mwànyì mwònsò bwa kukukwàcisha, ku mukàndà mumfùndila anyì ku—anyì ku muyiiki wà babidi wà pàà nkààyeetù, anyì cintu kanà cyònsò cìndìku mwa kwenza bwa kukukwàcisha aci. Mu bushuwa bwa bwalu, tudi bamanyè ne aci kî ncìdì cisùngila muntu to, anyì kî ncìdì cipìisha muntu to, kadi cidì citwàla anu Bukènkè cyanàànà pa cyena-bwalu citùdì twètù tuteeta ne bukolè bwònsò bwa kufikisha bantu ku dimòna eci. Nwamònu anyì? Cìdì anu citwàla anu Bukènkè cyanàànà.

²⁵ Mpindyewu, kùdì batèèleji bàdì bàmwènekà, ndi mwambe nenku mbwà mikàbà ya mèyì, nudi numòna's, ne mikàbà ya mèyì eyi yìyaaya pa buloba bujimà, myaba yònsò.

²⁶ Mpindyewu twìnyikààyi mitù bwa katanci kakese cyanàànà, kumpàlà kwa kusemena kùdì Mwena Díyì edi. Nenku mbanganyi mu batèèleji emu mu dinda emu bàdì mu lukèngelu, biikàle bàmba anu ne: “Mèmè ndi mu lukèngelu. Éyì Nzambi, ikàlàku naanyi luse”? Mukalenge ànùbènèshè. Ne kùdì aba bàatèèlejà mukàbà wà mèyì, pawàwùtèèlejà, Nzambi àkumbajèku dilòmbà dyebe.

²⁷ Taatù wetù wa mu Dyulu, twètù tudi cisàmbà cidì ne kusàkidila, kadi pèètù cisàmbà cidì kaciyi cikùmbànyine. Kadi nyewu tusemena ku Nkwasa Webè wa ngàsà mu dinda emu, bwalu tudi bapetè díyì ditùtùmina bwa kulwa. Yesu mmwambe ne: “Nùlombààyi Taatù cintu kanà cyònsò mu Dìna Dyànyì, Mèmè nèncyènzè.” Mpindyewu, tudi bamanyè ne aci ncilelèlà.

²⁸ Ne mwab'ewu mu batèèleji emu, ne pambèlu mu—mu ditùngà mwàyà mikàbà ya mèyì, nemwìkalè pàmwàpa makumi a binunu bya beena Kilisto balediibwe cyàkàbìdì bàatèèlejà cyòcì eci. Ne tudi bamanyè, Taatù, ne patùdì tulediibwa cyàkàbìdì, nyuma wetù ùdì ùlediibwa ku Dyulu. N'Nyuma wa Nzambi, Nyuma Mwìmpè, pambidi pèètù. Ne tudi bamanyè ne Nyuma Mwìmpè awu ùdì ne bukolè bwònsò ne ùdì mwa kwenza cintu kanà cyònsò citùdì tujinga bwa kwenjiibwaci. Nanku, Taatù wa mu Dyulu, tudi baswè kuKulòmba bwa kulekelelakù diitabuuja dyetu kùdì Nyuma awu, bwa Yèyè wàmónakù mwa kutùpetela mu dinda emu, ne bwa butùmbì bwa Bukalenge bwa Nzambi, malòmba ònsò ne majinga aa, bwa twamònakù mwa kwondopiibwa ku màsaamà ètù ne ntàtu yetu, bwa twamònakù mwa kusadila Nzambi wetù ne byònsò bìdì munda mwetu.

²⁹ Kàngulàku maci ètù a lumvu leelu ewu, ne pàndì ndyènzeja ne mwànyì mwònsò bwa kutwàla lukonko lunene elu apa, ne kulùtòokeshà mu meeji a bantu. Mpindyewu, nyewu ndi naaci

cifùnda kaaba aka, Mukalenge, pa dibеji apa, ne cizòla ku cibàsà eci eku, dizòla edi, kadi mèmè yònsò nciyi mukùmbàne mwa kucyùmvwijakù to. Mpindyewu tudi tuKusòka Wèwè, Mulongeshi munene Utu mufùndè Dìyi, Utu muDisonsòle, WàkaDifila kùdi mupròfetà Danyèlè awu. Ne tudi tulòmba bwa Wèwè kutùma disonsola mu dinda emu, mu matùkù a ndekeelu aa, mwàkambàYe ne Mukàndà wùvwa mwa kukàngiibwa too ne ku cikondo eci, bwa Wèwè kukàngula cyumvwilu cyetu. Nenku swàku bwa kwikalè diitabuuja dinefùke mu mwoyi wètù diikalàku mwa kwenza bwa Dìyi kukwàtadi ne Mwoyi, ne kutòlwesha micì ya bwakàne mu nsòmbelu yetu, yidiDi dijingila bwa kutòlwesha. Diitabuuja dyetu mu Nzambi, swàku bwa ditùpetèlè cyòci aci mu dinda emu. Bwalu tudi twindila ne kudipwekesha kwònsò mpindyewu, ne tudilàmbula Kùdi, mu Dìna dya Yesu Kilisto. Amen.

³⁰ Mpindyewu, tudi ne kusàkidila bwa mu dinda emu, bwa mpùngà wa mushinga munene ewu cyàkàbidi bwa kubuululakù mabeji aa a Dìyi dya Cyendelele dya Nzambi.

³¹ Mpindyewu, cìndi mudyàngàcile bwa kuteeta kuumvwija cyòci eci, mbwalu tudi tulonga Mukàndà wà Bwàkabuulwibwà, ne tudi tufùma ku dikenketa dya bikondo mwandamutekètè bya ekeleeziya. Ne, pashiishe, kundekeelu kwa nshapità mwi³ wa Mukàndà wà Bwàkabuulwibwà, Ekeleeziya ùdi ùmushiibwa pa buloba, ùbànda mu Butùmbi. Nenku ndi nteeta, ne mwoyi wànyi wònsò, bwa kufikisha eci kùdi bantu ne, bàdi bindile bwa cinyi kampànda kwenzekaci, cidìbo bamòne cifùnda mu Mukàndà wà Bwàkabuulwibwà, pààci kaciyi citàngila cikondo cya ekeleeziya to. Kadi tukàadi pabwìpi ne nshiikidilu kutàmba munùdi nwènu nwela meeji amu.

³² Kùkaadi ndambu wa malòòlò, Billy, wanyi. . . Anyi, mukàj'a mwanàanyi's wè, eyowa, kumbiikilayè, bufùku menemene, wàmba ne kùvwa muntu mulùme dyèndè Andy Herman, udi mwaneetu wa balùme mwànà wa tààtù-mukwabò, ùvwa mulààle, ùpùnga ne lufù mu lùpitaadi. Mèmè kuya bwa kamumòna. Bàkaavwa bamupèeshe bwanga bwa kumulàadika tulù. Mèmè. . . bwàbùngi be mu mushindu wà ne, ùkaavwa muyè mu tulù, ne mèmè nciyikù mwa kwakula nendè to. Pààkacyàbu mu dinda. . . Mèmè kulòmba Nzambi bwa kumulamakù ne mwoyi too ne pàmvwà mwa kwakula nendè. Andy ùtu muntu mwìmpè, kadi kàyì anu mwena Kilisto to. Kì ntààtù-mukwabò to; mmwànà wa tààtù-mukwabò, musèle mwaneetu wa bakàji mwànà wa taatù-mukàji.

Nenku pashiishe pààlu Taatù-mukàji Ade kungambilayè, mwimane mwaba awu, kwambayè ne: “Billy, bidimu byònsò makumi mwandamakùlù bya mwoyi wèndè ebi, kàtu musadilekù Nzambi to. Kadi,” mwàkambàyè, “kwènji ndambu wa mbingu yivwàye musòmbè mu nzubu. . .” Yèyè, bidimu

byònsò makumi mwandamukùlù abi, mu bushuwa bwa bwalu, kátu ùtàmba kwenza midimu ya byanza to. Kadi kwambayè . . .

Kumubiikilayè e kwamba ne: “Ade, udi mumanye mùdì bwalu anyi? Kilisto mmulwe mwab’ewu kumpàlà kwànyì eku, kwènji anu tusunsa tukese cyanàànà.”

Mukàji kumutàngilayè, kwambayè ne: “Andy, udi—udi . . . Ki cinyi aci?” Yèyè ne . . .

Mulùme ne: “To. Yèyè’s ùvwa mwimane anu kaaba aka kumpàlà kwànyì eku, kwamba Yè cintu kampànda.”

Mukàji ne: “CyàmbiYè ncinyi?”

“Dìbà dikaadi diyè kupìta mùdì wèwè wela meeji amu.”

³³ Mu ndambu wa mbingu kuumukila apu, mbingu yibidi anyi yisatu, kubwelayè mu kómâ ne kushààlayè mulààle mutekètè luseke mu lùpitaadi, ùpunga ne lufu. Mémè kwamba ne: “Taàtù-mukàji Ade, bundù bwenu bwa kubènga kumbiikila anyi kubiikilakù muntu kapànda, bwa kutèèkakù mwoyi wèndè mu ngiikàdilù mwìmpè bwa dìbà dyàfikìye edi.”

³⁴ Mémè kulòmba Mukalenge, pàakacyàbu mu dinda, pànkaavwà . . . Yèyè kàcìvwa mwa kwakula to, ki mémè kumwela anu nkonko cyanàànà. Mémè kwamba ne: “Udikù mwa kungumvwa anyi, Taàtù Andy?” Kadi ùvwa—ùvwa mwa kushikulakù mutù kakese ne kunyungisha mbàngà. Mémè kumusambidila, kumwambila bwa kutondayè mpekaatu yèndè kumpàlà kwa Nzambi. Mvwa muswe kumubàtiiza, ne Taatù-mukàji Ade kujingayè kubàtijiibwa.

³⁵ Mémè kupweka ne cibambalu cinène aci, bwa kumòna nsongàakàji kampànda wa citende utu musòmbèle ku mutumba eku, uvwabò bàkèba kutùma ku lùpitaadi lwa bapàle, kadi Mukalenge kumwenzela Yè cintu cinène, kwalukilayè kumbèlu.

Dìbà adi, mu njila ngenda nyakù, mémè kutwilangana ne mwanèètù wa bakàji kampànda wa bafìike, yèyè kwamba ne: “Kì ng’wèwè Mwanèètù Branham anyi?”

Mémè kwamba ne: “Mmémè.”

Yèyè ne: “Udi mumvùlùke anyi? S’mmémè Màndamù Drye.”

³⁶ Ki mémè ne: “Eyowa, ngeela meeji ne ndi mukumanye. Pete Drye ne bakwabo abu?” Mémè ne: “Eyowa, Ngàà—ngàakuvùluku,” Kutàpayè dísù mu cibambalu amu, nenku patwàkenzà . . . Mémè kudìkonka bwa cinyi wàkamba nanku. Kadi, mwaba awu, Taàtù Andy ùkaavwa mujuuke mu bulààlù, ne mushààle musòmbè mwaba awu, ùnyungisha byanza ne mabòko anu mùtù muntu mukwabo yònsò ewu, ùteeta bwa kupwekesha cintu aci, cilùmnyànà cya ku bulààlù aci panshì apu, bwa wàmòna mwa kupàtuka muntwamu ne kukèba kwa diya. Patùdì twakulangana apa nebàlwe bwa kubàtijiibwabò mu Dinà dya Mukalenge Yesu, yèyè ne mukàjèndè.

³⁷ Pa nanku, kadi cingãmbidi ciine aci, dîbà dikaadi diyè kupîta mutùdi twètù twela meeji. Ne ndi ngeela meeji ne *Mbingu Makùmì Mwandamutekètè Yà Danyèlè* eyi neyitùfikishè ku dyumvwa.

³⁸ Mpindyewu, ciibúngì cya bânà beetu beena Mpenta, múnkaavwà mwambe ku ntwàdijilu kwa mukàbà wà méyì ewu ne, bàdi bàbènga kwitaba Cyôci eci. Bôbò mbindile cintu kampànda cinène ne cya bukolè, bwa kwenzekaci. Kadi, bânà beetu wanyì, bu nwênù mwa kutèèleja ne ntèmà yònsò, kanùyì . . . ne nutèèleja, nenùjandulè ne cintu kampànda cinène ne cya bukolè aci, cikaadi cimanè kupîta. Yesu ùkaadi pabwîpi ne kupingana.

³⁹ Ekeleziya ùdi ùmuka mu nshapità mwi³ wa Bwàkabuulwibwà. Cintu nansha cìmwè muntwamu kî ncyambiibwe bwa nî ncinyì nî ncinyì to, kadi cintu cya ndekeelu cìvwa anu mmusanjeela wa ndekeelu wa cikondo. Pashìishe, tudi tutàngila bwalu bwa beena Yudà too ne ku dilwa dya cyàkàbidi pàmwè ne Mukàjì-musèla, mu nshapità wa 19. Kuumukila ku nshapità mwi⁶ too ne ku wa 19 byònsò mbya beena Yudà.

Mwaba awu ki wùndi muswe kuleeja mwaneetu udi apa ewu mu Bitampì ebi, Mwanèètù Wood, uvwa kale wàwa Ntemu wa Yehowah, yèyè ne dîkù dyendè dyònsò dijimà, mu dinda emu ne, “binunu lukàmà ne makumi anaayi ne binaayi” abi kabàvwa, kakùvwa dipentengana pankaci pàà bôbò abu ne bàà Bisàmbà bya bendè to. Bôbò abu mbeena Yudà. Nwamònu anyì? Ne kabèena Mubidi musokòmè wà Kilisto pa buloba leelu ewu nansha.

Mukàjì-musèla ki wôwò Mubidi musokòmè awu. Ku Nyuma Mwîmpè nkutùdi babàtùjìibwe mu Mubidi musokòmè awu.

⁴⁰ Mpindyewu, tudi bamanyè ne mu Mukàndà wà Danyèlè emu, mutùdi tubala emu, netùbalè anu cyàkàbidi bwalu n’Dîyì Dyèndè. Mu nshapità wa 9 wa Danyèlè, ku mvensà wa 24.

Mbingu makumi mwandamutekètè mmikòsela cisàmbà cyebe ne cimenga cyebe cya cijila, bwa kulekeesha dishipa dya mikenji, . . . bwa kujikija mpekaatu, ne bwa kwenza dipungisha bwa bubì, ne kubweja bwakànè bwa kashidi, ne kutwa citampì ku cikèènà-kumòna ne ku cipròfetà, ne kwela mwaba Mutàmbe cijila maanyi.

Mvensà wa 25: “Ne ki bwa cinyì manyà ne umvwa ne, kuumukila ku . . .” Mpindyewu, pa cyôci aci mpatùvwa twakwila, ne ki twètù kujikijilapù mu dilòlò dya dyàlumingu dishààle ne, “kwela mwaba Mutàmbe cijila maanyi.” Apa ki patùdi tubangila mu dinda emu, pa mvensà wa 25 ne: “Ne ki bwa cinyì . . .”

Ki bwa cinyì manyà ne umvwa ne, kuumukila ku dipàtuka dya diyì dituma bwa kwalujulula ne

bwa kwibakulula Yelusàlèrà (ki “cimenga cyebe cya cijila” aci, nwamònu’s) too ne...Maasiyà Mfumu awu nekwikalè mbingu mwandamutekète, ne mbingu makumi asambombo ne yibidi, ne mùsèsù newibakiibwè cyàkàbidi, ne bimanu, ne nansha mu bikondo bya ndululu.

Ne paanyima pàà mbingu makumi asambombo ne yibidi Maasiyà neùmushiibwè, kadi kabiyi bwèndè yèyè mwine to; ne bantu bàà cisàmbà cya mfumu wâlwa nebàbutulè cimenga ne mwaba wà cijila, ne ndekeelu waci neikalè ne dipaasalala dinene, ne too ne kundekeelu kwa mvità ayi cinyangu nciologolola.

“Ne...” Mpindyewu, vùlukàayi ne, ki ndekeelu wa mvità ayi nyèyè awu. Tudi naaci ku cibàsà cya difundila eku. “Ne,” mpindyewu tudi tubanga cintu kampànda cikwabo.

Nenku yèyè neàshindikè cipungidi ne bààbùngi bwa lumingu lumwe; kadi munkaci mwa lumingu yèyè neàlekeeshè mulàmbù wà mashi ne mulàmbù wà dyosha, ne bwa bwalu bwa ditàmba kutangalaka dya cinyangu yèyè neàciwijiè dibùtuka, mene too ne dikùmbana dya maalù ònsò, (mbwena kwamba ne, bònsò), ne cidi cikòsa aci necipongolodiibwè pa cidi cibùtùdiibwe,

⁴¹ Kaa, dileesòrà kaayi’s wè! Mwawa mwambile mukajàanyi ditùkù adi ne: “Ndi ndikonka bantu ní bàdi cya bushuwa bàyùmva’s.” Mpindyewu, ndi muswe bwa nwènu kubyùmva. Kanwikadi...Panwikalà, byòbi bikèngela bwa twètù kushààla apa ditùkù dijimà, twashààla anu mwine. Mpindyewu, twètù tudi—tudi—tudi baswe kubyùmva. Nwamònu anyi? Tudi—tudi baswe kumanya ne bidi Bulelèlè. Nenku, nwènu, nwikalakù anu mwa kubimòna’s wè! Ne mèmè nènkonkè, pàmwàpa...

⁴² Ne pashiishe, paanyimà, nènshiyè dizòla edi dikùdika apa, nenku nwènu nudi—nudi mwa kubizòla, paanyimà Lwàyi mu mapingaja emu, dîbà dyònsò dinùdi baswè kulwa adi, nenku nùzolaayi mazòla awu ne bikwabo. Nedinùkwàcishèku bwa kuumvwa. Ki bwa cinyi ndi muditèèke kaaba aku, mbwà nwamòna mwa kucyùmva.

⁴³ Mpindyewu, twanjàayi anu kwambululakù ndambu bwa twètù kupeta cishimikidi. Mpindyewu kùvwa...Danyèlè ùvwa muumvwe bwalu bwa cisàmbà cyèndè bumutondè, bwalu ùvwa mubalè mupròfeta Yelèmiyà, ne kuumvwayè ne Yelèmiyà ùvwa mwambe ne bàvwa mwa kusanganyiibwa mu bupika bidimu makumi mwandamutekète. Nenku dîbà adi, kumònayè dîbà adi ne bàkaavwa benzè bidimu makumi asambombo ne mwandamukùlù, ki kumanyayè ne cikondo cikaavwa pabwîpi. Pa nanku kutèekayè ku luseke mudimu wèndè wònsò, kupwekeshayè, mutùdi mwa kwamba, ridò ya midimu yèndè

ya bwàcyàbwilà. Kutàngijayè mpàla kùdi Nzambi, kuvwàlayè mufuku ne kudyèlayè butù, ne kuditwayè mu kujila kwa byàkudyà ne mu disambila, bwa kumònayè mwa kuumvwa ne civwa mwa kwikala díbà kaayi. Pashiishe tudi tusangana, mûngàcyàmbi kumpàla. . .

(Swàku ùcikùdimùnè, *lwàlwa* luseke, kakese cyanàànà?) Dikàpàkapà adi, didi ditàmba kufila lupeepèle be. Cidi cimpàcisha díyi. Pashiishe. . . (Twasàkidila, mwaneetu.)

⁴⁴ Mpindyewu, bwa twètù kujandula, Danyèlè, ùvwa muswe kupeta malubà aa bwa cisàmbà cyèndè. Ne mèmè ndi ngeela meeji ne, pìikalàbi ne Danyèlè, mu kubala kwa baprófetà bàvwà bamudyànjàdile, wàkapeta dyumvwa dya mushindu ewu, dya ne ùkaavwa pabwìpì ne ndekeelu, ne wàkakèba Nzambi, bwa kujandula ne ndekeelu ùkaavwa pabwìpì pàà bishi, díbà adi mèmè's ndi ngeela meeji ne tudi tubingishiibwa, pa kumòna ne twètù tukaàdi ku ndekeelu wa njila mpindyewu, katùyi tuvwàla mufuku ne tudyèla butù to, kadi twimansha maalu a pa buloba, ne diditácisha dyetu dya mu nsòmbelu wa bwàcyàbwilà, ne kukèbangana ne Nzambi, bwa kujandula ne nditùkù kaayi dya cidimu ditùdi tusanganyiiibwa, bwalu tudi tumòna ne tudi ku ndekeelu, ne bwa Ekeleeziya kwenzayè kujila kwa byàkudyà ne kusambila ne kudilongolòla. Ki bwa cinyi ndi mudyènzèje bwa kudyàngacila mèmè mwine. . . Nciyi mumanye mwa kuumvwija byòbì ebi to, bwalu ntu anu mubìcingùlùke díbà dyònsò, ngamba ne: “Mbingu makumi mwandamutekètè ya Danyèlè ayi,” bwalu ncivwa mwa kuyùm vwa to. Nenku ki bwa cinyi ndi mudyàngàcileyi mèmè mwine mpindyewu, bwa kuteeta bwa kuyùm vwa. Ne ndi ngiitabuuja ne, ku dikwàcisha dya Mukalenge, ndi mwa kucyèna ku ngàsà Wendè, bwa kucifikishakù mwaba wà ne, nùleeja mushindu wutùkaadi pabwìpì ne Dilwa dya Mukalenge.

⁴⁵ Mpindyewu, Danyèlè ùkaavwa yèyè anu mu bidimu bibidi cyanàànà. Pashiishe tudi tusangana, ne, pàvwàye ùsanganyiiibwa mu disambila, Mwanjelo, Ngabùdyèlè, wàkamupàtukila; ne kààkamuumvwija anu díbà dívwa cisàmbà cyèndè ne cya kuumuka mu bupika to, kadi, kabidi, ne byònsò bivwa bikòsela cisàmbà cyèndè, byònsò bicivwà bishààle bwa cisàmbà cyèndè abi. Wàkamba ne: “Kùcidi kushààle mbingu makumi mwandamutekètè bwa beena Yudà.”

⁴⁶ Pashiishe, tudi tusangana ne, Yèyè ùvwa ne twipàcilà tusambombo. Ne kàmwè kaa ku twòtò atu, kàvwa mbwa kulekeesha dishipa dya mikenji; ne—ne kujikija bwalu bwa mpekaatu; kwenza dipungisha bwa bubì; kutwàla bwakànè bwa kashidi; kutwà citampì ku cikèènà-kumòna ne ku ciprófetà; ne kwela mwaba Mutàmbe cijila maanyi.

⁴⁷ Nenku tudi bangàte, mu dyàlumingu dishààle mu dinda amu, Danyèlè mu ngiikàdilù wendè muntwamu, ùsambila. Mu dilòòlò

dya dyàlumingu dishààle edi, tudi bafile Mifùndu, bwa bantu bààmòna mwa kuyibala pàvwàbo mwa kwalukila mu mààbò. Nuvwa bakayìbalè anyì? Yìvwa minùsànkìshe anyì? Bilenga be!

⁴⁸ Mpindyewu, twipàcìlà tusambombo. Ne tudi tusangana ne, mu kiipàcìlà kiisambombo aka, “bwa kwela mwaba Mutàmbe cijila maanyì,” tudi tusangana ne “Mutàmbe cijila” awu ùvwa misangu yònsò ùleeja anu Ekeleeziya, Tabernacle awu. Ne cintu cya ndekeelu civwà ne cya kwenjibwa, civwa nkwela mwaba Mutàmbe cijila awu maanyì, awu n’Tabernacle wa mu Bukalenge bwa bidimu cinunu mwàsòmbelàYe mu Bukalenge bwa bidimu cinunu amu, mutwàsòmbelà twètù.

⁴⁹ Mpindyewu, leelu, mpindyewu tukàadi twenda tuseemena ku ne: “Mbingu makumi mwandamutekète ncinyì?” Ne eci citùpà ncyà mushinga mutàmbe bunene, mbingu makumi mwandamutekète eyi.

⁵⁰ Mpindyewu, tudi bamanyè ne Mifùndù kayèèna mwa kushima nansha. Yìdi ne cya kwikala Bulelèlè. Ne piikalàbi ne Mwanjelo Ngabùdyèlè wàkalwa kwambila Danyèlè ne kùvwa kushààle anu mbingu makumi mwandamutekète bwa beena Yudà. . . Mpindyewu, twètù tudi bafwànyìne kwangata aci bu matùkù asambombo. . . anyì lumingu lwà matùkù mwandamutekète. Kadi, mu cipròfetà citu misangu yònsò cifidìibwe anu mu nsùmwinù.

⁵¹ Ne pa nanku, kakwèna mpatà to ne munda mwa bikondo byònsò, mùvwa bantu nkàmà misangu nkàmà, bamanyi bàà mabàla, bantu bapilùke, bateetètètèete bwa kuumvwija civwà mbingu makumi mwandamutekète eyi. Ne mémè nkàadikù mbalèbàle mèyì àbò àbùngì a dyela dya nsèke pa byòbi abi. Kadi ndi ne kwanyisha kwàbùngì kùdì Mukalenge Smith, wa mu ekeleeziya wa ba-Adventistes, bwa mmwènenu yèndè. Ndi ne kwanyisha kwàbùngì kùdì Docteur Larkin, bwa mmwènenu yèndè. Ndi ne kwanyisha kùdì bamanyi banene bònsò bàà mabàla aba, bwa mmwènenu yabo pa bwalu ebu. Ne mu kubala kwa bìdìbo bambe, bìdì bìntòòkeshila mémè maalu bikolè, bwa mémè kupetakù myaba yìdì yìmwèka ne nyà cya bushuwa. Kadi bwa kupeta mmwènenu yìmvwà—yìmvwà mémè ngeela meejì ne mvwa muswèku kuumvwija, ndi mukèbùlùle mu mukànda wà cibungu, wà “cikondo,” bwa kujandula civwà mwaku “cikondo” wùmvwija,

⁵² Kadi tudi tusangana mwab’ewu, tudi ne “cikondo, cikondo, ne citùpà cya cikondo.” *Cikondo* mbwena kwamba cinyì? *Lumingu* ncinyì? Mpindyewu, kùkaadi bidimu binunu bisatu, nkàmà yinaayi ne makumi asatu, kacya anu cyòci eci cyènzeka, kacya anu Nzambi wàbanga kukwàta mudimu ne beena Yudà; kùkaadi bidimu byàbùngì, byàbùngì menemene. Danyèlè ùvwa nkumpalà kwa Kilisto, ne cikondo aci civwa mmu cidimu cya 538 kumpalà kwa Kilisto, cidimu cya 538 kumpalà kwa

Kilisto, pàakambàye cyôci eci bwa “cikondo, cikondo, ne citùpà cya cikondo” apu. Nenku, mbingu makumi mwandamutekète, tàngilàayi nùmonè kùdi mbingu makumi mwandamutekète mifwànyine kamufikisha. Mòna’s, yèyè ùcivwa anu mu Baabùlònà, mu mbingu makumi mwandamutekète amu, kadi pààbì Nzambi’s ùvwa mumwambìle ne ki cikondo cyònsò civwà cikòsela cisàmbà aci.

⁵³ Mpindyewu, ekeleeziya wanyì kaaba aka mmumanyè ne mu bidimu byònsò ebi ntu misangu yònsò anu munwàmbìlambìle ne: “Wèwè muswe kumanya ditùkù dya lumingu, tàngilà ku kabalamatùkù. Kadi wèwè muswe kumanya cikondo citùdi ne mwoyi, tàngilà beena Yudà abu.” Ki ntankù umwèpelè uidikù. Nzambi kàtukù mukòsèle bàà Bisàmbà bya bendè bikondo bibala to—to; kakùvwakù cipòòlò kampàndà cya cikondo to. Nenku ki mwaba awu wùndì mèmè ngeela meeji ne bafùndì banene mbapeté cibwejàkàjì, ne bàvwa bàteeta kwangata cyôci eci bu cya beena Yudà ne bàà Bisàmbà bya bendè, bwalu Yèyè wàkamba ne: “Cisàmbà cyebe.” Kadi uvwaYè wàkula nendè awu n’Danyèlè, kì ng’Ekeleeziya to; cisàmbà cya Danyèlè, beena Yudà. Bu Yèyè wàkula ne Ekeleeziya, kwèna mwa kuya ne aci mwaba nansha wumwe to; wèwè’s udi—wèwè’s udi usanganyiibwa paanyima pale, nansha mene kumpàlà kwa dilwa dya Kilisto. Civwa cifwànyine kupàtuka pambèlu pàà mbingu ya cipròfètà ya mushindu kanà wònsò mùvwà uswa kucitèèka amu. Cikaadi cimanè kupita. Kadi Yèyè ùvwa wàkula ne beena Yudà, ki bwa cinyi beena Yudà bàdi ntankù wa Nzambi.

⁵⁴ Nudi bavùlùke kaaba aka, anu abidi àdì panshì aa ne, pàvwà Mwanèètù Arganbright, wa mu Californie, cindondà cya mfumu wa Kasùmbò kàà Buloba bujimà kàà Beena Kantuku-byanza bàà Evanjeeliyo mu Kaabujimà, mulwè kwànyì kumbèlu muntwàdile mukàbà wà—wà mèyi; kì mmukàbà wà mèyi to, kadi mmukàbà wà bindidimbì, wùvwàbò. . . wà *Tusunsa Tùsàtù Kumpàlà Kwà Mundankùlù*. Wùvwa mukwàciibwe pa dikèbulula dya mu maalu a mamanya. Pàngàmònu beena Yudà abu bàalukila, bàalukila mu Yelusàlèmà, mèmè kulwa ku tabernacle eku, kwamba ne: “Ndi ndyùmvwa anu bu mukùdimùnùne cyàkàbìdì mucimà.” Bààbúngì bàà kunùdì mbavùlùke cyôci aci. Mèmè kwamba ne: “Pa kumòna beena Yudà bàba bàalukila’s wè!”

Mu Maatàayi nshapità wa 24, Yesu mmwambe ne: “Panùdì numòna mucì wa mfigi wèla ntòngà.” Nudi bamanye cya dindila, nwamònu’s, beena Yudà munkaci mwa kwalukila!

⁵⁵ Mpindyewu, ndi ne mèyi kampànda a dyela naawu nsèka mafùnda kaaba aka. Ndi muswe kuditwamù. Mpindyewu, mpindyewu, nèn—nèngàngatè dībà dyàbúngì, bwa nwamònakù peenu mwa kubifùnda. Mpindyewu, byònsò ebi bìdi byènzeka, ebi. . . Mpindyewu tudi. . . Mu cikondo citùdì mpindyewu eci. byònsò ebi bìdi byènzekela. . . Mbeena Yudà; kì nciàngile

Ekeleeziya to, nansha kakese. Byònsò kuumukila ku Bwàkabuulwibwà nshapità mwi3, too ne ku wa 19, kabyènakù ne dipetangana nansha òmòwè ne Ekeleeziya to. Kwèna mwa kwenza ne bìmwenekè bijaalàme to. Kacyèna anumù to.

⁵⁶ Mpindyewu ndi muswe kuumvwija mùndi mupetè cyòci eci. Mpindyewu, ku cibàsà cya difùndila, bààbùngì bàà kunùdi nebàmonè ne ndi muzòle, bikondo bishiilàngàne ntàntà, mùdìbi bikabwela mu ntàntà wa bikondo, bwa kwenjiibwabì mu mushindu wa bantu bònsò kuumvwabò. Nudi mwa... Kanwèna mwa kubìmwèna lwà paanyima pààpa to, ngeela meeji, mbabifunde ne tuumàleeta tutàmbe bukese. Bwalu mmfùndilu wa Becky. Mwva ngeela meeji. . .Nenku, dizòla adi, mwva ne dibì ditàmbe dyòdi adi. Kadi, Becky ngudi muzòle dyòdi adi, dya cimfwànyì cya cilòòtà cya Nebùkàndànèèsà. Ne ndi ngeela meeji ne nciatàmbe kufwànangana ne nsongàakàjì's, Becky, kacyi bu muntu mulùme to. Kadi, nansha nanku, necì—neci filè anu bulubà, citùdi naaci bwalu.

⁵⁷ Mpindyewu, twètù babalè mu Bible ne kùdi mbingu makumi mwandamutekète mikòsela cisàmbà, mpindyewu, aci... kacyènakù ne dipetangana ne Ekeleeziya to. Mbingu makumi mwandamutekète kayènakù yitàngila Ekeleeziya to. Nwènù bamòne kaaba aka, ku dizòla eku, ndi mutèèke cikondo cya ekeleeziya pankaci pàà mbingu makumi mwandamutekète ayi.

⁵⁸ Tudi naadi kaaba aka. Mwanètù kampànda wa mu Géorgie nguvwa mutùzòlèledi kaaba aka, patùvwà tulonga bikondo bya ekeleeziya apu. Nenku tudi cya bushuwa batwishibwe ne tudi mwa kuumvwa cidi cyòci eci cyùmvwija. Mwaba mutòoke mu ekeleeziya ewu, mbwena kwamba ne civwa cyònsò cya cipostòlò. Ne pashiishe mu cikondo ciibidi cya ekeleeziya, bàvwa ne dilongesha dya beena Nikàlàwù, anyi, bàvwa ne byenzi bya beena Nikàlàwù's wè; kacivwa cyanji kuvwijiibwa dilongesha to. Cikondo ciisàtù cya ekeleeziya, kulwaci dilongesha. Nenku mu cikondo ciinâyì cya ekeleeziya, kulwaci bulongolodi, ki kwikalaci buupaapà bwa cyena Loomò. Kadi mu cikondo ciinâyì cya—cya ekeleeziya, ki civwà bikondo bya mîdimà.

Nudi numòna's, mîdimà yidi pònsò apu ayi yidi yileeya cyena Nikàlàwù, anyi cyena Loomò. Citùpà citòoke aci cidi cileeya Nyuma Mwîmpè, Ekeleeziya. Nenku, pàakabangàci mu cikondo cya Pòlò Munsantu, Ekeleeziya mujimà wa cipostòlò ùvwa mùle tètè ne Nyuma Mwîmpè. Pashiishe bantu bàà cipidi citumbùke bàakabanga kulwamù. Pashiishe ki ndekeelu wa byònsò kudyènzabò cimùkù ne kucyènzabò ekeleeziya mupyamùpyà. Ne anu beena kaèkèleeziyà kakese aku mbàvwàbo bòòsha, ne bàbààsa mabwe, ne babèlelela nyama ya ntambwe, ne bikwabo byònsò.

⁵⁹ Mu Dilongolola ki Luther kupàtukayè, ne bukênkè bukolèku ndambù, nudi numòna's. Mu matùkù a Wesley, kutwàlayè bukênkè bukwabo bukolè ndambù. Kadi mu cikondo cya ekeleeziya cya ndekeelu eci, cikondo cya ekeleeziya cya beena Nikàlàwù, ki cikondo citùdì . . . Kí ncyà beena Nikàlàwù to, kadi Laòdikiyà, ki cikondo citùdì ne mwoyi eci. Nudi numòna's, kamwèna Bukênkè bupitèpìte búngì to.

⁶⁰ Muntu kampànda, pàakamònàye dizòlà dyàci kuulu kwàka, kwambayè ne: “Bundù bwebe, Mwanèètù Branham! Ditùkù dinene dya dikenkesha dya bukênkè edi!”

Mêmè kwamba ne: “Nëndifwànyikijilè ne, pàasenguludiiwbàci, aci kacỳèna nansha cìcileeya mu cyòci to, paùdi wangata bàà myoyi mikezùke menemene, balediibwe cyàkàbìdi ku Nyuma.” Vùlukàayi ne, eci ki cikondo cya ekeleeziya cimwèpeli cìvwà Kilisto mwela pambèlu pàa Ekeleeziya Wendè Sungasunga, ku byònsò. Tudi ne ditonda dinene, kadi: “Tudi ne citùdì naaci anyi's?” ki citùdì twètù twamba ncyòci aci. Kilisto ùdi cya bushuwa mu ekeleeziya anyi? S'neikalè wa banyàabanya menemene.

⁶¹ Mpindyewu, mpindyewu twanjì kwambaayi mu cikòsò mbingu makumi mwandamutekètè ya Danyèlè ayi. Mpindyewu ndi mufwànyinekù kwambulula cyàkàbìdi kaaba aka; bambi bàà Evanjeeliyo, nwènù babènge kwitaba eci, bìdi anu bìmpè. Mmyabanya mu bipungu bisatu, mutùdì tusangana mu Danyèlè 9. Bipungu bisatu. Cya kumpàla, cipungu cya mbingu mwandamutekètè; pashiishe makumi abidi misangu yisatu ne yibidi, mbwena kwamba ne makumi asambombo ne yibidi; ne pashiishe cipungu cya lumingu lumwe. Mmyabanya mu bipungu bisatu bishiilàngàne.

⁶² Mpindyewu, ndi muyàbànye ku cibàsà cya difùndila eku. Cipungu cya kumpàla; cipungu ciibìdi; ne ku dyànyi dyumvwa, ku Evanjeeliyo, ku Nyuma Mwímpè, ne, ku cikondo cya nshiikidilu, Nzambi ùdi ùpingana cyàkàbìdi kùdì beena Yudà.

⁶³ Mpindyewu, tudi bamanyìne ku Evanjeeliyo yònsò, yidì Pòlò mulongèshe, ne bakwabo, ne, Nzambi neàpinganè cyàkàbìdi kùdì beena Yudà. Ee, dìbà adi, piikalàbi ne Yèyè neàpinganè cyàkàbìdi kùdì beena Yudà, mmunyi mutùdì mwa kucyàngata kucyàluja ku cikondo cya Danyèlè? Bikèngela tucyàngatè bwa cikondo cya ndekeelu eci. Piine apu mpaanyima pàa Ekeleeziya wa bàà Bisàmbà bya bendè mumane kuya, bwalu Yèyè ùdi ùtàngila bwalu bwa Izaleela bu ditùnga, twètù bu muntu-nkààyà.

⁶⁴ Mpindyewu, ndi ne ndambu wa mifùndù kaaba aka yindì muswe kunùbadila patùdì twenda tuya apa. Mpindyewu:

*...dipàtuka dya díyì ditùma dya kwibakulula
Yelusàlèma . . .*

Aci, cìvwa mmu matùkù 14 a ngondo mwisátù. Yònsò wa kunùdì yèyè muswe kufùnda aci, mu cyena Ebelu neúsanganè bàcìbìikila ne *N-i-s-a-n*, *Nisan*, mbwena kwamba ne “ngondo mwisátù.” Díyì adi dyàkatùmiibwa mu matùkù 14 a ngondo mwisátù, cidimu cya 445 kumpala kwa Kilisto, díyì kupàtukadì bwa kwibaka, kwibakulula ntempèlù. Nudi nucyùm vwa, bu munùkaadi babalè Mifùndù. Too ne pààkajikijibwàye, byàkangata bidimu makumi anaayi ne citeema bwa kujikija ntempèlù ne cimenga, bwa kubìbakulula. Ne mùdì Bible mwambe kaaba aka, Danyèlè ngudi wakula, anyì Mwanjelo wàmabila Danyèlè, ne:

... bimanu, ne bìvwa mwa kwibakiibwa *mu bikondo*
bya ndululu.

Ne bààbúngì bàà kutùdì mbavùlùke ne, pààkiibakiibwàbi, bàvwa ne kakàsù ku cyanza ne mwelè wà mvita ku cikwabo cyanza, bwa kwikala kupongwela mwena lukunà. “Ne bìvwa mwa kwibakiibwa mu bikondo bya ndululu.”

⁶⁵ Pa nanku, apa mpàndì mpetela cyòcì aci, mpeta matùkù àànyì awu. Mpindyewu, tudi ne tubala-matùkù tubidi, tusatu tushìilàngàne. Patùdì twalukila ku kabala-matùkù kàà kale kàà maalù a mabùlùnga, ne tudi tusangana ne, mu kabala-matùkù kàà Julien mùdì matùkù nkàmà yisatu, ne makumi asambombo ne ataanu ne cyàbìnaayi cimwè cya ditùkù mu cidimu. Bàdì baàbadila pa dipità dya Saadi ne mitooto mishìilèshìilàngàne, ne bikwabo. Ki pàdìbo baàbadila apu. Mpindyewu tudi tusangana, mu kabala-matùkù kàà cyena Loomò mutùdì ne mwoyi mpindyewu emu, matùkù nkàmà yisatu ne makumi asambombo ne ataanu, ku kabala-matùkù aku. Kadi mu kabala-matùkù kàà beena Kilisto, anyì kàà cipròfetà, tudi tusangana ne mùdì matùkù anu nkàmà yisatu ne makumi asambombo cyanàànà mu cidimu. Mpindyewu, nudi bafwànyine kudikonka ne mmunyì mùdì cibwejàkàjì eci cilwè.

⁶⁶ Mpindyewu, eci ncìndì mwa kwamba anu bu ne mèmè mwine ngudi wakula. Ndi ngeela meeji ne kale wàwa kumpalà kwa kabùtù kàà mvula ya Noà, kale mu matùkù a Yobò, ne bikwabo, bàvwa bàlama dìbà ku mitooto. Nenku tudi tuumvwa bàmba, anyì kale kumpalà kwa cikondo aci ne, buloba bìvwa bwimàne bululàme. Ne pashìishe mu mpekaatu wàkenza muntu awu, ki ditònkodiibwa dya buloba, bwàkasendama ne mvula ayi yàkalwa, ki bwa cinyi tukàadi ne mabwe manene a mashìka, ne bikwabo, nenku lusongo lwònsò ne ntàku wa buloba mbyùle ne mabwe a mashìka. Aci tudi bamanyè. Nenku buloba kì mbusòmbe bululàme to. Mbusòmbe busendàme. Aci ncyàkabùnyùkushà, e kubuumusha mu mwaba wàbù dìbà adi, wùvwàbo bàtàngidila ngondo ne mitooto awu. Anyì—anyì, kì mbafwànyine kabidi kulama dìbà ku byòbì abi to, bwalu bùkaadi buyè luseke, bushààke busendàme. Ki bwa cinyi, kì mbufwànyine kupetangana ne mitooto ayi pa dìbà dimwedimwe

adi to, bwalu mbu—mbupampàlàmuke ku mitooto ayi. Nudi bumvwè anyi? Ngeela meeji ne ki cidi bwalu ncyòci aci.

⁶⁷ Mbushààle bulààdile paanyima mu mushindu awu. Nenu aci cidi anu cileeja ne eci cidi anu cipungu cya cikondo. Kanwènaayikù mwa kumòna anyi? Nzambi kàtu ne bintu bipampàlàmuke nansha. Udi ùbilekela anu byènda mushindu awu bwa cikondo cikese cyanàànà. Ne ndi cya bushuwa ngiitabuuja ne cintu aci ncyàkenzekà.

Nenu ku matùkù a ndekeelu eku nkwbàbuulwilà Nzambi Ekeleeziya minsokòntù eyi. Kàtu mucyènzè kumpàla nansha. Ne cidiYe kàyì mucyènzèle, mbwà kulama Ekeleeziya mwikàle mutàbàle ne ùsambila dībà dyònsò, kàyì mumanyè dībà divwàci mwa kulwa to. Kadi nudi bavùluke ne, mu Danyèlè 12, Yèyè mmwambe ne: “Bàdi ne lungènyi nebùmvwè ku ndekeelu, mu ditùkù dya ndekeelu edi.” Nwamònu anyi? Cyàkamupèèbwa.

⁶⁸ Nyuma wa lungènyi ùdi ùlwa mu Ekeleeziya, bwa kumanyisha Ekeleeziya, ku dibuulula dya Nyuma Mwímpè, ùbweja Ekeleeziya ne ùbuulula ne nditùkù kaayi ditùdi ne mwoyi. Bya mwomumwe anu mwàkalwà Ngabùdyèlè kùdi—kùdi Danyèlè amu, Nyuma Mwímpè ùdi ùlwa kùdi Ekeleeziya mu matùkù a ndekeelu, bwa kubuulula bintu binène, bya ndòndò, bisokòme ebi. Nuumvù mpindyewu anyi?

⁶⁹ Mpindyewu, aci's ncifwànyine kutònkola cidimu cya maalu a mabùlunga anyi cidimu cya Julien, kabala-matùkù aku, nwamònu's, cidimu cya ba-Franc-maçons, bwalu buloba mbusendàme. Aci, twètù bònsò tudi bacimanyine ku dilonga dya mu tulaasa. Nenu mbupampàlàmuke, ki bwa cinyi yòyi, mitooto ayi, kì mmifwànyine kujaalamangana ne buloba dībà dimwèdimwè adi to. Ki bwa cinyi, kabala-matùkù kàà cyena Loomò nkabi, kòkò pààkù, bwalu kwèna mwa kululamija matùkù to. Kùdi anu bintu byàbùngi bìndi mufwànyine kwamba mwab'ewu mene. Bwa apu tudi tujandula, ku bufùki bwòbù bwine ne, bùdi bùtulongesha ne kùdi matùkù anu makumi asatu bulubulu mu cidimu.

⁷⁰ Mpindyewu, twàngatàayi Bwàkabuulwibwà mutwikalà ne cya kuya kaaba aka mu matùkù a bapròfètà babidi abu. Bible mmwambe ne: “Bàakamba cipròfètà munda mwa matùkù cinunu ne nkàma yibidi ne makumi asambombo.” Mpindyewu, paùdi wangata kabala-matùkù kàà maalu a mabùlunga, ncyà bushuwa ne ncifwànyine kupangila anu menemene bwa kwikala bidimu bisatu ne cyàbibidi cimwe. Ne paùdi wangata kabala-matùkù kàà cyena Loomò katùdi naaku leelu ewu aka, ncifwànyine kucipangila kule ne kule. Kadi paùdi wangata kabala-matùkù kàà cipròfètà, mùdi menemene anu matùkù cinunu ne nkàmà yibidi ne makumi asambombo, pa kubala matùkù makumi asatu ku ngondo. Nwamònu anyi?

⁷¹ Tudi ne matùkù makumi asatu mu yimwè ngondo, makumi asatu ne dimwè mu udi ulonda, makumi abidi ne mwandamukùlù mu mikwabo. Nwamonu's, tudi bônso mu cibwejàkàjì. Kadi Nzambi kàtu ùya naabi mànkònya, wàbànda wàpweka, wàtwa kumpàla wàtwa paanyima to. Údi Yèyè ùcilenga anu mushindu wumwewumwe awu. Eyowa's, mukalenge. Mushindu anu wumwewumwe awu menemene, matùkù makumi asatu mu ngondo; kabiya bya makumi asatu ne dimwè, pashiishe makumi asatu, cintu kampànda cikwabo to. Nwamonu anyi? Kadi byònsò abi mbìvwà byenza mu cibùcilu cinènè cya Nzambi, bwa kulama Ekeleeziya mwikàle mutàbàle ne ùsambila, mudìlongòlòle, biikàle ne bivwàlù byenu bisukula mu Mashì a Mwànà wa mukooko. Kadi, kaa, mu matùkù a ndekeelu aa, Yèyè mmulayè! Uh-huh. Mpindyewu tudi bamòne mwaba wutùdi ne mwoyi. Mpindyewu, vùlukààyi, kiipàcilà, kiipàcilà kamwèpelè, nkàà kwenza cyòci eci.

⁷² Mpindyewu, bu kwikàle mwandamutekète... Tàngilààyi, kùdi anu matùkù makumi anaayi ne citeema bulubulu... bidimu makumi anaayi ne citeema's wè, eyowa, mu kikondo cya diibaka dya ntempèlù aci. Mwandamutekète awu, mbingu mwandamutekète ya cipròfetà, mbingu mwandamutekète, bwalu kùdi mbingu mwandamutekète mikòsela ntempèlù, bwa kwibakulula ntempèlù. Ne wàkiibakiibwa anu mu bidimu makumi anaayi ne citeema bulubulu. Mpindyewu tudi ne dyumvwija dya kikondo aci cya mbingu, bwalu pìikalàbi ne Bible ngudi mwambe, Mwanjelo ngudi mwambe, mbyangàte mbingu mwandamutekète too ne ku diibaka dya ntempèlù. Nenku cìvwa anu bidimu makumi anaayi ne citeema bulubulu bwa kwibaka ntempèlù, kuumukila—kuumukila ku matùkù 14 a ngondo mwisàtù too ne ku 5—538 kumpàlà kwa Kilisto. Too ne pààkalwà ntempèlù kwalujuludiibwa cyàkàbidi, ne ku dyalujuludiibwa dya misèèsù, bidimu makumi anaayi ne citeema bulubulu. Pa nanku, citùdi tupeta ncinyi? Citùdi tupeta ncinyi? Bwalu, pìikalàbi ne mbingu mwandamutekète bìdi byènza bidimu makumi anaayi ne citeema, dìbà adi lumingu lùmwe's lùdi bidimu mwandamutekète. Ne mwandamutekète kuvudija ku mwandamutekète bìdi byènza makumi anaayi ne citeema. S'ncyòci menemene. S'ki bwalu mbwòbù abu.

⁷³ Pa nanku mpindyewu kakùcyèna kabidi bya difwikakaja pa bwalu abu to. Twàmányì mpindyewu ne lumingu ne lumingu lùvwa luumvwija bidimu mwandamutekète. Nwacyùmvù anyi? Tùcyàmbààyi bònso pàmwè. "Lumingu lùmwe mmwomùmwe ne bidimu mwandamutekète." Bwa mpindyewu kaayi tudi bamanyè ne twacyùmvù. Lumingu lùmwe mmwomùmwe ne bidimu mwandamutekète.

⁷⁴ Ki twètù *aba*, kaaba aka mene, lumingu lwà kumpàla. Bidimu makumi anaayi ne citeema bwa diibakulula dya ntempèlù. Mpindyewu, mushoonyi wà ku lusongo ewu

wùdi wùleeja ditùngà dya beena Yudà pàdiwu wùkòsolola apa. Eci cidi anu cikondo cyanààna. Ne pàdiwu wùpweka kaaba aka, wùdi wùpweka wùpàtuka mu ditùngà dya beena Yudà, wùkabwela mu cikondo cya bàà Bisàmbà bya bendè. Pashiishe wùdi wùbànda cyàkàbìdì wùkabàkula Izaleela, ne wùtùngunuka.

⁷⁵ Mpindyewu, bàà Bisàmbà bya bendè kabàtu babàkòsèle cikondo to. Mbambe anu ne: “Cikondo cya bàà Bisàmbà bya bendè.” Kadi tudi tusangana ne, nansha Yesu mwine kààkabàkòsela cikondo kampànda to. Bwalu tudi tusangana kaaba aka, mu Luukà 21.24, Yèyè mmwambe ne: “Nebàdyatakajè ku makàsà bimanu bya Yelusàlèmà too ne pààlwà bàà Bisàmbà bya bendè. . .” Imànaayi nteelè aci. Ndi ncitèèla ku mwoyi’s. Imànaayi ncibalè, bwalu neciikalè pa mukàbà wà mèyi apa, nenku tudi baswe kwikala batwishiiibwe ne tudi bacyùmvwè bìmpè. Eyo, nwènù baswe kubuululakù pàmwè naanyi mu mwaba awu, mu Luukà Munsantu 21.24. Ndi mulongè cyòci eci bitòòke tòò, ne mwànyi mwònsò.

Ne nebàponè ku lusongo lwà mwelè wà mvità, ne nebàye naabò. . .

BàdiYe wàmba aba mbanganyi? Beena Yudà. Aci cìvwa ndibùtudiibwa dya ntempèlù, mu cidimu cya 70 cya bikondo byetu ebi.

. . .ne bòbò nebàye naabò mu bupika mu matùnga ònsò, . . .

Mpindyewu vùlukàayi ne, kì ng’anu mu Baabùlònà nkààyaamù to, kì ng’anu mu Loomò nkààyaamù to, kadi mu “matùnga ònsò.” Ki mùdì beena Yudà bàsanganyiibwa leelu ewu, “matùnga ònsò.”

. . .ne Yelusàlèmà neàdyatakajiibwè ku makàsà kùdì bàà Bisàmbà bya bendè, too ne pìikalà cikondo cya bàà Bisàmbà bya bendè cyùle.

⁷⁶ Nenku, ki cikondo cikòsa aci, kadi muntu nansha umwe kì mmumanyè ne neciikalè dìbà kaayi to. Nwamùnu anyi? Mbwalu busokoka, nwamònu’s, cikondo cya bàà Bisàmbà bya bendè aci. Kadi, beena Yudà. . .Nenku, katwèna mwa kumanyina cikondo pa bìdì bitàngilà Ekeleeziya to, nansha Yèyè mutwè cimpingà anyi nansha Yèyè mutùngùnùke, anyi ní ncinyi cidiYe wènza. Kwèna mwa kumanyina ku aci to. Kadi, tàngilàayi beena Yudà, ki kabala-matùkù kàà cikondo. Nudi nucimòna anyi? Nzambi ùtu cya bushuwa mubàkòsèle ditùkù, dìbà, ne cikondo menemene, kadi Yèyè kàtukù mubikòsèle bàà Bisàmbà bya bendè to. M’Mukòsèle beena Yudà, pa nanku tùtangilàayi beena Yudà, dìbà adi netùmonè mwaba wutùdi.

⁷⁷ Mpindyewu, mpindyewu, mbingu mwandamutekètè yìvwa mbidimu makumi anaayi ne citeema. Twacyùmùvù mpindyewu bitòòke tòò ne, lumingu lùmfwè alu lùdì–lumingu lùmfwè

lùdi bidimu mwandamutekète; lumingu lùmwè, bidimu mwandamutekète.

⁷⁸ Mpindyewu mbatwãmbile ne: “Kuumukila ku dipàtuka dya díyì ditùma...” Mpindyewu, ki mwaba wùdì lutàtù lùlwa ngwôwò ewu. Mpindyewu mbatwãmbile ne:

...kuumukila ku dipàtuka dya díyì ditùma bwa kwibakulula cimenga too ne ku Maasiyà (ne Maasiyà awu ùvwa n’Kilisto, mu bushuwa bwa bwalu) nekwikalè mbingu mwandamutekète, ne mbingu makumi asambombo ne yibidi; (byènza mbingu makumi asambombo ne citeema)...

Nwamònu anyi? Eyo. Ne mwandamutekète kuvudija ku makumi asambombo ne citeema bidi byènza bidimu nkàmà yinaayi ne makumi mwandamukùlù ne bisatu. Mpindyewu, nudi nucifùnda anyi? Nwènù baswe bwa ncyãmbùlùlè kabidi, nêngìikalè ne disanka bwa kucyènza.

⁷⁹ Mpindyewu mbatwãmbile ne: “Kuumukila ku dipàtuka dya díyì ditùma bwa kwibakulula cimenga, too ne ku Maasiyà, nekwikalè mwandamutekète,” (mwandamutekète, ayi nyà kumpàla—ya kumpàla, apa mene) “mbingu mwandamutekète, ne makumi abidi misangu yisatu ne yibidi,” byènza ne, makumi asambombo ne yibidi kusangisha ne mwandamutekète mmwomùmwè ne makumi asambombo ne citeema, mbingu makumi asambombo ne citeema. Mwandamutekète kuvudija ku makumi asambombo ne citeema bìvwa mwa kwenza bidimu nkàmà yinaayi ne makumi mwandamukùlù ne bisatu. Ki bwa cinyi, too ne ku Maasiyà... Mpindyewu tukàadi tuseemena ku citùpà eci kaaba *aka*. Too ne ku Maasiyà, kùdi ne cya kwikala bidimu nkàmà yinaayi ne makumi mwandamukùlù ne bisatu, bidimu nkàmà yinaayi ne makumi mwandamukùlù ne bisatu.

⁸⁰ Mpindyewu, mpindyewu, Yesu, Maasiyà, wàkabwela mu cimenga cya Yèlusàlèmà, bu mucimunyi, mubànde paanyima pàà kampundu katòòke, mu Dyàlumingu dya Malala, mu matùkù a2 a ngondo mwinâyì, cidimu cya 30 cya bikondo byetu ebi. Yesu wàkabwela mu Yèlusàlèmà mu Dyàlumingu dya Malala, mu cidimu cya 30 cya bikondo byetu ebi. Nenu mpindyewu, mpindyewu, kuumukila ku cidimu cya 445 cya kumpàlâ kwa Kilisto too ne ku cya 30 cya bikondo byetu ebi, kùdi bidimu nkàmà yinaayi ne makumi mwandamutekète ne bitaanu bulubulu.

⁸¹ Kadi, anu mutùkaadi bamanè kumòna, mbingu makumi asambombo ne citeema yidi yènza bidimu nkàmà yinaayi ne makumi mwandamukùlù ne bisatu. Mpindyewu. apu mpàdì lutàtù lùlwa, anu apu mene. Nwamònu anyi? Tudi anu, bwa ku bidì bifùnda mu Bible emu, cikondo, anu ne bidimu nkàmà yinaayi ne makumi mwandamutekète ne bitaanu. Kadi, mu bushuwa bwa bwalu, bidi mbidimu nkàmà yinaayi ne

makumi mwandamukùlù ne bisatu, dishiilangana dya bidimu mwandamukùlù.

⁸² Mpindyewu, Nzambi kèna mwa kwenza bwa bipangilè to. PiikalàYe mwambe ne nebiikalè matùkù bùngì kampànda, bìdi anu matùkù bùngì abu. Yèyè mwambe ne mbùngì kampànda, bìdi anu bùngì abu. Pa nanku citwènza twètù ki cinganyì? Mpindyewu, bidimu bya 475 kumpàlà kwa Kilisto too ne ku cya 30 cya bikondo byetu ebi abi, abi mbidimu bya kabala-matùkù kàà Julien anyì kàà maalù a mabùlunga, bìdi ne matùkù nkàmà yisatu ne makumi asambombo ne ataanu ne cyàbinaayi cimwè dya ditùkù ku—ku cidimu. Kadi patùdi tukèpesha matùkù awu bilondèshile kabala-matùkù kèètù kàà cipròfetà . . .

⁸³ Mpindyewu ngánjì kwimana apa bwa katanci kakese cyanààna. Bwa nwènù kumanya kakùyì mpatà nansha ya kànà ne, ncyèna anu mufwànyìne kwangata kaaba kàmwè aku to. Ndi mwa kukàngacila mu kaabujimà kàà Mifùndù bwa kunùjaadikila ne matùkù mwandamutekète awu ngwòwò mwandamutekète awu, lumingu lùmwè lùdi—lùdi bidimu mwandamutekète, mu Bible. Ndi mfùma ku dicyènza apa, mu Bwàkabuulwibwà nshapità wa 13, anyì nshapità wa 11 ku mwensà mwi3. Bapròfetà abu nebènzè cipròfetà munda mwa matùkù cinunu ne nkàmà yibidi ne makumi asambombo, cidì munkaci mwa lumingu lwà ndekeelu lwà beena Yudà, pashiishe bàdi bàkòshiiibwa ne mvità ya Àmàgedò yibanga. Dìbà adi byòbì nanku, ki cyòci kabidi, mmatùkù anu makumi asatu menemene mu ngondo. Nwamònu anyì? Nenku, kabyèna—kabyèna bya matùkù makumi asatu ne òmwè ne bya matùkù makumi abidi ne mwandamukùlù, ne bikwabo abi to. Bìdi anu matùkù makumi asatu menemene mu ngondo, musangu wònsò.

⁸⁴ Kabala-matùkù keetu kàà cipròfetà kàdi kàya neetu ku matùkù nkàmà yisatu ne makumi asambombo, mutùdi tukwàta mudimu mpindyewu mu Mifùndù. Tudi menemene anu ne nkàmà yinaayi ne makumi mwandamukùlù ne isatu. Ki bwalu abu's, nkàmà yinaayi ne makumi mwandamukùlù ne isatu. Ki twètù aba anu menemene ne cileeji cya cipròfetà, bulelèlà anu bwètù bwa menemene ebu. Bwalu, kuumukila ku cikondo cya dipàtuka dya díyì dya kwibaka ntempèlù, too ne ku dibùtudiibwa, pàakabèngàbo Kilisto ne kuMushebeyabò mu cidimu cya 33 cya bikondo byetu ebi, pàakashebeyiibwà Kilisto, kùdi anu menemene bidimu nkàmà yinaayi ne makumi mwandamukùlù ne bisatu.

Mpindyewu, kuumukila ku dipàtuka dya díyì ditùma bwa kwibakulula Yelusàlèma, mbingu mwandamutekète nyàkakòshiiibwà, civwà cyùmvwijà bidimu makumi anaayi ne citeema. Nenku bidimu makumi anaayi ne citeema abi kukùmbanabi anu bulubulu. Ee, kuumukila ku diibakuludiibwa dya ntempèlù too ne ku Maasiyà, kùvwa bidimu nkàmà yinaayi ne makumi asatu ne mwandamukùlù. Pa nanku, nkàmà yinaayi

ne makumi asat- . . . nkàmà yinaayi ne makumi asatu ne binaayi. Ne nkàmà yinaayi ne makumi asatu ne ne yinaayi (cikondo), makumi anaayi ne citeema, bìdi byènza anu menemene bidimu nkàmà yinaayi ne makumi mwandamukùlù ne bisatu. Ncituutè anu mu cyôci, anu ditùkù menemene, ku ditùkù too ne ku ditùkù. Amen! Ki bwalu abu's.

⁸⁵ “Maasiyà Mfumu neâlwe.” Nwamonu anyi? Mwandamutekète kuvudija ku makumi asambombo ne citeema mwomunwe ne nkàmà yinaayi ne makumi asat- . . . ne—ne makumi mwandamukùlù ne yinaayi ya bidimu. Ncituutè anu mu cyôci, menemene. Pa nanku, díbà adi, tudi bamanyè anu bipwàngàne, tudi bamanyè anu menemene ne, Mufùndù awu ngwà cya bushuwa. S'ki cyôci eci. Kadi, nudi numòna's, yònsò eyi. . .

⁸⁶ Pàvwà Nzambi mubùtùle buloba bwa kumpala kwa mvula ya Noà ku mâyi, ne mushintùlùle matùkù a ngondo a maalu a mabùlunga; ne pashiishe mulekèle beena Loomò babwelè ne bakwàtàkàje kabala-matùkù kaabo bóbò, kàdi kènza kutuuta kadi kutùpika, ne bikwabo apu. Ne mèmè, ndi ngeela meeji ne, nansha mene mu mukàndà wa cibungu mùmvwà mbala. . .

⁸⁷ Byòbi biine, ambà tǔng, Mwanèètù Kenny Collins, yèyè mwine ùdi mu citanda emu mu dinda emu anyi, Kenneth Collins? Udi mumanyè paùvwà muntùmìne mukàndà munènè wà cibungu awu anyi? Udi muvùlùke cyôci aci anyi? Uvwa muntùmìne kuntu kwàka pàmwè ne màshinyi majimà tentè a cisemuna a bibungu abi. Mèmè kudyàmbidila ne: “Mèmè wabò ewu ncinyi cìdiku muntu wa kàyi mumanyè cintu ciine bu mèmè ewu mufwànyine kwenza ne byònsò abi?” Udi mumanyè's, Mukalenge nguvwa ukulombola awu, Kenny. Mwòmò amu ki mùndi mupetèle maluba aa, anu mu mukàndà wà kale wà cibungu awu, “cikondo,” ne mùmvwà ndonga. Ne Becky ùdi ùkwàta naabi mudimu mu cilongelu cyabo. Ndi naabi mu bíro byànyì amu, mu cibambalu cyànyì cya ciikishilu cya mwinshì mwa buloba aci. Ki twètù kupwekamù ne kucyàngata, ne twètù kutàpamù dísù, ne kucisangana, anu menemene, mu tubala-matùkù twònsò ne bikondo bikaadìku kacya abi. Nwamònu anyi? Pa nanku, twètù kucipeta.

⁸⁸ Ki cyôci aci, anu menemene, bidimu nkàmà yinaayi ne makumi mwandamukùlù ne bisatu. Kuumukila ku dipàtuka dya diyì ditùma bwa kwalujulula—bwa kwalujulula nzubu awu, too ne ku cikondo cìvwà Maasiyà Mfumu mubèngiibwe, bìdi byènza anu menemene bidimu nkàmà yinaayi ne makumi mwandamukùlù ne bisatu, bilondèshile kabala-matùkù aku.

⁸⁹ Mpindyewu nudi numòna ne, twètù tudi tukwàta mudimu ne kabala-matùkù kamwekamwe aku mwab'ewu mene. Bwalu, bu Nzambi mwa kukwàta mudimu ne kabala-matùkù aka, díbà adi's bikèngela Yèyè kukwàta naako mudimu mu

bikwabo bikondo abi mu Bible mujimà. Ncya bushuwa anyi? Nzambi kàtu ùshintuluka nansha. Pa nanku, piikalàbi ne mbingu mwandamutekète yìvwa bidimu makumi anaayi ne citeema, mbingu mwandamutekète's yìdi cyàkàbìdì bidimu makumi anaayi ne citeema. Lumingu lùmwè lùdi bidimu mwandamutekète, nwamònu's, pa nanku bìdi byènza ne cìikalè anu cipwàngàne. Ne piikalàci cikùmbanangana anu menemene mwaba awu, necikumbànganè anu menemene cyàkàbìdì. Amen! Kaa, ekelekele! Aci's cidi cinsalula anu mèmè yònsò. Kaa, ntu—ntu—ntu munange, ntu munange kumanya bìndi ngamba. Ntu—ntu—ntu mucinangè.

Bwalu, anu mwàkambà mukùlumpè awu, mu Kentucky mwàmwa, ùngambila mèmè, wàmba ne: “Mèmè ntu muswe kutèeleja muntu kampànda wàkula, udi mumanye bìdiye wàmba.”

Mèmè kwamba ne: “Nansha mèmè pàanyi, ntu munange nanku awu.”

Kwambayè ne: “Ki lutàtù lunùdi naalù nwènù bayiishi, kanùtu bamanyè binùdi nwamba to.”

⁹⁰ “Ee,” mungàakambà, “Mèmè ndi ngaanyisha kàalumbandi keebe aku, kadi's kùdi bimwè bintu mutùdi cya bushuwa bamanyè bitùdi twamba.” Uh-huh. Ncya bushuwa. Mèmè ndi mumanye ne ndi mulediibwe cyàkàbìdì. Ndi mumanye ne ndi mumùke ku lufù muyè ku Mwoyi. Ndi mumanye ne kùdikù Nzambi, bwalu nkààdikù mwakùle Nendè.

Nkààdikù muMuumvwe wàkwila kùndi, ne wàkula naanyi, ne wàkula ne bakwabo, ne ùngambila bwa bakwabo. Ne ndi mumanye ne Yèyè ùdi Nzambi. Aci ncya bushuwa. Yèyè wàkapetakù musàngèelu wà kupweka ne kulekela ndikwàcisha Nendè fòtò, cidi beena maalu a mamanya kabàyikù mwa kuvila to. Ne pàndi mbuulula mu Mifùndù ndi mumòne ne aci mbwà kuuja anu menemene cikondo cya ekeleeziya eci, anu menemene cidi cyènzekà, mu mushindu wà ne ndi mmanyè ne ki kutùkaadi. Amen.

⁹¹ Mpindyewu, tudi mwa kwikala katùyi balongè tùlaasà to. Tudi mwa kwikala katùyi bantu bàà tuyaayi tükamòne to, ne bikwabo bya nanku awu. Tudi mwa kwikala katùyi bantu bàà myanzù mitùmbùke to, kadi bwa Nzambi kaayi tudi baMumanyè. Tudi baMumanyè bwalu kùdi Nyuma Mwimpè, nwamònu's, ne bìdi bìpetangana ku Mwaku ne ku Mwaku mu Mifùndù yònsò nkòong, díbà adi's tudi tumanya ne mbilelèlè. Tudi ne mwoyi mu matùkù a ndekeelu.

⁹² Mpindyewu, mwaba awu, vùlukàayi mpindyewu, ne, cidimu cya cipròfetà eci, cya matùkù nkàmà yisatu ne makumi asambombo mu cidimu eci. Tàngilàayi bikwabo bintu byònsò. Bufùki, bamwe bàà kunùdi ní bàdikù mwa kuumvwa, nansha pa bìdi bitangila bakàji, ne bikwabo. Nwamònu anyi? Makumi

asatu, matùkù makumi asatu, címònaayi anu cyanààna—cidi . . . Bufùki bwònsò mbulongolola mushindu awu. Nwamònu anyi? Kî mmakumi asatu ne dimwe, makumi asatu, makumi abidi ne mwandamukùlù, anyi cintu kampànda nansha. Bidi anu menemene matùkù makumi asatu. Bwa cidimu ne cidimu cyònsò, ki kabala-matùkù kàà cipròfetà aku, anu matùkù nkàmà yinaayi ne makumi mwandamukùlù ne asatu menemene.

⁹³ Apa tudi ne cileeeji mu cyòci cya cipròfetà, bidimu nkàmà yinaayi ne—ne makumi anaayi ne bitaanu, kumpàla, ki cìvwà anu cyòci menemene. Mpindyewu, byònsò abi bivwa byamba mu cipròfetà ne nebyènzekè. Ne mbingu makumi mwandamutekète ayi kayàakuulakù musangu awu to, pa nanku mmishààle bwa matùkù a ndekeelu mpindyewu.

⁹⁴ Mpindyewu, nwênù bânà beetu beena Mpenta, mpindyewu, nwênù bânà beetu Bantèmù bàà Yehowàh, nudikù nufika ku dyumvwa anyi? Nudi bamanyè mwaba wùdi binunu lukàmà ne makumi anaayi ne binaayi abu bamwènèkèle anyi? Nudi bamanyè mwaba wùdi bishimà binène byònsò bya Bwàkabuulwibwà abi bimwènèkèle anyi? Mu cikondo cya beena Yudà, kî mmu cyetu twètù to. Kakwèna cintu nansha cimwe citèèlamù to, anu Ekeleeziya mwikàle ùdìlongolola ne ùpàtuka. Bushuwa, ne bukolè bwa Nzambi, tudi twenza bishimà ne maalu manene. Aci kaayi tudi bamanyè. Kadi cintu menemene cìvwà apa kùdi beena Yùdà; ndi nswa kwamba, bukolè bwena diìnà, bùdi bwènza maalu, bùdi bwènza bishimà. Binaayi . . .

⁹⁵ Binunu lukàmà ne makumi anaayi ne binaayi abu kabèèna bàmwènèkela amu to. Bòbò bàdi . . . Kabèèna bàmwènèkela mu nshapità mwi3 to. Bàdi mu Mifùndù amu, kumpàlà kule. Nenku mpindyewu tudi tumòna ne bintu byònsò bivwà ne cya kwenzeka ebi, bivwa mmu cikondo cya lumingu lwà mwandamutekète eci, lumingu lwà ndekeelu elu. Mpindyewu, piikalàbi ne bòbò bàkaadi bamanè kwangata mbingu makumi asambombo ne citeema, ne bayipicishe anu menemene mwàkambà Nzambi ne mbayipicishe amu, ne byenzèke anu menemene mwàkambà Nzambi ne bivwa mwa kwenzeka, dîbà adi's kùcidi kabidi lumingu lùmwe lulaya beena Yudà. Mpindyewu, bânà beetu, dilongòlòlàayi anu cyanààna. Nwamònu anyi? Nwamònu anyi? Tèèjààyi mutùkaadi pabwîpi. Lumingu lwà ndekeelu, mwandamutekète, cidimu cya mwandamutekète.

⁹⁶ Mpindyewu, bantu bònsò mbumvwèku too ne apa anyi, panwikalà bumvwè? Bantu bònsò mbumvwè too ne apa ne, m'Bulelèlà anu bwetu bwa menemene ebu. M'Bible. Mbidimu bya cipròfetà.

⁹⁷ Mpindyewu twáfiki too ne mwaba awu, ne twabyàngàcidi apa too ne ku dibèngà dya Maasiyà, nwamònu's, kuumukila ku . . . too ne ku dibèngà dya Maasiyà, lumingu lwà ndekeelu.

⁹⁸ Mpindyewu, ndi muswe kwimana anu apa bwa katanci kakese cyanàànà bwa kuumvwijakù eci. Ne, pàkabèngàbo Maasiyà, mpàvwàbo, mu bushuwa bwa bwalu, babènge Yesu bu Musùngidi, ne baMupoopèle pa nkùrusè. Vùlukààyi mwab'ewu cidi Bible mwambe ne: “Ne Yèyè neùmushiibwè, kadi kaciyi Bwèndè Yèyè mwine to, Maasiyà, Mfumu awu.” Mpindyewu anji elààyibi meeji mùdì cipròfetà aci cituutè anu pabwìpi menemene. Ndi muswe kunùbwejacì. Cya ne, pùkalàbi ne cipròfetà aci nciutuutè anu menemene mu ditùkù dya ngondo, anu menemene pa díbà, ne anu menemene mwàkambiibwàbi ne cìvwa mwa kwikala, lukwabo lwà mwandamutekète elu, mbingu mwandamutekète yidì mishààle eyi, anyi, bidimu mwandamutekète ebi's wè, (matùkù mwandamutekète: bidimu mwandamutekète), s'neyìtuutè anu menemene bilondèshile Mifùndù.

⁹⁹ Mpindyewu vùlukààyi ne, Yèyè wàkuumushiibwa, Maasiyà. Beena Yudà, Nzambi wàkalekela kutàngila bwalu bwàbò. Kabàákaya kule to. Díbà adi bààkatangalajiiibwa kùdì Bukalenge bwalàbàle bwa Loomò. Nenku, díbà adi, nwènù bamòne pa dizòlà dyànyì edi, ndi muswe bwa nùdipetè mpindyewu ne nùdizòlè. Nudi bamòne pàndì mutèèke nkuruse apa anyi? Ki pààkaMubèngàbo apu. Kadi cikondo cyàkaleepakù anu kakese cyanàànà pa cyòci aci, nwamònu's. Bwa cinyi? Makumi asatu, makumi anaayi, makumi ataanu, makumi asambombo, makumi mwandamutekète. Paanyimà pàà bidimu makumi anaayi, Tiitò, kalààlà kàà mäsàlaayi kàà Loomò, kubùtulayè Izaleela, Yelusàlèmà, ne kutangalajayè cisàmbà aci pa buloba bujimà. Nudi numòna's, Tiitò, paanyimà pàà bidimu makumi anaayi. Pa nanku, mu bushuwa bwa bwalu, cikondo cya beena Yudà cyàkaleepa too ne ku cijimà . . .

¹⁰⁰ Nzambi kàvwa ùtàngila bwalu bwabo to. Yèyè ùvwa ùtàngila bwalu bwabo anu too ne pàakabèngàbo Kilisto apu. Díbà adi pàakapoopelàbo Kilisto pa nkùrusè, bààkeela lubilà ne: “Mashi Èndè ìkalè pambidi peetu ne pàà bânà beetu balela,” ne cyàkenzeka nanku kutàngila anu apu. Kadi kumpàlà kwa bòbò kutangalajiiibwa . . . Tèèlejàayi! Kaa, mwanèètù! Kumpàlà kwa bònsò kutangalajiiibwabò pa buloba bujimà, byàkangata Nzambi bidimu bitwè ku makumi anaayi bwa kushimbula ntempèlù ne kubàtangalaja pa buloba bujimà. Kadi Nzambi wàkapanga kutàngila kabidi bwalu bwabo. Nzambi wàkapanga kutàngila kabidi bwalu bwabo.

Wàkatungunuka ne kutàngila bwalu bwa bàà Bisàmbà bya bendè. Aci nudi bamanyè, nwacyùmvù mpindyewu anyi? Mpindyewu, apa mpatùdì tubangila mu bikondo bya ekeleeziya, cikondo cya bàà Bisàmbà bya bendè, Nzambi kule ne beena Yudà.

¹⁰¹ Mpindyewu, wèwè mwanèètù missionnaire, wa kùdì—kùdì—kùdì beena Yudà, mwanèètù munanga wa mushinga mukole

kaaba aka. Apa mpândi muswe bwa wêwè kubàkwila aci ne kucyùmva. Nwamònu's, Nzambi wàkiimanyika ditàngila dya bwalu bwa beena Yudà anu apu, bwalu Nzambi misangu yònsò ùtu ùtàngila bwalu bwa Izaleela anu bu ditùnga. Tudi bònsò bamanyè ne Izaleela nditùnga. Bàà Bisàmbà bya bendè bàdi cisàmbà, ne byàkakèngela bwa kwangataYè cisàmbà munkaci mwa bàà Bisàmbà bya bendè, bwa Dîna Dyèndè. Netùkafikèku mu katanci kakese emu.

¹⁰² Kadi mpindyewu, mu bikondo mwandamutekètè bya ekeleeziya mutwàlongù amu, mu cikondo cya bàà Bisàmbà bya bendè, kuumukila ku dipoopediibwa dya Kilisto pa nkùrusè too ne kundekeelu kwa bikondo bya ekeleeziya. Mpindyewu twàpecì aci. Tudi bacìlongè, too ne kundekeelu. Mpindyewu tukàadi tukafika mwaba wutùdi mwa kulenga cyòci eci, kubwela mu Bitampì Mwandamutekètè, Mpànza Mwandamutekètè, Mpungi Mwandamutekètè, ne byònsò abi, ne kubileeja byònsò pàmwè mu bimfwànyì; ditàngila dyònsò dya bwalu bwa beena Yudà, ne dilumbulwisha dya bantu bàdi pa buloba kùdi Nzambi. Ne bàshàadilè... .

¹⁰³ Vùlukàayi ne, mu cikondo cinène cya dikengeshiibwa eci, nekwikalè miliyò ya bàà Bisàmbà bya bendè biikalà mwa kufwàmù. Mukàjì-musela mubèngiibwe awu, bàshàadilè bàà dimiinu dya—dya mukàjì abu, virgo mukùtàkàne awu, yèyè neàpicilèmu buludì. Cyòci's—cyòci's ncitòòke anu mùdi mbingu makumi mwandamutekètè eyi; citòòke anu tòò. Ne bòbò nebàpicilèmu. Pa nanku, wêwè kùyi ne Nyuma Mwîmpè to, mbîmpè ùditwè mu diMukèba lukàsà ne mwebe mwònsò. Tudi ku cikondo cya nshìikidilu.

¹⁰⁴ Mpindyewu mònaayi, bikondo mwandamutekètè bya ekeleeziya. Mpindyewu, kabyàkunkèngela bwa kubikenketa nansha, bwalu tudi naabi pa mikàbà ya mèyi, ne bìdi munkaci mwa kufùndiibwa mu mikàndà ne bikwabo byònsò. Aci, aci civwa ncikondo cidi Nzambi kàyikù mwambe ne nekwikalè matùkù bùngì kampànda, mèbà bùngì kampànda, anyì bidimu bùngì kampànda to; Yèyè kàtukù mwambe cintu nansha cimwe to. Mmwanbe ne: “Too ne pààjikà cipungu cya bàà Bisàmbà bya bendè.” Mmwanbe ne: “Too ne!” Bimanu nebìdyatakajiiibwè ku makàsà too ne pààlekelà Nzambi kutàngila bwalu bwa bàà Bisàmbà bya bendè.

¹⁰⁵ Mpindyewu, tudi tusangana ne, munda mwa biine bikondo ebi, tudi bapetè Nyuma Mwîmpè mulwè. Ne dîbà adi Nzambi, ku cibangidilu kwàka, ùkaavwa mubange kwamba dîbà adi, ku dibèngà dya Kilisto kwàka, Nzambi wàkaleeja Yone anu menemene civwà mwa kwenzeka mu bukòokeshi bwa bàà Bisàmbà bya bendè. Mpindyewu, nwamònu's, twètù katwènaku ne cikondo kampànda ciimanyika to, mùdi beena Yuda amu, kadi tudi twètù ne cimanyinu kampànda. Tudi ne—tudi ne dikunji dya cimanyinu. Ee, Nzambi mmwenze ne beena Yudà

anu menemene cyàkambàYe ne Neénzè mu bidimu makumi asambombo ne citeema amu abi, anyi, bivwa mbidimu nkàmà yinaayi ne makumi mwandamukùlù ne bisatu, kadi mbingu makumi asambombo ne citeema. Ne lumingu lùmwe ndushàale, lumingu lùmwe lùcidi lukòsa.

¹⁰⁶ Mpindyewu, katwèna mwa kucyàngata bwa *apa* nansha, bwalu eci m' Bisàmbà bya bendè, Ekeleeziya. Mpindyewu, mbanganyi bàdi bumvwe aci? [Disangisha didi dyamba ne: "Amen."—Muf.] Mpindyewu, eci m' Bwàkabuulwibwà, kubangila ku nshapità wa kumpàla, too ne ku nshapità mwi3 mùdibo bàya neetu too ne mu Laòdikiyà. Mpindyewu, tudi tumòna anu menemene mùdibi ne cyònsò aci civwa ng'Ekeleeziya, bukwà'Èkèleeziyà bwòbù bwine. Nzambi kacya kî mmwelèmu ngènzàmpèkààtù to, yèyè awu ùdi anu . . . ambà anu yèyè muswe kusungidiibwa's. Kadi, bukwà'Èkèleeziyà abu bivwa bwònsò butòoke; pashiishe kulwakù beena Nikàlàwù bàakaswà kwenza bulongolodi kampànda. Bantu bàà myànzù mitùmbùke bààkabwelamù. Eci civwa nku Nicée, Loomò, pàakenzàbo Nsangilu wa ku Nicée. Kadi cyàkenzàbo ncinyi? Bààkavwija ekeleeziya bulongolodi, pashiishe kubangabò kukèngesha beena Kilisto. Pashiishe, mu cikondo cya ekeleeziya cyàkalondà, pàmwe ne cyònsò, bwena Kilisto, mu mmwènekelu wa dibàtiiza dya Nyuma Mwîmpè, bwàkuumushiibwa bwònsò.

¹⁰⁷ Kadi dîbà adi, aci nwènù nudi bamanyè ne, ngàkaya kangata maalu-malonda, *Baataatù Bàà Ku Nicée*, ne *Baataatù Bàà Kumpàlà Kwà Nicée*, ne maalu-malonda ònsò a ekeleeziya, ne mifundù ya kale menemene yîmvwàku mufwànyine kupeta ayi, ne cyònsò cya ku byòbì cyàkanujaadikila ne Ekeleeziya uvwa Nzambi wamba awu kàvwa ng'ekeleeziya wa Katolike uvwa muvwijibwe bulongolodi awu anyi bulongolodi bukwabo nansha bumwe to. Civwà Nzambi wamba, ne mitooto yònsò minene ya bikondo ayi, bàvwa mbantu bàkalongeshà dibàtiiza dya Nyuma Mwîmpè, dibàtiiza mu Dîna dya Yesu Kilisto, ne dilwa dya Nyuma wa Nzambi, ne—ne dyakula dya mu myakulu, ne dyandamuna dya myakulu, ne dyondopa, ne bishimà, ne bimanyinu. Abi ki bidì Nzambi wàbanya. Yèyè kèna mwa kushintulula mmwènenu Wendè nansha, kwamba ne: "Ee, ewu mmwènenu Wànyì wa Ekeleeziya, Ekeleeziya wa bapostolo; bwa mpindyewu mmwènenu Wanyì ng'ekeleeziya wa bantu bàà myànzù mitùmbùke." Nzambi kàtu ùshintuluka nansha! Cìcidi anu Nyuma Mwîmpè.

¹⁰⁸ Nenukù tudi tutàngila ne tulwa naaci, dîbà adi, patùdi tumòna ngiikàdilù wa Nzambi ne cidiYe . . . ne dîbà adi kupàtula Mufundù Wendè. Nenukù pashiishe kwangata bwalu—bwalu-bulonda bùdi bùleejà ne cidi cìtuuta anu menemene pa kaaba; anu menemene pa ditùkù dya ngondo, pa dîbà, pa cintu cyònsò cidi Nzambi mwambidile kùdi Yone ne, civwa mwa kwenzeka aci, cyàkenzeka mu cikondo cya bàà Bisàmbà bya bendè aci.

¹⁰⁹ Mpindyewu, tudi tudisangana, kakùyìkù mpatà nansha mikese to, mu Cikondo cya Laòdikiyà. Tudi bamanyè ne ki mutùdi tusanganyibwa. Tudi bapicile mu Cikondo cya ba-Luthériens; tudi bapicile mu Cikondo cya Wesley; mpindyewu tudi mu Cikondo cya Laòdikiyà, cikondo cya ndekeelu. Ne tudi tufika ku dyumvwa ne yònsò wa ku ekeleeziya ayi ùvwa ne musanjeela. Tudi tusangana nanku awu. Mitotoo mwandamutekète mu cyanza Cyèndè, yìvwa Nyuma Mwandamutekète yidi mipàtùke kumpalà kwa Nzambi. Umwe ne umwe ùvwa ne musanjeela. Nenku tudi tupweka ne tujandula, ku Bible, ngiikàdilù kaayì ùvwa musanjeela awu mwa kwikala nendè, ngiikàdilù kaayì ùvwa musanjeela awu mwa kwikala nendè. Nenku twangata muntu mu maalu-malonda uvwa ne yèyè ngiikàdilù awu awu. Ne pashiishe patùdi tupeta muntu awu mu maalu-malonda, uvwa ne yèyè ngiikàdilù awu awu, tudi tufika ku dijandula ne yèyè nguvwa musanjeela wa cyòci cikondo cya ekeleeziya aci. Pashiishe tudi tujandula Nyuma, ne civwà mwine muntu awu mwenzè. Ne tudi tujandula ne yèyè awu ùvwa munsantu mùle tètè ne Nyuma Mwîmpè, Irénée Munsantu, ne bakwabo bònsò abu, ne—ne Colomban Munsantu, ne bantu bònsò bàvwa bùle tètè ne Nyuma Mwîmpè abu. Ne tudi bamanyè, ku Mufundù ne, mushindu wà Nyuma awu nguvwa ne cya kwikala pa muntu wa mushindu awu bwa cyòci cikondo aci. Ki bwalu mbwòbù abu, pa nanku kaciyèna mwa kwikala cya mafi nansha. Amen! Butumbi kùdi Nzambi's wè! Aci cidi anu. . .

¹¹⁰ Ncyèna mumanye to, mwanèètù. Aci cidi ne bwenzeji kùndi kutàmba ní ncinyì ní ncinyì cyònsò cìndiku mumanye, nwamonu's, bwalu n'Dìyì dya Nzambi Dyòdi diine dyàkula. Pàndi ngumvwa Nzambi wàmba cintu kampànda, ndi ngamba ne: "Amen! Aci ncilelèlè. Ncya bushuwa." Nwamonu anyi? Aci cidi cikòsa bwalu. Kwònsò nkujikè. "Nzambi ngudi mwambe." Aci, aci cyàmanyi bwalu.

Ee, Nzambi mmwambe ne necyènzekè mushindu awu, nenku pèètù tucisangana mu maalu-malonda ne ku Mifundù. Tuvwa mwa kubala pa bidì bitàngilà cikondo cya ekeleeziya eci, civwàci mwa kwenza, civwà mwa kwenzeka, musanjeela wa mushindu kaayì uvwakù bwa cyòci cikondo cya ekeleeziya aci. "Kùdi—kùdi mwanjelo wa ekeleeziya wa Laòdikiyà. Kùdi mwanjelo wa ekeleeziya wa Saadi, Twatilà," mikwabo yònsò mishilèshilàngàne eyi. Nenku twalukila mu maalu-malonda ne tupeta musanjeela wa—wa yèyè ekeleeziya awu, nenku tujandula ne ùvwa nganyi. Pa nanku dìbà adi tuvwa tucizòla, tufùnda mènà àbò mwinshi mwàci, nenku ki bòbò abu's. Nwamònu's, tudi bamanyè ne civwa cikumbanangana anu menemene.

¹¹¹ Mpindyewu, kabidi tudi bamanyè ne Nzambi ùvwa, ùvwa misangu yònsò, ne ùtu misangu yònsò, anu ùbèngangana ne ntèndeleelelu mudilongolwela. Eyowa's, mukalenge. Wàkacyàmba

ne: “Beena Nikàlàwù, bàNdi mukine!” *Nickao* mbwena kwamba ne “kukwàta beena kwitabuuja ku bukòokeshi.” *Beena kwitabuuja* mbwena kwamba ne, beena kwitabuuja mbwena kwamba ne, “ekeleeziya, mubidi.” *Nickao* mbwena kwamba ne “kukwàta ku bukòokeshi, kucimuna,” mu ngaakwilù mukwabo, “kuvwija muntu munsantu kampànda, muntu kampànda kumutù kwa mukwabo.”

Twètù bònsò tudi bàna. Tudi ne Mfumu umwèpelè, n’Nzambi. Tudi ne Umwèpelè udi Munsantu, ne mwine awu n’Nzambi. Amen! Ne Yèyè ùdi munkaci mwetu emu, mu mmwènekelu wa Nyuma Mwímpè. Ki Munsantu n’Yèyè awu.

¹¹² Mpindyewu, tudi tupweka too ne patùdi tutwishiiwa anu menemene ne mu kupìcila kwa mu ci—cikondo cya beena Yudà aci tudi anu menemene ne mbingu makumi asambombo ne citeema ayi, ku maalu-malonda, ku kabala-matùkù, ku cidimu cya cipròfetà cya Nzambi, twenda tuya ne maalu-malonda a kabala-matùkù kàà cipròfetà aku, tuumukila anu ku Dipungila Dikùlukulu too ne ku Dipyadipyà, ne biikàle tuleeja anu menemene ne ncintu cimwecimwe aci. Nwamònu anyi?

Mpindyewu tudi ne ekeleeziya wa bàà Bisàmbà bya bendè kuumukila anu ku ntwàdijilu, too ne ku ditùkù dya ndekeelu, ne tudi tumanya ne tudi ne mwoyi mu ditùkù dya ndekeelu. Amen! Nudi numvwa anyi? [Disangisha didi dyàmba ne: “Amen.”—Muf.] Mpindyewu, dìbà adi, piikalàbi ne tudi ne mwoyi mu ditùkù dya ndekeelu edi, kundekeelu kwa cikondo eci, tudi penyì dìbà adi?

¹¹³ Mònaayi, lwà paanyima menemene apa, nudi numòna ewu mushoonyì wùdi mwela paanyima lwà munda *emu*, mùvwà Nzambi ùtàngila bwalu bwa beena Yudà... Anyi, kàyikù ùtàngila bwalu bwa beena Yudà to, byàkaMwangata cikondo cile bwa kubàpeta. ByàkaMwangata bidimu makumi anaayi bwa kubàfikisha mu ngiikàdilù uvwaYè mwa kubàbùtwisha, mu matunga ònsò. Mu myaba yònsò, mu matùkù a bàà Bisàmbà bya bendè, byàkakèngela bwa kubàfikishaYè mu ngiikàdilù awu kumpàlà kwa kufikishaYè Dìyi Dyèndè ku dyenzeka. Nudi numòna cìndi njinga kwamba anyi? Bònsò bàdi bacyùmvwè bàmbè ne: “Amen!” [Disangisha didi dyàmba ne: “Amen!”—Muf.] Nwamònu’s, ndi muswe kwikala mutwìshiiabwe ne nudi nucyùmvwà.

¹¹⁴ Mpindyewu cìdi cyenzèke ncinyi? Bàndishàayi mèsù kuulu ku lusongo lwà cikondo cya ndekeelu cya ekeleeziya eci. Nudi numòna dileepesha dikese edi anyi? Matùkù a bàà Bisàmbà bya bendè àkaadi àjika. Nenu munda mwa bidimu makumi anaayi bya ndekeelu ebi, beena Yudà bàdi munkaci mwa kupingana ku Yèlusàlèma, bàalukila ku buloba bwabo. Aleluuyah! Nudi bamòne kutùkaadi aku anyi? Byàkakèngela bidimu makumi anaayi, kuumukila ku dyumushiibwa dya Maasiyà, too ne

pàakalwà Tiitò kushimbula ntempèlù ne kutangalaja beena Yudà. Nkupite kabidi bidimu bikwabo makumi anaayi bidì Nzambi mupapishe myoyi yà ba-Pâlò bàà mishindu yònsò mu myaba yònsò, ne kwaluja beena Yudà mu buloba bwabo. Kadi leelu ewu bàkaadi baalùkile cyàkàbidì mu buloba bwabo, ne Ekeleeziya ùkaadi kundekeelu. Amen! Kaa, ndi—ndi—ndi nteeta anu bwa kubala's; ncyèna ne mushindu to.

¹¹⁵ Mònaayi, beena Yuda bàdi mu buloba bwabo, ne bàdi munkaci mwa kwalukila. Nwènù bapetè mukàndà wà *Dishùkila Dyà Mvità Yà Buloba Bujimà*, mupimbu mwibìdì, pàvwà Kalààlà kàà bàsàlaayi Allenby, paanyimà pàà Mvita ya Kumpàlà ya Buloba Bujimà, mulwe mu ndèkè kuulu kwa Yelusàlèmà ne mumubùcikile, ne mukwàte Yelusàlèmà. Ki beena Kilisto abu kwendabò mu Yelusàlèmà amu buumùshe bifulu ku mitù. Ki Allenby kudifilayè kàyi mutuutè cingoma nansha cimwe to, anyi—anyi, bòbò bààkadifila kùdì Allenby, ba-Turcs abu. Ne kubangila anu apu, Nzambi wàkabanga kupapisha mwoyi wà Mussolini, mwoyi wà Hitler, mwoyi wà Stalin, myoyi ya bantu mu ditunga dijimà, bàkina beena Yudà abu.

¹¹⁶ Ki pashìshe nyuunyi ya minene menemene yàkatùùlukà ayi, yibìikidiibwa ne Ndèkè ya ku Esètè, anyi Ndèkè ya Amerike Mujimà, anyi, cyònsò civwàyi aci, ngeela meeji ne yivwa yibìikidiibwa ne n'TWA, civwa mu ci—cikàndàkàndà—cikàndàkàndà cya *Life*, ngeela meeji ne ki cyòci, *Look* anyi *Life*, ngeela meeji ne civwa n'*Life*, anu mu bidimu bisatu anyi binaayi cyanàànà byàshàadi ebi, ki Nzambi kumbà kwaluja beena Yudà mu buloba bwabo, mùvwàbò kabàciyi bàsanganyibwa to munda mwa bidimu binunu bibidi, pàvwà bàà Bisàmbà bya bendè munkaci mwa kudilongolola apu. Kadi patùdì twakulangana apa bàà Bisàmbà bya bendè bìpàci Kilisto bààMwedi pambèlù pàà ekeleeziya, bilondèshile Bwàkabuulwibwà nshapità mwi3. Kàcyèna nansha mene mwa kwalukila mu ekeleeziya Wendè to. Kakwènakù mwaba wà kuyaYè nansha wumwe to. Yèyè mmubèngiibwe.

¹¹⁷ Kadi dìbà dyàkànyì bwa Dyambwibwa's. Bapikula bònsò bàà too ne *apa* abu, tutobà tukese tukese etu mushindu ewu, ndijuuka dya bansantu mu dibìikà dya ku lufù. Nudi numòna's, tudi tusangila bònsò *apa*. Bible mmwambe ne: "Twètù bàdi ne mwoyi ne biikàle bashààle too ne ku dilwa dya Mukalenge katwàkupangisha anyi kucyàmakana kumpàlà aba bàdi balààle to." Kubangila anu *apa, apa, ne apa*.

¹¹⁸ Mmunyi, wèwè mwanètù mwena Mpenta, mmunyi mùdiku mwa kubyàngata byòbì byònsò bwa apa mu Cikondo cya Ekeleeziya wa Laòdikiyà emu?

Bòbò's—bòbò's mbalààle, munda mwa cyònsò cya ku bikondo ebi, bindile. "Ne twètù bàdi ne mwoyi, musùmbà mukese wùdì mushààle apa ewu, bàdi bashààle ne mwoyi too ne ku. . . Dilwa

dya Mukalenge katwàkucyàmakana aba bàdì balààle to; bwalu mpungi wa Nzambi neàdilé, ne bafwè mu Kilisto nebànji kubìika dyàmbedi; ne netwàmbwibwè pàmwè naabò,” amen, “pàmwè naabò,” s’ki twètù *aba*, tusangila *apa* mene, “bwa kuya kasangila ne Mukalenge mu mpeepèlè.” Nenku’s ki bwalu mbwòbù abu. Tudi penyì? Anu *apa* mene. Maasiyà wàkuumushiibwa penyì? Anu menemene mwaba wùvwà Dìyì dyambè awu. Lumingu lwà makumi mwandamutekète alu nelùbangilè penyì? Anu menemene paanyimà pàà Ekeleeziya ewu muumushiibwe. Dìbà adi Nzambi wàlukila kùdì beena Yudà.

119 Kanwènaayikù nuvùluka anyi? Aci mpàdì anu ne Ekeleeziya wàyi. Ekeleeziya ùya, dìbà adi beena Yudà bèèla bàkwàta, bàbwela. Kadi, dyàmbedi, cintu cìdì cìlondà mu dilondangana adi, kì nditàbuluja dya bukole dya ditùnga—dya bukole dya ditùnga munkaci mwa bàà Bisàmbà bya bendè nansha. Cintu cìdì cìlonda mu dilondangana adi, ndilwa dya Bukalenge bwa Nzambi, Dilwa dya Kilisto.

120 Mpindyewu, nwènù baswè, tudi bafwànyìnekù kwalukila apa mpindyewu ku Danyèlè nshapità mwi2, mvensà wa 34 ne mvensà wa 35. Nenku Danyèlè pàakapèeshiibwàye. . . nshapità mwi2, 34 ne 35, Danyèlè pàakamanàye kupèeshiibwa cikèènà-kumòna cya ne matùkù a cisàmbà cyèndè àkajika, ne bwa cikondo kampànda, ne kumònayè bàà Bisàmbà bya bendè bàbwela, ne kumònayè cikèènà-kumòna cya dibwe dinene menemene edi apa, anyì, lupingu lunene menemene, lùvwà ne mutù wà ngòlò, ne cyàdì cya argent alu (Mpindyewu tàngilàayi, cìdì cyènda cìtàmba kushila, cyùmuka ku argent cìya ku ngòlò.), cìdì cìlondà ciikàle bibelu bya cyamu cifiike, anyì, bibelu bya cyamu cya mitakù, ne pashiishe makàsà ne mikòlò bya cyamu cifiike, kadi bânà bàà nkàsà, bàvwa mbânà bàà nkàsà dikumi, ne bânà bàà nkàsà abu bàvwà bàà cyamu cifiike ne diima, ne yèyè wàkamba ne: “Anu muwàmònu ne cyamu cifiike kacìvwa cìfwànyìne kusambakana ne diima amu, makalenge aa neikalè matàpùluke ne kaayi mwa kusambakana ebu ne ebu to, kadi neàsambakaje pàmwè mamiinu àwù, àteeta bwa kucibulangana makole.” Nwamònu anyi?

121 Mpindyewu, cìdì cyenzèke, mutù wà ngòlò awu wùvwà n’Nebùkàndànèèsà, mwàkacyùmvwijàye. Kwambayè ne: “Mfumu mukwabo neàlwe kadi mwikàle mushààdile kùdì wèwè,” ùvwa n’Darius, wa beena Medàayi ne Peelààsà, ùkwàta bukalenge bwa bàà Bisàmbà bya bendè ku bukòkeshi bwèndè. Bààkalondà, paanyimà pàà beena Meedàayi ne Peelààsà, bàvwa mbanganyi? Beena Ngelikà, Alexandre le Grand, ne bakwabo; beena Ngelikà kukwàtabò bukalenge abu ku bukòkeshi bwàbò. Pashiishe mbanganyi bàbùnyènyi beena Ngelikà? Beena Loomò. Nenku mbanganyi bàdì bakòkèshe bàà Bisàmbà bya bendè kubangila apu? Beena Loomò! Beena Loomò, mpindyewu, ki bàvwà cyamu cifiike aci.

122 Dìbà adi mònaayi ne, Loomò ùdikù too ne kundekeelu, bwalu yêyè ngwâkaya too ne kundekeelu kwa bâna bàà nkàsà. Nenku yêyè wâkamona bitoci, diima; ne abu mbantu, citùdì benjìibwe naaci aci. Ne cyamu cifiike, dikàndà dya Loomò, dyàkendela mu dyònsò dya ku matùnga awu. Ne Loomò ngudi ne dikàndà mu ditùnga ne ditùnga dyònsò mwinshi mwa Dyulu.

123 Kùdi muntu umwèpelè pa buloba udi mwa kwimanyika mvità anyi kujuula mvità, kakùyi... mu kwamba anu kwa díyi dimwe cyanààna. M'paapa. Anjì ambàayi tǔng bu yêyè mwa kwamba ne: “Mwena Katolike nansha umwe kâmbulu cingoma to.” Aci's ncikòse bwalu, mwanèètù, wámbe wèwè cyònsò ciwàsà kwamba aci. Citùpà cya citàmbe bunene cya pa buloba, cya bwena Kilisto, s'mbeena Katolike. Nwamònu anyi? Eyo. Yêyè àmbè anu anu díyi dimwe cyanààna, ki cidiku.

124 Anu mùdìbo bambè kaaba aka ne: “Nganyì...” Netùbwelèmu pashiishe. “Nganyì udi mwa kwenza nyama wa lwonji mvità? Nganyì udi mwa kwakula bu yêyè? Nganyì udi mwa kwenza nanku? Nanku, twènzàayi cimfwànyì cya nyama wa lwonji.” Ki nsangilu wa maèkèleeziyà nyêyè awu, “kwenza cimfwànyì cifwànàngàne nendè.” Nwamònu anyi? Kusanga mangumba pámwè, ncikaadìbo bamanè kwenza. Kaa, tukàadi anu kundekeelu. Ki cyònsò cidiku's, mulunda wanyì. Tudi apa ku ndekeelu. Nwamònu anyi? “Twènzàayi cimfwànyì cya nyama wa lwonji,” cintu cifwànàngàne nendè. Cimfwànyì ncintu cifwànàngàne ne cintu kampànda. Nwamònu anyi? Mpindyewu tudi ku cikondo cya nshìikidilu.

125 Mpindyewu mònaayi emu nunku, kundekeelu kwa cikondo eci. Mpindyewu, Danyèlè, mu nshapità mwi2, ku mvensà—mvensà wa 34 ne wa 35, wàkatàngila lupingù elu ne ntèmà yònsò. Ne yêyè wàkalùtàngila too ne pàakalwà Dìbwe kutùuka ku mukùnà, kakùyi dyambulwisha dya byanza to, ne Dyàkabùnguluka ne kutuuta lupingù alu ku makàsà, ne kulùvingutula. Mpindyewu, kaDyàkalùtuutakù ku mutù to, mpindyewu. Dyàkalùtuuta ku makàsà; aci cìvwa ncikondo cya nshìikidilu, bâna bàà nkàsà dikumi abu.

126 Nukààvwakù bamòne, anu kaaba aka menemene, dyàkámwè kumpàlà kwa Eisenhower kupàtukayè, mwena Mishònyì wa ndekeelu wa... wa Amerike awu, ku diikala—ku diikala Mfumu wa ditùnga, bwalu ndi ngeela mpatà ne nekwikalakùt mukwabo's. Kadi—kadi pìikalà... anu bwa kuleeja cyòci aci, anu bwa bantu bàtabulukèku. Pààkenzàye ditwilangana adi, kùvwa... Cisangilu cya ndekeelu cìvwa (bòbò) cìvwaye mutwilàngàne ne Russie aci, kùvwa dileeja dya mpàlà dya matùngà ataanu a ku Esètè a ba-communistes, matùngà ataanu a ku Wesètè. Mukalenge Khrouchtchev nguvwa kumutù kwa matùngà a ku Esètè. Mukalenge Eisenhower nguvwa kumutù kwa matùngà a ku Wesètè. Nenku Khrouchtchev, mùndì ngumvwa bàmba ne mùdìbo bandondèle ne, mu mwakulu

wà cyena Russie, *Krushchev* mbwena kwamba ne “diima.” Ne *Eisenhower* mbwena kwamba ne “cyamu cifiike,” mu Anglais. Ki cyamu cyenu cifiike ne diima mbyôbi abi, kabyâkudisangakù to. Ki kukòpolayè cisâbaatà cyèndè ne kucituutayè pa mèèsà, ne bikwabo byònsò. Kabyâkudisangakù to.

127 Kadi mùvwa mmu matùkù a makalenge maalàbàle aa mùvwà Dibwe adi, Dibwe dyâkatùùkà ku mukùnà adi, kakùyì dyambulwisha dya byanza, kutuutadì lupìngù alu ku makàsà. Mpindyewu: “Dikùùke ku mukùnà.” Cìvwa ne cya kwikala mukùnà wà dibwe. Dyâkatùùka ku mukùnà wà dibwe. Mpindyewu, nukààvwakù bamòne anyi?

128 Mpindyewu, nwênù bambi naanyì, ne bânà beetu bàà balùme ne bàà bakàjì, pa buloba bujimà. Ku dyànyì dyumvwa, Bible wa kumpàlà wâkafündiibwa, Nzambi wâkamufùnda mu dyulu, bwalu bàdi ne cya kwikala bàtàngila muulu bwa kumòna ne kùtu—kùtukù Nzambi mu Dyulu, ne Nzambi awu ùtu kumutù kwabo. Ne nwênù bamòne mu cidiminanzaji...Mpindyewu nansha umwe wa kunùdi kùkadikù wàya...Shààlaayi anu ne Bible ewu. Nwamònu anyi? Kadi, ci—cidiminanzaji, ùdi ùbanga cya kumpla mu cidiminanzaji, mùndi mèmè ngumvwa ne, mvirgo; cya ndekeelu mu nombà wa cidiminanzaji cìdi n’Leo nyama wa Ntambwe. Aci n’Dilwa dya kumpàlà dya Kilisto, muvwile kùdi virgo; Dilwa diibidì, n’Ntambwe wa cisàmbà cya Yudà. Nwamònu anyi? Pashùshe tudi ne cikondo cya kànsèrè, ne, kabidi, mu cidiminanzaji amu.

129 Mpindyewu, tudi tusangana ne kùvwa mukwabo mufùnda, anyì mukwabo mutèèka, ne bìvwa mbipaapu bya musàkà. Nukààvwakù bamòne mu bipaapu bya musàkà, mwàkabangàci, cyalàbàle ku ntàku, cyenzè bu mukùnà, cyenza ne lubwwebwe lushindàme, cibànde muulu too ne mùdici cìkafika ku lusongo anyi? Kadi kacya kakùvwakù mùsongà mwasa pa cipaapu cya musàkà apu to, cipaapu cinènè cya musàkà mu Èjiipitù mwàmwa. Pàtulàku webè...Wèwè ne kabeji kàà ndola umwe mu mpaayà, pàtulà kabeji kàà ndola umwe aku kadi ùkàtàngilèbi, Nenku neùsanganè kaaba aka citampì cya Amerike ku luseke lùmwe, ne ku lukwabo luseke kùdi, lwà kwìnshì aku, cipaapu cya musàkà. Ne kuulu kwa cipaapu cya musàkà aku, dibwe dya mùsongà, kadi cìdi ndìsù dinene menemene. Ne cìdi cibìikidiibwa, kwìnshì kwa cipaapu cya musàkà eku ne: “Citampì cinène.” Mukankù wà Amerike kawèna citampì cinène bwa cinyi? S’ki citampì cya Nzambi. Vùlukààyi ne, tuvwa ne ciibidilu cya kwimba kaamusambu kakese ne:

Mu njila mujimà batàngile ku cisòmbedi
cilelèlè cya musùùkà,
Kùdi Dìsù dikujoaja;

Cidyà cyònsò cyûdi wela, Dîsù dinene edi
nditâbâle,
Kùdi Dîsù dikujooja.

Ncya bushuwa. Nudikù bavùlùke, patùvwà kale wàwa ne kaacibilù kakese—kakese kàà disànka apu anyì? Tuvwa twamba ne:

Wêwè wiba ne wiibila ne ushimangana, kadi
mu ekeleeziya ufila bujaadiki,
Kùdi Dîsù dikujooja.

¹³⁰ Mpindyewu, citampì cinène. Mpindyewu, tudi bamanyè, ne mèmè ncyèna ncyùmvwakù to, ciine cipimu cya cipaapu cya musàkà aci. Kadi ndi mufume ku dinwàmbila mu malongesha a ndekeelu, mu àmwè a ku malongesha atùdi bapetè aa, bwa nùmonè ne byònsò bìdi anu bitùngunuka, pàmwè.

¹³¹ Mpindyewu, cipaapu cya musàkà cyàkabanga, bwa kuleeja Ekeleeziya, cyalàbâle ku ntàku. Ne pàdìci cyènda cibànda ciseemena ku lusongo, cìdi cibanga kutàmba kulwa mu—mu mmwènekelu wa mùlôngojì.

¹³² Mpindyewu, tudi tusangana ne, cìdi cìfika buludì kumutù menemene kwa lusongo aku, kadi kabàakacìjikijakù to. Bwa cinyì? Bwa cinyì? Ntu ndìkonka ne mbwà cinyì! Bwalu Bible mmwambe ne Dibwe dya mùsongà dyàkabèngiibwa. Àkabèngiibwa.

¹³³ Mpindyewu tàngilàayi, cikondo cya ekeleeziya... Tèèlejàayaaku ne ntèmà mpindyewu. Eci kacinùpici to. Cikondo cya ekeleeziya ncyumùkile ku cibangidilu cya Dilongolola, Luther, mu bikondo bya kale byàbya mùvwà mabwe a cishimikidi matèèkiibwe, cìvwa dilongesha dya bapostolo aci. Pashìshe tudi tusangana ne, pàvwà bikondo byènda biya, kuumukila ku cikondo kuya ku cikwabo, Ekeleeziya ùvwa wènda ùtàmba kushààla mukèèpèlè dìbà dyònsò, too ne mùvwàye ùshààla mwenzè bu... Luther wàkayiisha dibingishiibwa. Cikondo aci, anu bwa kwikala cyanààna, kujikula anu ne udi mwena Kilisto, bàvwa bafwànyìne kukushebeya, matùkù a difwilà dya diitabuuja awu, bafwilè diitabuuja abu.

¹³⁴ Mpindyewu tudi tusangana ne, mu matùkù a Wesley, wêwè uvwa munsantu mubùnguluki wa mu malaba wêwè mujikùle Kilisto musangu awu, Méthodiste mupyamùpyà awu. Bantu bààkapàtuka muneemu emu pàakalwà Wesley muneemu, ne Asbury, kwenzabo masangisha muneemu mu Amerike, mvwa mbala bwalu bwabo bulonda, mùvwàbo bàenzela mu nzubu ya tùlaasà. Ekeleeziya yabo muneemu kayìyi mwa kubìitabilakù to. Kadi ndekeelu wa byònsò kufikabò too ne mùvwà Nyuma Mwìmpè ubàpwekela, ne bàvwa bàpòna panshì, ne bàvwa bàbàpòngolwela màyi, bàbèèla lupeepèlè ne cipeepudi, bèèla meeji ne mbafwè cipùukà. Ne mèmè mwine nkàatukù mubwelè mu masangisha àbò, munda mwa bidimu byànyi makumi ataanu

emu. Ne ngákabàmòna bàpòna panshì ku bwenzeji bwa Nyuma Mwimpè mushindu awu, ne biikàle bàbàasa màyi mwísù, ne bikwabo byònsò, ba-Méthodistes bàà kale bàà badìkàdile abu, kùkaadi bidimu byàbùngì. S'cìvwa ndikèngeshiibwa.

¹³⁵ Mpindyewu, pashiishe, paanyimà pàà cikondo aci cimanè kujika, cikondo cya Wesley, kwàkalwa cikondo cya beena Mpenta ne dibàtiiza dya Nyuma Mwimpè. Nwamònu's, nudi nwenda nwangata mbùngakeenu, dìbà dyònsò. Mpindyewu vùlukàayi ne, Dìbwe dya mùsongà adi kadìvwa dyanji kwikalapù to. Bwa cinyi? Bàvwa bàpèèsha Ekeleeziya mbùngakeenu anu mu yéyè menemene, anyì cipaapu cya musàkà mbùngakeenu bwa kukùmbananganaci ne Dìbwe dya mùsongà, kadì Dìbwe dya mùsonga kacya kadyàkalwakù to. Kaa, nudi bamòne mwaba wùndi, kí mmwòmò anyi?

¹³⁶ Mpindyewu, mudimu wà bwambi kuumukila ku Luther too ne ku ndekeelu wa Mpenta, mu banyàabanyà bàà menemene abu kuulu eku abu. . .Ki bwa cinyi Bukènkè bùdi bwamba kujìma, mu cikondo eci, pa kabala-matùkù pààpa, pa dizola adi. Ncikondo cya mpenta, cya mpenta; kí—kí mmangumba a beena Mpenta to, bwalu bóbò mbenzè anu menemene bu Laòdikiyà. Bóbò mbeena Laòdikiyà. Mbenzè bu beena Nikàlâwù, badìvwijè malongolodi.

Kadi Ekeleeziya mulelèlâ, pa buloba bujimà, ùkaadi mwangàte mbùngakeenu ne mukèpèpèle mu mushindu wà ne nkulwe mudimu wà bwambi munkaci Mwèndè, mufwànàngàne anu menemene ne mudimu wà bwambi wà Yesu Kilisto. Mpindyewu ncinyi cìdìbo naaci? Bàdi ne cintu cimana kwakaja. Mpindyewu cintu cìdì cìlondà ncinyi? Dìbwe dibèngiibwe, dya cipaapu cya musàkà edi, ditùuke ku mukùnà kakùyì cinyi? Kakùyì dyambulwisha dya byanza. Nzambi nguvwa muDitume. Nudi bacimòne anyi? [Disangisha didi dyàmba ne: "Amen."—Muf.] Dìdì dibèngiibwe adi, Dìbwe dibèngiibwe adi, didi mutù wà Eci; ki mutù, dibwe dya musongà. Ne Yéyè mene udibò babènge awu, munda mwa cikondo cya bàà Bisàmbà bya bendè, n'Kilisto. Ne Kilisto kàakakòshiibwa kadi kutèekiibwa apa bu mupinganyi, anyì mwànà wa Nzambi, anyì muntu kampànda wa mwánzù mutùmbùke mu ekeleeziya nansha. Yéyè ùdi Nyuma Mwimpè. Ne mùsongà wà cipaapu cya musàkà newikalè Kilisto wàlwa awu. Nudi bacimòne anyi? ["Amen."]

¹³⁷ Mpindyewu, mbwalu bàdi ne mbùngakeenu udi ukèngediibwa, (Nudi bamòne mwaba wùndi mupèèshe eci mbùngakeenu bu wa cipaapu cya musàkà, dijuuka dya bansantu anyi?) bènza lwendu lwà mìnòlòlòoci batàngile mu Butùmbi. Nudi mpindyewu nucyùmvwa anyi? [Disangisha didi dyàmba ne: "Amen."—Muf.] Kilisto, Dìbwe dya mùsongà, Dìbwe dibèngiibwe, Dìsù didi dìmòna byònsò, ùlwa anu menemene mùdì Bible mwambe. Ne Danyèlè mmwambe ne yéyè wàkatàngila cikondo cya bàà Bisàmbà bya bendè eci too

ne mwàkuumukà Dibwe ku mukùnà, òvwà kadiyi dikòsa ne byanza to. Kacya kabàtukù batèèke dibwe dya mùsongà pa cipaapu cya musàkà aci to. Kadyàkatùùdiibwa ne byanza bya muntu to. Cyanza cya Nzambi ncyàkatùùlà Dibwe adi. Nudi nucimòna anyi? [“Amen.”] Ne Dyàkenza cinyi? Dyàkatuuta lupìngù alu ne bukolè bwònsò ku makàsà, kulùvingutula, kulùshìya anu lupwishi. Aleluuyah! Cyàkenzekà ncinyi mu cikondo aci, ku dilwa dya Dibwe adi? Ekeleeziya wàkabànda mu Butùmbi, mu Dyambwibwa, bwalu aci cyàkajikija cipungu cya bàà Bisàmbà bya bendè. Nzambi ngwàkacìjikija, dilwa dya Dibwe adi.

138 Kale wàwa kùvwa kùlwa bantu kampànda mu ekeleeziya emu, muntu mulùme mukese ne mukàjèndè. Bàvwa bàngata Bible bàMutèèka panshi mwaba kampànda; ne bàvwa bàya, bènda bimba ne:

Kaa, ndi ngenda nkèba Dibwe òvwà dyènda
dibùnguluka mu Baabùlònà adi,
Dibùnguluka mu Baabùlònà... (Bàya eku
ne eku, bènda bàkèbangana ne Cyòci aci,
nwamònu's.)

Ngenda nkèba Dibwe dyàkalwà dyènda
dibùnguluka dibwela mu Baabùlònà adi.

139 S'ki Yèyè awu! Kilisto ki Dibwe adi. Yèyè kààkalediibwa kùdì muntu to. Wàkalediibwa kùdì Nzambi. NeÀlwe bwa kwangata Ekeleeziya udi mulediibwe cyàkàbìdì, ku Nyuma wa Nzambi, bwalu dikàndà dya Dibwe dya mùsongà adi didi dyèndakana mu Ekeleeziya mujimà, cyenzè bu cyamu cya cikòka bintu.

140 Ndi mvùluka pàmvwà kuntweku, mbandila cyenzedi cya byamu aci mwine musangu awu, kùvwàbò bàpeeya bintu byònsò abi. Nenku bisòtà byònsò bivwà mwaba awu abi, ne bòbò bàbikòmba. Dibwe dinene adi kulwadi kubyàngula, dibwe dinene dya cyamu cya nzembu adi, kubyànguladi byònsò bwalu òvwà dikòkiibwakù.

Bidi bikèngela bwa twètù kukòkiibwa kùdì Dibwe dya mùsongà adi. Dibwe dya mùsongà adi n'Nyuma Mwìmpè, Kilisto. Ne yònsò wa kutùdì ùdì ne dikòkiibwa kùdì Nyuma Mwìmpè. Pàdì Dibwe adi dituuta lupìngù, Ekeleeziya neàbuuke àye kùdìDi, wàlukila mu Butùmbi. NeÀngaciibwè muulu, mu Dyambwibwa dya bansantu, pààyàYe mu ditùkù adi.

141 Mpindyewu, tàngilàayi kùneeku. Tudi tusangana ne, beena Yudà bàdì mpindyewu bààlukila, kwènji bidimu bitwè ku makumi anaayi, cikondo pabwìpì ne cya mwomumwe ne cya bwena cyàkabàngatà bwa kuya too ne ku dibùtudiibwa dya ntempèlù. Mbibàngate pabwìpì ne bidimu makumi anaayi bwa kwalukila, too ne piibakàbo mukwabo ntempèlù. Nwamònu's,

tudi anu kundekeelu kwa njila mene. Ee, bàà Bisàmbà bya bendè bôbò . . .

¹⁴² Mpindyewu twàngatàayi . . . Tudi tumòna Ekeleeziya, dilwa dya Dibwe adi. Twàngatàayi cikondo cya ndekeelu eci. Tudi bacìlongè. Tudi tumòna mpindyewu. Ngeela meeji ne ndi ne bintu bifùnda mwab'ewu pa cyôci aci. Tùmonèbi, katanci kakese cyanàànà. “Nenku mfumu udi ne cya kulwa awu, udi mufwilakanyi ne Kilisto awu, neenzè cipungidi ne beena Yudà.” Nenku mu Danyèlè 7 . . . anyi—anyì 9.27. “Kadi munkaci mwa lumingu, bidimu bisatu ne cyàbibìdì cimwe, nyama wa lwonji neenzè cipungidi cyèndè . . .” Ndi—ndi muswe nye kafika ku cyôci aci, pashiishe ndambu, cipungidi aci. Tudi baswe kushiya . . . Ndi muswe kubangila apa mene mpindyewu.

¹⁴³ Cyônsò cya ku bikondo bya bàà Bisàmbà bya bendè ebi ncijaadikiibwe kakùyi kalèma kùdì mùsànjeelà wabò, ku mukenji, ne cìvwà mwa kwenzeka aci.

Cikondo eci *eci* cìvwà cikondo cya butùmbi.

Cikondo cyàkalondà, mbambe ne kùvwa mwa kwikala dilongesha dibìikidiibwa, anyi kùbwela cintu kampànda, cìbìikidiibwa ne, “maa—maalu mamba a beena Nikàlàwù.”

Pashiishe kulwakù, cintu cyàkalondà, too ne kushààlaci dilongesha.

Pashiishe kulwaci, dibàkà dya . . . ne ekeleeziya wa beena Nikàlàwù, ne dikèngesha dya bansantu. Byônsò byàkenzeka anu mushindu awu.

Twètù kulwa ku cyàkalondà, anu ndambu mukese menemene wa Bukènke kubangayè. “Udi ne kaadikàndà kakese, ne udi ne dìnà dya ne udi ne mwoyi, kadi pèèbè mufwe. Kànkamikà cyùkaadi naaci aci, bwa Nciikadi ngàlwa, kuumusha citèèkedi cya mwèndù.”

¹⁴⁴ Pashiishe kulwakù Wesley, paanyimà pàà aci, ne cyèndè cikondo. Twètù kumòna anu menemene cìvwà . . . cikondo cya Wesley, cyàkabilikiidibwa bishi? Cya Filadèlèfiyà. Cikondo—cikondo cya citàmbe bunene cya dinanga citùkaadiku bapetè, cikondo cya Filadèlèfiyà, cìvwà anu mu cikondo mene cya John Wesley amu.

Pàakuumukàyè, ki Mpenta kulwayè, ne aci cìvwà cya cìvùmvù.

Pashiishe tudi twalukila ne tusangana ne m'Mukenji wà mushindu kaayi wùvwà mwa kulwa kùdì beena Mpenta, ku ndekeelu.

Vùlukàayi ne, yônsò ùvwa ùlwa ku ndekeelu kwa cikondo. Pòlò Munsantu wàkalwa ku ndekeelu. Bakwabo bônsò bàakalwa ku ndekeelu, Irénée Munsantu ne bakwabo bônsò bàà kùdìbo. Cikondo cya umwe cìvwà citungunukila ku cya mukwabo,

bitentamangana, ne yêyè ùvwa ùcyàngata ne ùtùngunuka naaci too ne ku cikondo civwà cilondà. Nwamònu anyi?

¹⁴⁵ Mpindyewu, tudi tusangana ne, mu eci cikondo, mùdi mutooto, mutùdi naawù kwókù aku. Tùdi ne mutooto, mùsànjeelà. Tudi ne muntu kampànda, Mukenji ka—kampànda wùdi wùpàtuka bwa cikondo; kùdi cisàmbà bwa kuWùbènga; kùdi cisàmbà bwa kuWàkidila. Ne mùsànjeelà wa cikondo eci ùvwa ne cya kulwa mu bukole bwa Eliyà. Aci ncyà bushuwa. Ne yêyè ùvwa ne cya “Kwalujulula Diitabuuja dya bânà kùdi baataatù, kwaluja bàshààdìlè bàà mpenta, bàdi bashààle abu, ku Diitabuuja dilelèlè dya bapostolo.”

¹⁴⁶ Mpindyewu, Diitabuuja dilelèlè dya bapostolo, nwènu baCibalè mu Mukànda wà Byenzedi, nenùsanganè ne kakùvwakù musangu nansha wùmwe wùkaadiku muntu nansha umwe mubàtìiibwe, “mu dìnà dya ‘Taatù, Mwànà, Nyuma Mwìmpè’” to. Kakùvwakù nansha umwe wabò mummyaminyiibwe màyi to. Kakùvwakù nansha cimwe cya ku bintu bitùdi naabì leelu ewu, cibìikidiibwa ne Mpenta, cikaavwàku cyenzèke mwine musangu awu to. Bòbò bàvwa ne mamwèneshiibwa malelèlè, ne Nyuma wa Nzambi munkaci mwabo, uvwa kakùyi dipangila to Mwànà wa Nzambi mwikàle ùkwàta naabò mudimu.

Mwine muntu uvwa ne cya kulwa ewu, Mukenji ewu, eyowa’s wè, wùvwà ne cya kulwa awu, ùvwa ne cya kwikala mufwànàngàne ne Eliyà. Eliyà ùvwa ne cya kulwa misangu yisatu.

Mpindyewu wèwè udi wamba, ne: “Yone Mubàtìiji’s nguvwa muntu awu.” Bu nwènu mwa kumòna, Yesu wàkamba ne Yone Mubàtìiji nguvwa mùsànjeelà wa Maalàki 3, kàyi wa Maalàki 4 to. “Mònaayi, Ndi ntùma mùsànjeelà Wanyì kumpalà Kwànyì.” Ngeela meeji ne mu Maatàayi 11.6, mwaba kampànda mwòmù amu nenùcisanganè, Maatàayi nshapità wa 11.

¹⁴⁷ Mpindyewu, kadi mu matùkù a ndekeelu aa, kùdi ne cya kulwa Nyuma wa Eliyà munkaci mwa bantu, ne yêyè ùdi ne cya kwenza cintu anu cimwecimwe cyàkenzàbo kale wàwa aci. Ngiikàdìlù wendè ùvwa mwa kwikala anu umwèumwè awu, ngiikàdìlù wa Ekeleeziya. Ngiikàdìlù wa yêyè—yêyè muntu awu ùvwa mwa kwikala anu umwèumwè awu. Ne Mukenji wùdi wùpàtukà awu, ùteeta. . . Yêyè ùvwa mwa kukìnyibwa, kùdi bantu. Yêyè ùvwa mwa kukìna bakàjì, bàà ngiikàdìlù ya mibì abu’s, twamb’eku twamb’eku, bàà babì abu. Munangè myaba ya bipèelà; muntu wa cilunji cya cishintuluka, wa ùbinduluka dìbà dyònsò, mùvwà Eliyà, ne mùvwà ne Yone amu. Ne tudi bamòne cintu cyònsò eci cyènzeka. Pìikalàbì ne tudi bapetè Mukenji, s’tudi tumòna Kilisto mubèngiibwe. Bikèngela wìkalè wa ku bùmwe bwa ku malongolodi aa bwa cyanàànà kwèna mwa kubwelamù to. Pa nanku, Yêyè, Yêyè mmwimansha pambelu.

Nwamònu anyi? Kilisto kèna mwa kukwàta mudimu munkaci mwabo to.

“Wèwè udi mwena nganyi?”

“Mwena Kilisto.”

“Udi wa mu d̄ngumba kaayi?”

“Ncyèna nansha wa ku dimwe to.”

“Katwèna mwa kukwàta neebe mudimu to.”

¹⁴⁸ Nwamònu’s, Yèyè mmubèngiibwe. Cya bushuwa! Nwamònu’s, mubèngiibwe! Ki mwàkabèngiibwà kabidi Eliyà, ne ki mwàkabèngiibwà kabidi Yone. Kadi, ncinyi, byàkabàtácisha anyi? Byàkatácisha mukenji wàbò anyi? Bààkamba ne: “Kaa, nwènù bàà nshingu mitàndàbàlè nwé.” Bààkabàpòngolwelaci pambidi. Kabààkadyàngana mukana to. Bààkaya anu kumpàla. Ne Mukenji wà Nzambi newùtungunukè anu ne kuya, cidi ní nganyi ní nganyi mwambe nansha ciikàlè cinyi, nwamònu’s, too ne ku dikùmbana dya maalu ònsò, ne piikalà. . . cidi cimana kulongolola necipòngolodiibwè. Nenku tudi ku ndekeelu.

¹⁴⁹ Mpindyewu, tudi tusanganyiibwa mpindyewu, mu bidimu makumi anaayi bya dyalukila, kacya ku Mvità ya Kumpàla ya Buloba bujimà, nenku beena Yudà mbaalùkile mu buloba bwabo. Kacya Nzambi kàtukù mutàngile bwalu bwa Izaleela pàdiye kàyi mu buloba bwèndè to.

¹⁵⁰ Mpindyewu, nudi bavùlùke pàvwa beena Yudà bàalukila apu, beena Yudà bàà mu matunga makwabo abu, ne cikàndàkàndà cya *Look* cyàkafila kaabwalu kàà cyôci aci. Mêmè mvwakù mubalè kapese kàà cibèjibeji aku, cikàndàkàndà kampàndà cya maalu a ntèndeleeu, ne pàvwàbo. . . Ndèkè ayi kwikilayi bwa kwambula beena Yudà abu mu Iran mwàmwa. Kadi ncyèna mumanye ne bàvwa bònsò penyì to, bàvwa batangàlake anu cyànaàna.

Mpindyewu, ki beena Yudà balelèlè mbôbò abu, bàvwà kacya kabàyikù bapetè mpungà nansha mukese to. Mpindyewu, mwanèètù, ki binunu byenu lukàmà ne makumi anaayi ne binaayi mbyòbì abi. Patwàyà mu Bwàkabuulwibwà 11, nenùbàmònè. Yèyè mmwambe ne: “Kùdi bisàmbà dikumi ne bibidi (bya Gaadà), bisàmbà dikumi ne bibidi (bya Azèlèlè), bisàmbà dikumi ne bibidi (bya Lubènà), bisàmbà dikumi ne bibidi. . .” Ne bôbò bònsò abu bàvwà biimàne penyì? Pa Mukùnà wà Sinaayi. Beena Yudà, baalukile mu buloba bwabo, ki bôbò abu mwaba awu. Bàvwà ng’aba bàvwà kabàyi musùmbà wà beena mucimà bàà Wall Street aba nansha. To, mukalenge. Bàvwa mbeena Yudà bàà balelèlè abu.

¹⁵¹ Nenku laabi mukùlākàjì ewu pàvwàyè mwimane mwaba awu ne kumònayè ndèkè awu wikila, beena Yudà abu. Nudi bacibalè mu cikàndàkàndà amu. Bôbò bàcivwa anu

bàdima ne nkàsù ya mabaya. Kadi pàakamònàbo cintu aci ciikila kuntwaku, kabàakaseemenakù pabwipi naaci to. Laabi mukùlakàjì awu wàkiimana mwaba awu e kwambayè ne: “Vùlukàayi ne, mupròfeta wetù wàkamba ne: ‘Patwàlukilà ku buloba bwetu, netwàlukilè bambula pa mapwàpwà a mukankù.’”

Matùngà àkaadi àpanduluka, Izaleela nyewu
ùtàbuluka,
Bimanyinu byàkadyànjàlè bapròfeta kwamba.

Tukàadi mene anu pa kulenga lumingu lwà mwandamutekète alu bwabo bòbò.

¹⁵² Ndi ngeela meeji, mémè mwine ne, mwimàne mwaba awu, pàvwà Mwanèètù Pethrus mubàtùmìne tukàndà tukese twa Dipungila atu, ne kutùbalabò. Kwambabò ne: “Ee, cyòci ne m’Maasiyà, twànji—twànji tùMumònèbi wènza cimanyinu cya Mupròfeta aci; piikalàYe kàyi mufwe to, Ùdi ne mwoyi.” Kwambabò ne: “Yèyè mmubiike ku lufù; Ùdi ne mwoyi mu Ekeleeziya Wendè; twànji tùMumònèbi wènza cimanyinu cya Mupròfeta aci, nenku netùMwitàbùùjè.” Beena Yudà bòbò bàtu misangu yònsò anu biitabuujà. . . Bòbò mbamanyè ne Maasiyà awu ùvwa ne cya kwikala Mupròfeta.

¹⁵³ Nenku pàmvwà mwimàne kwa Mwanèètù Arganbright ditùkù adi, kwèndè kumbèlu aku, ne beena Yudà abu biimàne mwaba awu, kwambabò ne: “Wèwè lwàku anu kwetu kwàka, ku cisàmbà cyetu.”

¹⁵⁴ Mémè kwamba ne: “Bushuwa, nêngiikalè ne disànkà bwa kulwa.” Mémè kumbà kwangata dipàngadika, ne lùkàsà bu lwà ményi.

¹⁵⁵ Mémè kuya ku Caire, mu Èjiipitù. Dilòlò adi, pàngàakamònà ndèkè awu wikila mu Caire amu, cyàkamvùlwija bwalu abu. Nenku patwàkafikà kuntwaku, mvwa ne ticket wanyì ku cyanza bwa kuya ku Izaleela, bàvwa ne cya kutwilangana naanyi. Mvwa mwambe ne: “Ndàyaaku, nùsangishè ndambu wa binunu bya balombodi. Nùlwayi naabo mu cibandabanda mu mwaba kampànda, netùjandulè ne Yèyè ní ùcidi Mupròfeta. Amen. Ee, tùmonèbi cyènzàYè.” Kaa, aci’s cìvwa cibàtèekela anu ku dyùlù. Aci’s ki cìvwaò bàkèba. Bu bòbò mwa kumòna aci, bàvwa mwa kwitabuujà.

¹⁵⁶ Kadi cìngàakenzà ncinyi? Mémè kuya ku Caire aku, ne mémè kubanga kuya kuntwaku. Nkààvwa mumane kupeta ticket wanyì; kushàale tusunsa tutwè ku makumi abidi bwa kubùkilabò. Cintu kampànda kwambaCì ne: “Kí mpindyewu to. Lupànza lwà bubì, lwà bàà Bisàmbà bya bendè, kí ndwanji kuula to. Lwà beena Amòlà kí ndwanji kuula to. Umùshà mukòlò mu bwalu abu.” Mémè kudyàmbidila ne pàmwàpa mémè nguvwa mudifwànyikijile cyòci aci, ki mémè kuya kumfundu kwa ditanda adi ne kusambila. KwambaCì ne: “Umùshà mukòlò

mu bwalu abu bwa mpindyewu.” Dìbà adi ki mémè kwangata ticket wanyì awu e kuya múngà mwaba. Ncyàkaya to, bwalu dìbà kî ndyanjì kukùmbana to.

¹⁵⁷ Mpindyewu, ndìbà kaayi dyànyishilà Nzambi beena Yuda abu, bwa kubangulula Yè kutàngila bwalu bwabo, ncyèna mwa kunwàmbilaci to. Ncyèna mumanyè to. Muntu nansha umwe kî mmumanyè aci to. Kadi, tèèlejàayi, Izaleela piikalàye ùkaadi mu buloba bwèndè, byònsò’s bikaadi bilongolola. Mabwe ónsò àkaadi mangula, ne midimu ya dimyamina dya màyi, ne màyi, ne byònsò bitù Nzambi mulayè. Mbasangàne biinà bya màyi ne bikwabo muntwamu, ne misùlù minene ya yidipwekela, byenze ne ki mwaba wà mutàmbe kulengela wà kacya nwamòna’s. Bàkaadi biibàke cimenga muntwamu. Bàkaadi ne midimu ya dimyamina màyi. Bàdi ne ditùnga dya ditàmbe bwimpè bwa buloba bujimà, kuntwaku. Ne tudi basangàne, mu Mbù Mufwè mene amu ne, mùdi bintu bya mushindà, bipite búngì, bikùmbàne bwa kusùmba buloba bujimà. Nwamònu anyì?

¹⁵⁸ Byònsò mbimacile anu mu byanza byàbò bóbò. Mbafikè ku dicyènza bishi? Mbwalu mwoyi wà Hitler wàkapapishiibwa, mwoyi wà Mussolini wàkapapishiibwa, anu mwàkapapishiibwà mwoyi wa Pàlò amu, biikàle bàbàsàka bàbàaluja mu buloba abu. Ne munda mwa bidimu makumi anaayi ki kwalukilabò mu buloba abu eku. Mpindyewu’s ki bóbò abu basòmbe, bindile.

¹⁵⁹ Ekeleeziya wa bàà Bisàmbà bya bendè ùdi mu Laòdikiyà, ku ndekeelu kwa Cikondo cya Laòdikiyà. Bu... Beena Yuda bàkaadi mu buloba bwabo, bàkaadimù. Ne dipàmbuka dya bàà Bisàmbà bya bendè dikaadi dyanzèke. Ne twètù tudi ne Mfumu wa ditùnga mutùdi nendè emu. Tudi ne ditùnga dipandùlùkàngàne mutùdi naadi emu. Tudi ne maabòmbè a mushindà makùdika mu matanda. Tudi ne ekeleeziya udi wa civùmvù. Tudi ne Ekeleeziya, cisàmbà, cidi cidisangè pàmwè. Tudi ne mudimu wà bwambi wùdi wùkùmbananganà ne mudimu wà bwambi wà Yesu Kilisto, bwa kubàkula Dibwe adi pààlwàDi. Ncinyì cidi cishààle bwa kwenzekaci? S’ncifwànyine kwenzeka mu kasunsa kanà kònsò. Kî nkushààle kantu nansha kàmwè to. Tukàadi ku cikondo cya nshiikidilu. Kaa, butùmbi’s wè! Ncyèna mumanyè ní ngàpeta mushindu wà kubwela mu cyanga aci, anyì ncyàkupeta, kadi ndi muswe—muswe anu bwa kunùpeteshakù citùpà cyàci, nansha bishi.

¹⁶⁰ Tèèlejàayi, nudi...? Mbanganyì bàdiku mwa kumòna mpindyewu? Nudi bamòne mwaba wùdi Mufùndù wùjaadika ne mbingu makumi mwandamutekètè yìvwa mbidimu makumi anaayi ne citeema awu anyì? [Disangisha didi dyàmbe ne: “Amen.”—Muf.] Nudi bamòne mwaba wùdibi ne mbingu makumi asambombo ne yibidi yìvwa mbidimu nkàmà yinaayi ne makumi asatu ne binaayi awu anyì? Nudi bamòne mwaba wùdibi ne—ne mbingu makumi asambombo ne yibidi yìvwa—yìvwa—yìvwa...? Cìvwa ncinyì? Nkàmà mwandamukùlù ne... Bidimu

nkàmà yinaayi ne—ne makumi mwandamukùlù ne bisatu. Bidimu nkàmà yinaayi ne makumi mwandamukùlù ne bisatu too ne ku cikondo eci. Nudi bamòne mwaba wàkuumushiiwbà Mfumu anyi? Nwamònu's, nudi nwangata bidimu makumi anaayi bwa bôbô beena Yudà abu bwa ndekeelu wa byònsò kubwelabò mu mwaba wàbò, wàkambà Nzambi awu.

¹⁶¹ Tàngilàayi apa pàdì cikondo cya bàà Bisàmbà bya bendè cipicìle mu byònsò bitùdì bambè ne cívwa mwa kupicìla amu; mwaba awu, kí nne *twètù* mbàdì bambè ne cívwa mwa kupicìlamù to; cìdì Bible mwambè ne cívwa mwa kupicìlamù aci. Cìdì Bible mwambe ne cívwa mwa kupicìlamù aci, ncilwe buludì too ne ku cikondo cya ndekeelu eci; ne munda mwa bidimu makumi anaayi mmùdì beena Yudà abu munkaci mwa kwalukila apa, bàdìlongolola bwa Nzambi kwenzaYè anu menemene cyàkenzàYe apa nunku aci. Bààkapàtuka mushindu awu, ne bàdì bààlukìlamù mushindu awu. Nunku Izaleela ùkaadi mwalukile mu buloba bwèndè.

¹⁶² Mpindyewu, ndìbà kaayi dyàbangà Nzambi lumingu lwabo lwà ndekeelu alu? Ndìbà kaayi? S'dìdì mwa kwikala leelu ewu. S'dìdì mwa kwikala kumpàlà kwa dìbà kubweladi dilòlò edì. Nzambi ngwadyàmba. Dìbà dìikalàci, mémè ncyèna mumanyè to. Ndi pàànyì ndìkonka. Kadi nèntwalè cintu kampànda kaaba aka, mpindyewu, mu katanci kakese, ne ncyèna mumanyè ní nwaciitabuujà anyi kanwàkuciitabuujà. Kadi bikèngela n—n—ncyàmbè, nansha bìshi, ngeela meeji.

¹⁶³ Twètù tudi mu buloba bwetu. Beena Yudà bàkaadi mu buloba bwabo. Tukàadi ku ndekeelu kwa cikondo, badìlongòlòle bwa Dyambwibwa. Dyambwibwa dìdì dilwa, Ekeleeziya ùbànda, twètù twangaciibwa muulu bwa katwilangana Nendè mu mpeepèlè. Aci kaayi twètù bònsò tudi bamanyè. Dibwe dyàkatùùkà ku mukùnà adi, dìdì pabwìpì ne kulwa pa dìbà kanà dyònsò. Nunku pààlwàDi, Dìdì dyènza cinyi? Dìdì dìmányika cikondo cya bàà Bisàmbà bya bendè. Byònsò byàjiki, ne Nzambi ùdì wimányika anu kashidi ditàngila dya bwalu bwabo. “Ewu udi mukooyike àtungunukè ne kwikala mukooyike; ewu udi wa cijila àtungunukè ne kwikala wa cijila.” Nwamònu anyi? Dìbà adi cìdìYe wènza ncinyi? Ùdì wàngata Ekeleeziya Wendè, bàdì bùle tètè ne Nyuma Mwìmpè abu.

¹⁶⁴ “Mukooyike” awu nganyi? Ki virgo mukùtākàne awu ne aba bàdì bàjuukà bwa dilumbulwisha, lwà *emu* nunku. Netwàngatè aci pa karta kakwabo, patwàtùngunukà ne cyòci eci paanyimà, mwaba wùdiye ùlwa ku Cilumbulwidi cya Nkwasa Mutòoke ne mwikàle ne cya kulumbulwishiibwa kùdì bapikula. Pòlò mmutwàmbìle bwa katwikadi tuya ne cilumbu ku tubàdì to, bwalu bansantu mbààlumbulwishà buloba. Neya bushuwa. Tudi ku nshìkidilu, *apa*, mpindyewu. Eyo.

165 Kadi munkaci mwa lwine lumingu elu. . . Mpindyewu, ki makumi mwandamutekètè ngôwò aa. Mpindyewu, pìikalàbi ne yôyì eyi yìvwa anu menemene bidimu mwandamutekètè, lwônsò lwà ku mbingu ayi, ne twètù bamanè kwangata mbingu makumi asambombo ne citeema, díbà adi's tudi ne cikondo cya bàà Bisàmbà bya bendè, ne tudi bamanyè ne tudi ku ndekeelu wa cikondo cya bàà Bisàmbà bya bendè, díbà adi's nkushààle lumingu lukwabo lumwepele bwa beena Yudà. Ncya bushuwa anyi? Ne ayi yidi anu menemene bidimu mwandamutekètè. Pìikalàbi ne *eci* cìvwa mbidimu mwandamutekètè, *cyàcya* mbidimu mwandamutekètè, bwalu Yèyè wàkamba ne: “Kùdi mbingu makumi mwandamutekètè mikòsela cisàmbà cyebe.” Nanku tudi bamanyè ne tudi ne bidimu mwandamutekètè bwa beena Yudà. Aci ncilelèlà anyi? Mpindyewu cìtàngilaayaaku. Kwòkò lukonko, ndi muswe ndùmanyè. Nwamònu anyi?

166 Mpindyewu, nenku munkaci mwa lumingu, munkaci mwa lwine lumingu lwà beena Yudà elu's; nwamònu's, mbwena kwamba ne mbidimu—mbidimu bisatu ne cyàbìbìdì cimwe; mufwilakanyi ne Kilisto, mfumu awu, mfumu udi ne cya kulwa awu. Nenku nùvulukàayi ne, yèyè awu ùdi ùpàtukila mu Loomò, mwine mfumu udi ne cya kulwa awu. Nganyi mwine awu? Paapà kampànda. Mfumu munkaci mwa bantu, udi ne cya kulwa, nekùjuukè Pàlò kampànda udi kàyi mumanyè Yòzefù to.

167 Mpindyewu, nwênù beena Mishòònyì nudi nwamba ne: “Ee, mpindyewu, ki cyòci.” Kadi anjì indìlaayi kakese. Tudi tusangana ne beena Mishòònyì bàdi ne bulongolodi kampànda, bwènza nsangilu wa maèkèleeziyà, cimfwànyì cya nyama wa lwonji, ne biikàle anu bènda pàmwè naayi.

168 Ne tudi tusangana mwab'ewu ne beena Yudà mbabiikidìbwe bwa kubwela mu yèyè nsangilu ewu, (eyowa's, mukalenge), ne bôbò mbiitàbe. Ne Bible mmwambè ne mbiitàbe. Ne yèyè awu ùdi wènza naabo cipungidi.

Munkaci mwa lumingu lwà makumi mwandamutekètè, yèyè ùdi ùcishipa, mufwilakanyi ne Kilisto ùdi ùshipa cipungidi cyèndè aci ne beena Yudà, “cisàmbà cyebe.” Bwa cinyi?

Ne tudi tubala mu Bwàkabuulwibwà 11, ne: “Mémè nêntumè. . .” Ki 11 awu. Nukàadi nwenda nuseemena ku 19 mpindyewu. Bwa ne Yèyè neatumè baprófetà Bèndè babidi, ne bôbò nebàmbè ciprófetà mu ciine cikondo aci, ne pashiishe nebàfiikilè baprófetà aba munda ne nebàbàshebèye cya bushuwa. Mmwômò anyi? Ne mibidi yabo mifwe neyishaalè milàadika mu mùsèèsù wà nyuma wùdìbo bàbìikila ne n'Sodomà ne Gomòlà, mùvwà Mukalenge wetù mupoopèdìbwe pa nkùrusè amu, Yelusàlèmà. Mmwômò anyi? Ne yidi yishààla milàadikamù munda mwa matùkù asatu a mundaamuunyà ne a bufùku. Ne paanyimà pàà matùkù asatu a mundaamuunyà ne a bufùku, nyuma wa mwoyi neàbwelè munda mwabo, ne nebàbiishiibwè

ku lufù ne nebàye mu Butùmbi. Cyàdiikùmì cimwe cya cimenga cyàkapòna pa dībà adi. Mmwómò anyi? Nwamònu anyi? Ncinyi ciine aci? Munkaci mwa bidimu makumi mwandamutekète bya ndekeelu ebi.

¹⁶⁹ Pààbànda Ekeleeziya; dībà adi nsangilu awu, virgo mukùtākāne awu, ba-Méthodistes, ba-Baptistes, ba-Presbytériens, ne beena Mpenta bàà civùmvù abu, bōbō bōnsò bàdisangè mu nsangilu kampànda. Bōbō biine, s'bakaadi ne ndongolwelu wabò munene patùdi twakulangana apa. Nenku pènzàbo nanku, nebènzè cipungidi. Nenku, ee, mpindyewu, paapa mupyamùpyà utùdi nendè mpindyewu ewu mmuswe kubàbwejamù bōnsò. Kanwènaayikù mwa kumòna mùdi cintu aci cyènda cibànda buludì anyi? Yèyè neènzèpu muyiiki, ne neàbàbwejemù bōnsò, musangu wà nzànzànzà wà kacya kùkaadi nkàmà ne nkàmà ne nkàmà ya bidimu; bidimu cinunu, anyi bibidi, bìdici kacya kaciyikù cyanji kwenjiibwa to. Kadi mpindyewu yèyè neikalè ne cya kubàbwejamù, bōnsò pàmwè, ne kwenza nsangilu kampànda, mwikalà beena Yudà mwa kuciitabila. Kaa, ekelekele! Butùmbi's wè! Aleluuyah! Butùmbi bwikalè kùdi Nzambi wetù Udi ne mwoyi kashidi ne kashidi! S'ki bwalu mbwòbù abu! Mpindyewu, mwanèètù, s'mbipeepèle anu menemene, bipeepèle mu mushindu wà mwànà mukese mufwànyine kucyùmvwà. Nsangilu wa kubwejamù beena Yudà, ne beena Mishòònyì, ne beena Katolike awu, bōnsò pàmwè.

Nenku, vùlukàayi, bapròfetà babidi aba nebènzè cinyi pààlwàbo?

¹⁷⁰ Nyama wa lwonji ewu, mfumu wátangalaja bukolè bwa cisàmbà cya cijila ewu, cyènzàye ncinyi? Neàshipè cipungidi cyèndè aci naabò. Paanyimà pàà bidimu bisatu ne cyàbìbìdì cimwe, yèyè neàbèlè pambèlu. Mpindyewu, bantu bàdi bōbò bèlèla meeji ne awu n'communisme. Aci's cidi anu bwalu wèwè udi...Nyuma wa Nzambi kì mmwanji kukwambila to. Kè n'communisme to; nntèndeleele. Bible mmwambe ne: "Ncifwànyine kwikala cifwànàngāne menemene mu mushindu wà cifwànyine kuseeswisha ne Basungula mene bu ne bìvwà mwa kwenzeka." Yesu ngwákamba nanku awu. Nwamònu's, tukàadi ku ndekeelu.

¹⁷¹ Mpindyewu, bapròfetà babidi aba, cyènzàbo ncinyi? Mòsà ne Eliyà mbààjuukà mu cyalu. Nebàmbilè beena Yudà abu cilèmà cyabo. Nenku mu musumbà wà beena Yudà bàdi kuntwaku mpindyewu, bàdi ne cya kwenza binunu lukàmà ne makumi anaayi ne binaayi abu, Nzambi neàbàbiikidilè ku bapròfetà aba. Ncinyi aci? Nyuma wa Eliyà, uvwa pa Ekeleeziya wa bàà Bisàmbà bya bendè ewu awu, neàtungunukè buludì àkabwelè mu ekeleeziya wa beena Yudà awu, ùya anu buludì bwa kubùkila; ne Mòsà pàmwè nendè. Aleluuyah! Nudi nucyùmvwà anyi? Ne yèyè neàyiishè Mukenji wumwewumwe wà Mpenta awu, kùdi beena Yudà abu ne, bàakabènga Maasiyà. Amen!

Nudi nucyùmvwà anyì? Neciikalè Mukenji wà Mpenta anu wòwò wumwewumwe awu, wàbàyiishàbo kùdì beena Yudà aba. Kadi nebàkinè beena Yudà abu bibì be mu mushindu wà ne nebàbàshebeyè ne kubàshebeya. Ne bààkàkinyiibwà kùdì matùngà ònsò.

Kadi munkaci mwa lumingu, bwalu bààkajuula binunu lukàmà ne makumi anaayi ne binaayi, banene ne bàà bukole. . . Bàvwa ne Nyuma Mwimpè. Nenku, mwanèètù, wèwè udi wakula wamba bwa dyanza dya bishimà, bôbò's bààkabyènza. Bààkiimanyika maulu, ne kakwàkamata mvùla mu matùkù a cipròfetà cyabo to; bààkatuuta buloba ne bipùpù, misangu yònsò yìvwàbo baswe bwa kucyènza. Bààkafila bipùpù ne bintu bikwabo byònsò. Bôbò's nebàyoobeshè beena Loomò abu. Kadi, ndekeelu wa byònsò, nebàshebeyiibwè. Nzambi wetù n'Nzambi wa ùkwàcisha bwòwà pàdìYe ùkwàta cijì. Kadi vùlukàayi ne, aci mmu lumingu lwà makumi mwandamutekète alu, ne Ekeleeziya ùdì ùsanganyiibwà mu Butùmbi, amen, Didyà dya Dibanjì dìdì munkaci mwa kwenzeka. Eyowa!

¹⁷² Mpindyewu mònaayi. Mwaba awu ki wutùdì bamòne Mukàjì-musèla wàlukila mu Ntempèlù wa Bukalenge bwa bidimu cinunu apa nunku ku ndekeelu kwa cikondo cya beena Yudà, “mwela maanyi awu.” Ki Mubàki ulwàlwa ewu, mubànde pa kabalù katòòke; bôbò bàvwa bènda bàMulonda, pa tubalù tutòòke. *Kabalù*, “makolè.” Muvwàle cilàmbà citòòke; mashi, anyì, cinkutu cizabika mu mashi; bafunde pambidi Pèndè ne: “Dìyì dya Nzambi.” Yèyè ùvwa ùlwa bu Mucimunyi wa bukole, eyowa's, mukalenge, bwa kushikika Bukalenge bwa bidimu cinunu, kubwela mu Ntempèlù. Butùmbi's wè! Ki pàdìYe ùtwilangana ne binunu lukàmà ne makumi anaayi ne binaayi abi, mpindyewu, paanyima pàà lumingu lwà makumi mwandamutekète alu kaaba aka.

¹⁷³ Lumingu lwà makumi mwandamutekète, eci cìdì cyènzeka munda mwa lumingu lwà makumi mwandamutekète. Mu bisatu abi, munkaci mwàbì amu, yèyè ùdì ùcishipa, bwalu ùdì ùshebeya bapròfetà babidi bàà cyena mpenta abu, eyowa's, mukalenge, bàdì bàtuutà buloba abu.

Nenku, balùmyànà wa yààyà, Yèyè ùdì wèla ekeleeziya awu mulawu, ne Ùdì ùmwosha ne kapyà. Ne, mòna's, yèyè. . . Tudi tumusangana mwaba awu, nansha mene bendeshi nendè bàà màtù biimàne mànzàlànzàlà kwàka, bàmba ne: “Bakwètù wanyì, bakwètù wanyì, cimenga cya Loomò cìvwà kaciyi mwa kufwà cyàcya, cyàfiki ku ndekeelu waci munda mwa dìbà dimwe.” Cyàkashiyiibwà anu tusùnsukilà. Nzambi's mmumanyè mwa kwenza maalu. Ki umwe wa ku Banjelo kutàngila, kwamba ne: “Mona's, mashi a yònsò wàkafwìla diitabuujà dya Kilisto àkasanganyiibwà munda mwèndè,” bwa diseeswishangana dyèndè, ùpàtuka apa ne ùdyènza bulongolodi, ne wènza bintàkanyì bikwabo byònsò ebi, ne ùkooyisha ekeleeziya, ne

mubwejèmu bintu abi, ne mushebèyèshèbèye bwa diitabuujà biine bàvwà bàteeta kuCìtwa nyama ku mikolo ne kubipàtula abu.

¹⁷⁴ Butùmbi's wè! Kaa, ncyèna—ncyèna mumanyè to. Ndi—ndi—ndi ndyùmvwà anu ne ntungunukè ne lwendu's. Nwamònu anyi? Kanwènaayikù ne disànka bwa Bukènkè bwa Mwànà anyi, kwendela mu Bukènkè bwa Mwànà! Tudi penyi's, mwanèètù? Ku dībà dya ndekeelu's! Mbifwànyine kwenzeka, pa dībà kanà dyònsò. Tukààdikù's!

¹⁷⁵ Mu—Mukenji mmwambìibwe kùdi ekeleeziya wa ndekeelu, ekeleeziya udi mubènge Kilisto wendè awu. Beena Yudà bàkaadi mu buloba bwabo kùdi cipòòlò cya dībà, bidimu makumi anaayi. Cimenga cipyacipyà cībàkiibù. Mbindile cinyi? Maasiyà udi ne cya kulwa awu. Necyènzekè dībà kaayi? Ncyèna mumanyè. Pàtuutà Dibwe adi lupingù *elu*, Yèyè neikalè muyè; byònsò nebìikalè bijikè dībà adi.

¹⁷⁶ Mpindyewu mònaayi apa. Munkaci mwa lumingu, matùkù asatu ne cyàbìbìdì cimwe. . . bidimu bisatu ne cyàbìbìdì cimwe's wè, eyowa, yèyè ùdi ùshipa cipungidi ne ùlekeesha mulàmbù wà mashi ne mulàmbù. . . wìkalàbo bamanè kulongolola awu.

Bwalu, nebààlukile buludì ku dyamba ne: “Mpindyewu, tàngilàayi, nwènù bònsò nudi maèkèleeziyà. Nudi mwa kwanyishiibwa mu cimfwànyì cya nyama wa lwonji eci. Netùshaalè mu bwobùmwe. Netùumushè communisme. Netwàngatè anu communisme awu tùmwelè yònsò pambèlu.” Nwamònu anyi? Ne bòbò's bàdi mwa kucyènza. Nwamònu anyi? Ne nebàcyènzè's.

¹⁷⁷ Kadi tàngilàayi mpindyewu. Nenu kulongolola, ne kulongolola cyòci eci, dikuukwila ne mulàmbù wà bwàcyàbwàcyà nebyàlukilè mu cimenga piibakuludiibwà ntempèlù. Nenu mfumu wìkala ne cya kulwa munkaci mwa lumingu ewu, neàshipè cipungidi cyèndè ne neàlekeeshè milàmbù. Mbambe ne: “Yèyè neàtangalajè, neàbitangalajè.” Ne cyènzàye, necishaalè too ne ku dikùmbana dya maalù ònsò.

¹⁷⁸ Nenu mònaayi:

. . . *ditàmba kupaasalala dya* cinyangu bwa kuvwija kabùtù. . .

“Ditàmba kupaasalala dya cinyangu.” *Cinyangu* ncinyi? “Dikooyika.” Nwamònu anyi? “Kuvwija kabùtù,” ncinyi aci? “Kulekeesha.” Ditàmba kupaasalala dya *cikampànda*, kulekeesha *cikansanga*. Nwamònu anyi? Ditàmba kupaasalala dya bukolè bwa Loomò abu, bwa kukwàta virgo mikùtākàne yònsò, beena Yudà ne bònsò ku bukòòkeshi bwèndè. “Anyi netwìkalè bònsò beena Loomò anyi katwàkwìkala cintu nansha cimwe to.” Yèyè neàshipè cipungidi cyèndè munkaci mwa lumingu.

179 “Ditamba kupaasalala dya cinyangu.” Pùikalàbi ne cìvwa ncinyangu mu cikondu cya Yesu, pàakalwà Loomò kuntwaku ne dilàkà dyabo dya mukana adi, s’ neciikalè Loomò cyàkàbìdì, s’ neciikalè cinyangu cyàkàbìdì kùdì ekeleeziya.

. . . bwa kuvwija *kabùtù*, ne necitungunukè too ne ku *dikumbana dya maalu ónsò* . . .

Cyènzàye ncinyi? Yèyè neitungunukè naaci too ne ku dikumbana dya maalu ónsò, mbwena kwamba ne, ndekeelu.

180 Mpindyewu, cyena Yuda, ne cyena Loomò, cyena Mishònyì (mbwena kwamba ne, virgo mikùtākàne ayi), nebàdyènzè cimùkù mu mmwènekelu wa nsangilu wa maèkèleeziyà. Ne nebùikalè bu mwākambà Yesu mu Maatàayi 24, ne mu Bwākabuulwibwà 13.14.

Twàngatàayi Bwākabuulwibwà 13.14, tùmonebi ne ncinyi. Mvwa mucifunde kaaba aka, bwa kumòna ne ncinyi, 13.14. Eyo, mukalenge.

Ne wàkaseeswisha bònsò bàdì basòmbèle pa buloba ku bishimà bìvwàye ne bukolè bwa kwenza abi (wènzeja ekeleeziya eyi cimùkù’s) ku mèsù. . . wàmba. . . ku mèsù kwa nyama wa lwonji; wàmbila bàdì basòmbèle pa buloba ne, bàvwa ne cya kwenza cimfwànyì cya nyama wa lwonji, yèyè uvwa ne mpùtà wa lufù wa ku mwele wà mvità, ne uvwa ne mwoyi awu.

181 Mpindyewu, kakùyì mpatà nansha mikese to, tudi bamanyè ne, nyama wa lwonji awu uvwà nganyì, bukolè bìvwà ne mpùtà wa lufù bwākashààlà ne mwoyi abu. Mpàakashebeyiibwà Loomò wa cimpàngaanù, kadi Loomò wa ciipaapà kwangatayè kaaba kèndè; pàakashebeyiibwà bukolè bwa cimpàngaanù, kadi bukolè bwa ciipaapà kwangatabù kaaba kààbù;

182 Mpindyewu, mpindyewu, Bwākabuulwibwà 13.14. Yesu, mu Maatàayi 24, wàkabàdimwija pa bwalu abu. “Cimfwànyì cya nyama wa lwonji.”

183 Pòlò, mu Tesàlònìkà Mwibìdì nshapità mwi2, ku mvensà mwi3 ne mwi4. Tùmwangàtaayi, tùmonebi Pòlò, cidìye wàmba pa bwalu abu kaaba aka. Nyuma Mwìmpè munene awu pambidi pàà mupròfeta munene wa Mukalenge ewu, tùmonaàyibì cidìye mwambe pa bwalu abu mu ditùkù dya ndekeelu. Mu Tesàlònìkà Mwibìdì nshapità mwi2 ki mùdici. Eyo, mukalenge. Nenku túbangè ne mvensà mwi3, ngeela meeji ne nyèyè. Eyo, túbalàayaaku mpindyewu. Tèelejàayi ne ntèmà yònsò, bantu bònsò. Mbanganì bàdiku bìtabuuja ne Pòlò úvwa mùle tètè ne Nyuma Mwìmpè? Amen. Tàngilàayi kaaba aka.

Muntu nansha umwe kànùseeswishiku to nansha bya munyi; bwalu ditùkù adi kadyàkulwa to, pàdì dipàmbuka kadiyi dyanji kulwa dyàmbedi, . . .

Ùdi ùteeta kubùùmushaci mu mitù ne Yèyè ùvwa ùlwa pa dībà adi mene. Kwambayè ne: “Bidi bikèngela kwànji kulwa dipàmbuka ku Ekeleeziya, dyàmbedi,” nwamònu’s, dilwa mu Cìkondo cya Laòdikìyà eci.

. . . *ne muntu wa mpekaatu awu àsokolodiibwè, . . .*

“Muntu wa mpekaatu,” bupidyà ku Nyuma Mwîmpè. Bupidyà búsokolodiibwè.

. . . *mwànà wa dibùtuka,*

Mùvwà Yudààsà amu’s, mulami wa cibùcilu cya ekeleeziya.

Udi ulwisha ne ùdizàngika yèyè mwine kumutù kwa cyònsò cidìbo bàbùikila ne Nzambi, anyi cidìbo bàkuukwila, mu mushindu wà ne yèyè bu Nzambi ùdi ùsòmba mu ntempèlù wa Nzambi, . . .

Mwanèètù, kùdikù muntu pa buloba apa, pa kuumusha mu Vatican, udi wenza aci anyi? Cìdi penyì?

¹⁸⁴ Mpindyewu, ndààyaaku mu Bwàkabuulwibwà 13 emu, nenku necikuleejè ne muntu awu mmusòmbe pa cimenga. . . mu cimenga kampànda, ne ciine cimenga aci ncishikika pa—pa tukùnà mwandamutekète. Ne nombà wa nyama wa lwonji ùdi nkàmà yisambombo ne makumi asambombo ne yisambombo, mufùnda mu—mu Latin. . . màleetà a cyena Loomò, àdi nkàmà yisambombo ne makumi asambombo ne yisambombo awu, àdi *VICARIVS FILII DEI*, mbwena kwamba ne: “Pa kaaba kàà Mwànà wa Nzambi,” pa nkwasà wa butùmbi wa paapà. Ne nkwasà wendè awu, ùdi ne cifuku cya butùmbi cya ntòndo yisatu. Ne mèmè nkààdikù mujoojè cifulu cya butùmbi aci, mwimanyìne pabwìpi menemene anu mùdi cyanza cyànyì pabwìpi ne mpàla wanyì emu, nunku ewu, ne—ne mèmè kumòna cifulu cya butùmbi cilengeja cya paapà aci anu mu Vatican mene amu, mèmè mwine, mwimane ncijooja, bwa ngiikalè mutwishibwe ne ndi mumanyè cìmvwà ngamba aci. “Yèyè ùdi ùlwisha, yèyè mwine kumutù kwa cyònsò cidìbo bàbùikila ne Nzambi aci, bantu bònsò bàà difwànà dya Nzambi abu. Yèyè ki udi mutàmbe bunsantu ku bònsò abu; musòmbe mu ntempèlù wa Nzambi, ùdileeja anu ne yèyè ki Nzambi,” ùfwilangana luse ku mpekaatu pa buloba, ne bikwabo, nudi bamanyè’s. Bushuwa.

¹⁸⁵ Pòlò mmwambe ne: “Bikèngela dipàmbuka adi dyànji kulwa dyàmbedi, mwànà wa dibùtuka awu àsokolodiibwè.”

Kanwèna bavùlùke, ne, pàncìvwà. . . neenù, mvwa nvwàmbila maalu aa anyi?

¹⁸⁶ Kaa, mvwakù mwa kujinga kwikala musòmbe mwaba awu, ntèeleja Pòlò ùyiisha cyòci aci’s kadi nwènù? Hmm! Mushindu mwine wùndi njinga kumutèeleja’s wè! Kaa, ekelekele!

¹⁸⁷ Mpindyewu, cyènzàye ncinyi? “Cimfwànì cya nyama wa lwonji.” Tesàlònìkà Mwibidì. Mpindyewu tèelejàayi. Tèelejàayi ne ntèmà mpindyewu, ne ntèmà yònsò. Ekeleeziya ùkaavwa

mumanè kwikala ùmvwa dilwa dya paapà adi. Ncinyi aci? Ndekeelu wa cikondo cya ekeleeziya aci, Pòlò. Bààkamòna cintu cya beena Nikàlàwu eci cijuuuka; bàvwa bàswa kwenza muntu munsantu, (ku cinyi?) paapà. Ngiikàdilù ya maalu a pa buloba ne bantu bàà bipidi bitùmbùke bàkaavwa badifindè mu ekeleeziya, ne bàshintulula ndongamu wa dikuukwila. Pòlò, mwikàle ne Nyuma Mwîmpè, ùkaavwa muumvwè aci mu Nyuma. Neku ekeleeziya, ne bipidi byèndè ne bantu bàà myânzù mitùmbùke, bantu bavwijìbwe bàà myânzù mitùmbùke, ne bikwabo, mwàkamònàbo ne kùvwa kùlwa cintu kampànda. Kadi Nyuma Mwîmpè ùvwa ùbàdìmwija bwa matùkù a ndekeelu. Kanwènaayikù bavùlùke mwàkambà Yesu bwalu abu anyi? Byenzedi bya beena Nikàlàwù, ndekeelu wa byònsò kulwabi dilongesha, ne pashiishe kulwaci bulongolodi! Bânà beetu, katwèna mu mîdimà mpindyewu nansha. Vùlukàayi, nwamònu's. S'ki twètù aba.

¹⁸⁸ Byenzedi bya beena Nikàlàwù, bulongolodi bwikàle bùbanga, bantu banene bàà myânzù mitùmbùke, biikàle kumutù kwa maèkèleeziyà, ne bikwabo, pashiishe kwenzabo ekeleeziya wa Katolike. Neku Pòlò kwambayè ne kakwèna mwa kulwa cikondo cya nshìikidilu, kakwèna mwa kulwa cikondo, pàdiku kakùyi dipàmbuka dya ku Diitabuuja dilelèlè, dya mpenta to. Diitabuuja dya mpenta nedyùmushiibwè, ne bantu bàà myânzù mitùmbùke nebàbwelèmu. Nebiikalè ne muntu wàngata kaaba kàà Nzambi, wasòmba mu ntempèlù wa Nzambi, ne wàlwisha, ùdizàngika yèyè mwine kumutù kwa bantu bònsò mushindu awu. Neku, aci, nwamònu's, ncinyi? *Nickao*, “kucimuna beena kwitabuuja.” Nwamònu anyi? “Cyònsò cidìbo bàbiikila ne Nzambi; neàsòmbè mu ntempèlù wendè wa Nzambi, bu Nzambi.” Pòlò wàkamba ne kùvwa mwa kwanji kulwa dipàmbuka dyàmbedi, mu matùkù a ndekeelu. Neku's ki twètù aba, mwab'ewu mene mpindyewu, ne tumòna diine dipàmbuka adi, ne biikàle tumòna mùdì ekeleeziya wènda ùtamba kusemena kule naaCì, ne wàlukila cyàkàbìdì cyànyimà. Neku tukàadi ku cikondo cya nshìikidilu. Eyo.

¹⁸⁹ Mpindyewu, piikalàbi ne mbingu makumi asambombo ne citeema mmikùmbànàngàne anu menemene, ne beena Yudà biikàle mu buloba bwabo mpindyewu, ne cikondo cya ekeleeziya wa bàà Bisàmbà bya bendè cikùmbànàngàne anu menemene ku cikondo cya nshìikidilu, ku cikondo cya beena Nikàlàwù. . . anyi ku cikondo cya beena Làodikiyà; Dilwa dya Mukalenge, ndekeelu wa bintu byònsò, ndekeelu wa cikondo eci ne Dyambwibwa, bidi pabwìpì pàà mushindu kaayi? Dìbà didìYe ùbanga lumingu lwà makumi mwandamutekète alu, anyi bidimu mwandamutekète abi, Ekeleeziya mmumane kuya.

¹⁹⁰ Nudikù mwa kucimòna anyi, balundà bàanyi? Ela cyanza muulu ní udi mwa kucimòna. Nwamònu anyi? Mpindyewu, katwikadikù bânà batekète to. Katwikadikù kabidi tunàya

to. Tukààdi ku cikondo cya nshìikidilu. Cintu kampànda cidi pabwipi ne kwenzeka. Tukààdi ku ndekeelu. S'ki twètù aba.

¹⁹¹ Mbingu makumi asambombo ne citeema eyi mmikumbànàngàne anu menemene; diya dya beena Yudà ndikumbànàngàne anu menemene; cikondo cya ekeleeziya ncikumbànàngàne anu menemene. Tukààdi ku cikondo cya nshìikidilu, cikondo cya nshìikidilu, cikondo cya ekeleeziya wa Laòdikiyà, ku ndekeelu kwàci. Misànjeelà-mitootò ayi yònsò yikaadi mimanè kuyiisha mikenji yàyì. Wùkaadi mwambiibwe. Tukààdi anu mu mpulumuku. Bidimu makumi anaayi mbyòbì ebi bidi beena Yudà munkaci mwa kwalukila. Bàkaadi mu buloba bwabo.

Cidi cilondà ncinyi ciikàlà ne cya kwenzeka? Dilwa dya Dibwe adi. S'ki bwalu mbwòbù abu. Ncyènzekè díbà kaayi? Ncyèna mumanye to. Kadi, mwanèètù, bwànyì mèmè, ndi muswe kwikala mudilongòlòle. Ndi muswe kwikala ne bilàmbà byànyì bimana kulongolola byònsò.

¹⁹² Mpindyewu, tudi anu ne—anu ne tusunsa tukese menemene, kadi ndi njinga bwa nùteelejèku ne ditalala dyònsò mpindyewu bwa katanci kakese cyaààà.

Dìbà dìdìYe ùbanga lumingu lwà makumi mwandamutekète alu, anyì bidimu mwandamutekète abi, Ekeleeziya mmumane kuya. Tèelejààyaaku mpindyewu. Ndi ntèèla cyàkabìdi, ntèèlulula, bwa kanùpu mwoyi to. Eci neidi Nyuma Mwìmpè mutèeke pa kasàlà kàànyì pámvwà mfùnda apu. Tudi mu cikondo cya Laòdikiyà. Kilisto ùdi munkaci mwa kubèngiibwa kùdi ekeleeziya Wendè Sungasunga. Mùtootò wà eci cikondo, Mukenji, mmumana kwamba. Ne Izaleela ùdi mu buloba bwèndè. Nudi bamòne kutùkaadi anyi? Tukààdi ku ndekeelu.

Mpindyewu, anu kaadìyi kàmwè anyi tukwabo tubidi bwa dyela nsèkà.

¹⁹³ Byònsò bitùdi mpindyewu tumòna ebi, nebitwàmbùlwishè, ku ngàsà Wendè, patùdi tudyenzeja bwa kulenga Bitampì Mwandamutekète bya ndekeelu ebi. Nudi numòna mwaba wùdìbi bifwànyine kwikala bitùpicile anyi? Kuumukila ku Bwàkabuulwibwà 6.1 too ne ku Bwàkabuulwibwà 19.21, ncifwànyine kwikala citùpìte, bwalu, nwamònu's, tuvwa bafwànyine kwikala tuteeta kucyàngata bwa kale wàwa, mu cikondo cya bàà Bisàmbà bya bendè eci; pààbì, nudi numòna's, cidi mu eci cikondo. Nwamònu anyi?

Mpindyewu, twacijaadikìdi ku Dìyi dya Nzambì, ne ku maalu-malonda, ne ku bintu byònsò, ne ku bimanyinu bya bikondo, ku matùkù ne, kí nkushààle cintu nansha cimwe to. Tukààdi ku dikumbana dya maalu ònsò dya bàà Bisàmbà bya bendè. Citwènza ncinyi—ncinyi pa bwalu abu? Mmusùkà wànyì ne musùkà wèbè; mmwoyi wànyì ne mwoyi wèbè; mmyoyi ya bananga bèètù. Mbatàmbe kutwèngeleka be. Tudi bapetépète

maalu matàmbe kupeepela. Mbîmpè bwa tûyaayi kumpàla. Dìbà dikaadi diyè bikolè kutàmbe munùdi nwènù nwela meeji amu, vùlukàayi anu cyanàànà.

¹⁹⁴ Mpindyewu, dìyi dya dipapulungana, panwikalà baswe kudifùnda. Tèelejàayi ne ntèmà, bu nwènù mwa kuswà. Edi ndiayi dyànyi dya ndekeelu dya dyela nsèkà, dya kumpàlà kwa kwa dyòdi adi's; ndi ne kaacintu kakese menemene kaaba aka paanyimà pàà aka nunku, kantu kakese kafùnda kàndi muswe kwamba. Mpindyewu tùùkijàayi anu kakese cyanàànà nùteelejè ne ntèmà, ndi nnùpèèsha cintu kampàndà cya cinùpapula, bwa kubwela buludì mu eci. Nwamònu anyi?

Kakwènakù nansha mpùngà wa bunene bwa mupimbu wà keelè pankaci pàà ndekeelu wa cikondo eci ne Dilwa dya Kilisto to. Byònsò, kí nkushààle cintu nansha cimwe to. Izaleela ùkaadi mu buloba bwèndè anyi? Aci's tudi bamanyè. [Disangisha didi dyàmbe ne: "Amen."—Muf.] Tudi mu Cikondo cya Laòdikiyà anyi? ["Amen."] Mukenji wa cikondo eci cya mpenta wùkaadi mwambiùbwe, bwa kutèeta bwa kunyùkusha bantu bwa kubàaluja ku Dibeneshà dya mpenta dya ku cibangidilu anyi? ["Amen."] Mùsànjeelà yònsò ùkaadi mulwe mu cikondo cyèndè, anu cintu cimwecimwe aci anyi? ["Amen."] Matùngà àdi àlwisha matùngà naawu anyi? ["Amen."] Cikupi anyi? Kùdikù ciyòòlè cya nzala mu ditùnga leelu ewu, Ekeleeziya mulelèlè wèndesha màshinyi nkàmà ya kilòmèètà bènda bàkèba bwa kuumvwa Dìyi dya Nzambi anyi? ["Amen."] "Kaciyi cya dyàmpà nkààyaadi to, kadi cya kuumvwa Dìyi dya Nzambi." Nkulwè ciyòòlè cya nzala. Neya bushuwa anyi? ["Amen."] Mòna's, tudi ne mwoyi anu munkaci mwàci menemene, mwab'ewu mene patùdi twakulungana apa. Nudi bamòne kutùkaadi anyi? Tudi bindile Dibwe adi.

¹⁹⁵ Dìyi dya dipapulungana's! Kuumukila anu ku cikondo cyàkenzelà Nzambi Abraham mulayi... Eci kacinùpici to. Kuumukila anu ku cikondo cyàkenzelà Nzambi Abraham mulayi, Genese 12.3, too ne ku cikondo cyàkabèngiibwà Kilisto mu cidimu cya 33 cya bikondo byetu ebi, kùdi beena Yudà; bilondèshile Ngalàtiyà 3.16 ne 17, ne bilondèshile dilondangana dya maalu a bikondo dya beena Ebèlù dya Usher, dya U-s-h-e-r, dya Usher; bukole bwa Nzambi bùvwa ne beena Yudà munda mwa bidimu cinunu ne nkàmà citeema ne makumi ataanu ne binaayi bulubulu. Nzambi wàkatàngila bwalu bwa beena Yudà bidimu cinunu ne nkàmà citeema ne makumi ataanu ne binaayi, bilondèshile dilondangana dya maalu a bikondo dya beena Yudà, ne bilondèshile Ngalàtiyà 3.16 ne 17. Ndi ne mikwabo Mifùndu yàbùngì, kadi ndi mfilà anu yòyi ayi.

Pashìishe, paanyimà pàà bóbò bamanè kubènga Kilisto, Yèyè wàkakùdimukila kùdi bàà Bisàmbà bya bendè, bwa kwangata cisàmbà bwa Dìna Dyèndè. Nudi baswè Mufùndù pa cyòci aci, mwaba wùdici anyi? Byenzedi 15.14.

196 Mpindyewu, patùdì twenza makumi, tudi tusangana ne tudi anu menemene (tèelejàayi) ne bidimu dikumi ne mwandamutekètè bìdì bishààle, ne netwikalè ne cipòòlò cya dībà anu cimwecimwe aci citùdì bapèèshìibwe, pàdì Nzambi ùtàngila bwalu bwetu mu bukolè bwa Nyuma Mwimpè apa, kuumukila ku cidimu cya 33 too ne mu 1977. Cipòòlò cya dībà anu cimwecimwe aci, cya bidimu cinunu ne nkàmà citeema ne makumi ataanu ne binaayi, Nzambi ùdì ùtàngila bwalu bwetu mushindu wumwewumwe wàkatàngilàYe bwa beena Yudà awu. Bwa aci nudi nwamba bìshi?

197 Mpindyewu, fùndaaku mu kàlipé keebe amu, Mufùndù mukese mwab'ewu wùndì muswe kunùpèèsha ewu. Lewitiki 25, kubangila ku mvensà wa 8. Nzambi wàkeela díyì dya cibilù cya disànka, bidimu makumi anaayi ne citeema byònsò. Cidimu cya makumi ataanu civwa ncibilù cya disànka. Tudi bamanyè nanku. Mmutùdì tuumvwa nanku. Kuumukila ku cibilù cya disànka cya kumpàla, cya mu Lewitiki 25.8 aci, mu 1977 ki mwikalà cibilù cya disànka cya makumi mwandamutekète, byènza anu bidimu binunu bisatu ne nkàmà yinaayi ne makumi asatu bulubulu. *Cibilù cya disànka*, mbwena kwamba ne: “Dibànda! Dilekelela!”

Kaa, tudi bindile dilwa dya Ditùkù dya disànka dya Bukalenge bwa bidimu cinunu adi,
 Dyàlwà Mukalenge wetù mubènèshìibwe awu bwa kwangata Mukàj'Endè-musèla;
 Kaa, buloba bùdì bùtwa mikèmu, bwèla mbilà bwa ditùkù adi dya diikisha dya kalolo,
 Dyàlukilà cyàkàbìdì Musùngidi wetù pa buloba.

198 Nuumvù aci anyi? [Disangisha didi dyàmba ne: “Amen.”—Muf.] Nzambi mmutàngile bwalu bwetu cikondo bungi anu bumwebumwe bùdìYe mutàngile bwalu bwa beena Yudà abu. Kuumukila ku cikondo cyàkapèèshàYe Abraham mulayi aci, too ne ku dibèngiibwa dya Maasiyà mu cidimu cya 33 cya bikondo byetu ebi, kùvwa bidimu cinunu ne nkàmà citeema ne makumi ataanu ne binaayi. Nenku patùdì twakulangana apa nkutùshààdile bidimu dikumi ne mwandamutekète. Tuvwa ne bidimu bitwè ku cinunu ne nkàmà citeema ne makumi asatu ne bya mu njila. Nkutùshààdile bidimu dikumi ne mwandamutekète, too ne mu cidimu cya '77, necùikalè cibilù cya disànka cya makumi mwandamutekète kacya anu ku ntwàdijilu wa bibilù bya disànka. Nenku necùikalè cinyi? Kaa, mwanèètù! Tèelejàayi ne ntèmà mpindyewu. Kacinùpici to. Necùikalè cibilù cya disànka cya dibànda dya Mukàjì-musèla wa bàà Bisàmbà bya bendè, ne dyalukila dya Kilisto kùdì beena Yudà, pàapàtukàbo mu bupika. Amen! Kanwènaayikù numòna anyi? Buumùkile pa buloba bujimà, mbakùngwile kuntwaku

bwa ditùkù adi. Kaa, ekelekele! Nudi bamòne kutùkaadi anyi? Katwèna bamanyè ne necyènzekè dibà kaayi to. Tudi ku cikondo cya nshìikidilu.

¹⁹⁹ Mpindyewu tèèlejàayi. Bwenu nwènù beena kale bàdi mu—mu ekeleeziya emu, bàdi kaaba aka kùkaadi ntàntà mule abu, ndi muswe bwa nùmonèku cintu kampànda. Ncìvwakù muyiilè cyôci eci to too ne makèèlèla awu; ndi mucyàngùle kùdi mufùndi wa maalu-malonda, Paul Boyd, ne pashiishe. . . Ne mèmè ndi mucilondèshìle mu Mifùndu, mwangùle matùkù makwabo a ngondo aa kaaba aka, ne bikwabo, ne mubyàngàte, ne mubikèbùlùle, mubilondèshe too ne ku ndekeelu.

²⁰⁰ Mpindyewu, mu cidimu cya 1933, patùvwà munkaci mwa kukuukwila mu Masonic Temple emu, mwaba wùdi église de Christ úsanganyiibwa leelu ewu ewu, mu dinda kampànda dya ngondo mwinàyi, kumpàlà kwa kuumuka kumbelu, mwawa ndàmbula kàshinyi kàanyi (Mvwa mupetè kàshinyi kàà modèle '33, ne mvwa munkaci mwa kukàlambula ku mudimu wà Mukalenge.), ki mu cikèènà-kumòna, mèmè kumòna cikondo cya nshìikidilu (Mpindyewu mònaayi mùdi bwalu ebu bùkòka ntèmà, kuntwaku pàncìvwà anu mwàna apu, ne nudi mwa kudifwànyikijila mmwènekèlu uvwa kàshinyi kàà modèle 1933 mwa kwikala nendè, mpindyewu, mmwènekèlu uvwakù mwa kwikala nendè.), nenku mèmè kuya ku Masonic Temple aku, kùvwà, bàmwè bàà kunùdi nwènù beena kale kaaba aka mbavùlùke, ncifùnda pa dibèji dya kale kumbèlu, cikaadi cimana kutuuta ku màshinyi ne ciyè pa buloba bujimà, nwamònu's, mùvwa mmu cidimu cya 1933, ne mèmè kudyànjila kwamba ne kùvwa mwa kwikala bwalu bunene kampànda bwa bwènza dibungama bwènzekela États-Unis ewu kumpàla, anyi, patwàmbà kufika mu cidimu cya 1977. Mbanganyi bàdiku bavùlùke pàngàakambà cyôci aci? Tàngilàayi byanza. Bushuwa's.

²⁰¹ Tàngilàayi mpindyewu, mèmè kudyànjila kwamba bintu mwandamutekètè bicìvwà munkaci mwa. . . kumpàlà kwa dikumbana dinene dya maalu ònsò edi anyi cintu cinène cìvwà mwa kwenzeka muneemu mu États-Unis, cintu cinène kampànda cya cikwàcisha bwòwà.

Mèmè kwamba, mpindyewu vùlukàayi ne, eci cìvwa nkumpàlà kwa kubangaci, mèmè kwamba ne tuvwa mwa kubwèla mu Mvità Miibìdi ya Buloba bujimà. Mbanganyi bàdi bavùlùke ne ngàkacyàmba? Ambàayi ne: "Amen." [Disangisha didi dyàmba ne: "Amen."—Muf.] Eyo. Mvità Miibìdi ya Buloba bujimà! Mèmè kwamba ne: "Mfumu wa ditùnga udikù mpindyewu ewu ùdi. . ." Ndi mutentùle eci mu Mufùndu wà kale, wùcidiku ne leelu awu, cintu cya kale aci makèèlèla awu, ne: "Mfumu wa ditùnga utùdi nendè mpindyewu ewu," wa bwena uvwa. . . Mbanganyi bàdi bavùlùke ne ùvwa nganyi? [Mwanèètù wa balùme kampànda ùdi wàmba ne: "Franklin

Roosevelt.”] Franklin D. Roosevelt. Mémè kwamba ne: “Mfumu wa ditunga utùdi nendè mpindyewu ewu neâfilè mpàla nansha too ne ku musangu mwinâyì,” ùvwa mu musangu wèndè wà kumpàla musangu awu, “neâfilè mpàla too ne ku musangu mwinâyì, ne netùkafikishiibwè ku Mvità Miibìdì ya Buloba bujimà.”

²⁰² Mémè kwamba ne: “Mfumu wa cimbàmbilà udi ujuuka mpindyewu mu Italie, Mussolini awu, neàngatè bukòkeshi. Ne yèyè neàye ku Éthiopie, ne Éthiopie neàponè ku makàsà èndè.” Kùdi bantu basòmbè mwab’ewu mpindyewu bàdi bamanyè ne, kùvwa musùmbà wà bantu bàakalwà e kwimana, pàmvwà genza disangisha dyànì mu Redman’s Hall kuntwaku dilòdòlò adi, pààkakèkèngelàbi bwa mémè kuyakù bwa kuyiisha cyòci aci, Redman’s Hall, bàmba kunkùpa pambèlu pàà cibambalu aci bwalu mvwa mwambe cintu bu nanku. [Mwanèètù wa bakàjì Wilson ùdi wàmba ne: “Amen. Ncyà bushuwa.”—Muf.] Eyowa. Eyowa. Màndamù Wilson, ndi mumanyè ne wèwè udi. . . Ncyà bushuwa. Pàngàakambà cyòci aci. . . Kadi wàkacyènza anyi? “Kadi,” mungàakambà, “neâfikè ku ndekeelu wa bundù,” ne yèyè’s wàkakùfika. Yèyè ne mukàjì uvwayè wènda nendè bundumbà, bàakabèèlesha tutungu ne kubàkùdika ku mwonji mu mùsèèsù, makàsà meela muulu, bilàmbà byabo bilembeleja. Eyo, aci’s cyàkenzeka.

²⁰³ Ne pashìishe mémè kwamba ne: “Bányishidì bakàjì bwa kwelabò tukàndà twa masungulangana. Cìdì kakùyì mpatà to bundù pa ditunga. Nenku, mu dyela dya tukàndà amu, dīngà ditùkù nebasingulè muntu udi kàyì ùkùmbana to.” S’mbenzè cyòci aci mu masungulangana àshàadi aa. Ekelekele, ekelekele! Inaayi. . . (Mémè kwamba ne: “Maalu a mamanya neàye kumpàla mu mushindu wà ne. . .”) To, mwab’ewu, aci nciisàtù. Mfwilaayikù luse.

²⁰⁴ Cyàkalondà ncyòci eci, mwaba awu, ciinâyì. Mémè kwamba ne: “Yetu mvità neyìikalè ne Allemagne, ne nebiibakè mwaba munene menemene wà dibwe dya nshàamendà ne nebàdyèlè mu bimanu muntwamu, ne beena Amerike nebàdye mutuutu wà wùkwàcisha ne bwòwà.” Nzambi wa Bukolè bwònsò mmumanye, Mwena kumpàla kùndi mwimane mpindyewu awu, mémè ngàkamòna ba-Nazis badishikàmine abu bàtwa beena Amerike misèbà nunku ewu, ne bikwabo, ku lwine lumbu alu. Ne kùdi nsongàalùme yàbùngì yidi miimane mpindyewu kaaba aka yìvwà ku lumbu lwà Siegfried Line aku, bàdi bamanyè civwàci. Ne vùlukàayi ne, civwa mbidimu dikumi ne cimwe kumpàla kwa lumbu lwà Siegfried Line alu kwibakiibwalù. Nzambi mmulelèlà anyi? Yèyè ùcìtu anu ùdyanjila kwamba bintu byènzeka anyi? Tàngilàayi. Aci, civwa nciinâyì.

²⁰⁵ Mpindyewu cintu ciitànù. “Maalu a mamanya neàye kumpàla mu mushindu wà ne nebènzè kàshinyì kàà kakàyi kàkèngela kwikalabò bàkàludika ne yèndà to. Ne tùshinyì

netùtungunukè anu ne kupèèshibwa mbùngakeenu wa diyì, too ne ku dikùmbana dya maalu ònsò, cikondo cya nshìikidilu. Mémè kumòna dîkù dya beena Amerike bènda bàpweka ne njila, mu njila mwalabàle, bèndela mu kàshinyì beelè nyimà kùvwà kùkèngelà yèndà kwikalayè aku, bìvwa bimwèka anu bu bàvwà bànyà dames anyì twarta.” Nenku twètù’s tukàadi bakàpetè. Kàkaadi ku télévìsion. *Maalu À Mamanya À Mwasàkànaayi*, to, *Byamù Bilamakaja’s wè*, bònsò’s bàdi naaci. Tukàadi bapetè kàshinyì aku. Nkakòntònònwena kule, kùdì—kùdì tulòndò twa mpolondo. Kabyàkukèngela bwa bóbò kwikalàmù ne yèndà to. Udi ulongolola anu kaamulonda keebe mushindu ewu, anu mùtù wenza bwa tèlefonè webè amu, nenku kàshinyì keebe aku kàya neebe too ne kuntwaku; kàkàyi mwa kupeta njùwù, anyì nì ncinyì, ne tùshinyì tukwabo to. Cyamu cya nzembu cìdi cìsàka tukwabo twònsò kule neebe. Nwamònu anyì? Bàkaadi naakù. Kaa, ekelekele! Elààyikù meeji pa bwalu abu. Cidyànjlila kwamba bidimu makumi asatu kumpalà kwa kwenzekaci!

²⁰⁶ Mpindyewu, aci’s cìdi cikatùfikisha dîbà adi ku disungula dya Kennedy bu Mfumu wa ditùnga.

Nenku kàshinyì kùikalà mwa kubwela mu—mu cyalu aka, kàkùmbaja bintu bitaanu (pa mwandamutekète) bikaadi byenzèke anu mu byòbi.

²⁰⁷ Mpindyewu, mémè kudyànjlila kwamba, ne mwambe ne: “Ndi mumòne muntu mukàjì munene ùjuuka, wa mmwènekelu mulenga, muvwàle bilàmbà byenzè bu bikùnzùbile bya bukalenge bubàndile.” Nenku ndi mwelè tubòkò tukese kwìnshì eku ne: “(Ùvwa mukòòkeshi munene mu Ètats-Unis; pàmwàpa ng’ekeleeziya wa Katolike.)” Muntu mukàjì, muntu mukàjì kampànda; ncyèna mumanyè ne neciikalè ekeleeziya wa Katolike to. Ncyèna mumanyè to. Ncyèna mwa kucyàmba to. Cintu cimwepele cìndì mumòne, ndi mumòne muntu mukàjì, ki kwàjiki.

²⁰⁸ Kadi edi nditùngà dya mwànà mukàjì. Ditùnga edi dìdi nombà dikumi ne isatu, mu cipròfetà. Didi ne mishoonyi dikumi ne yisatu, mìtootò dikumi ne yisatu. Dyàkabanga ne nkòlònyì dikumi ne yisatu. Dikumi ne yisatu, dikumi ne yisatu, byònsò bìdi dikumi ne yisatu. Dìdì òmwènekela mu nshapità wa 13 wa Bwàkabuulwibwà, bifwànàngàne. Didi dikumi ne yisatu. Ne dyòdì nditùngà dya mwànà mukàjì.

²⁰⁹ Tubàdì twa dishipa dya mabàkà mu Amerike tùdi tùfila dishipa dya mabàkà, kùdì bèètù bantu bakàjì, kutàmba matùnga makwabo ònsò. Nsòmbelu mulenga mu dyetu ditùnga mmushàadile, ne dishipa dya mabàkà, kutàmba mùdìbi mu France anyì mu Italie, mwine mùdì bundumbà bwènzekela mu misèèsù amu. Pa nanku, kadi bóbò abu mbandumbà; bèètù twètù mbakàjì basèla kadi bàteeta kwikala basòmbè ne balùmè bùngi

cyakaa, ne balùmè bààbùngì bàdi basèlàngàne bàteeta kwikala basòmbe ne bakàji bakwàbo.

²¹⁰ Mu matùngà mùdìbo ne disèlà dya bakàji bààbùngì, mbitàmbe bwìmpè misangu cinunu. Kadi, pààbi's, disèlà dya bakàji bààbùngì ndìbì, tudì bamanyè. Kadi, mbwa kuleeja anu mutùdi twètù bapwekè milongo.

²¹¹ Ndi ne kapese kàà cibèjibeji kuntu kwàka, mùdìbo baleejè ne pàvwà nsongààlùmè yetu twètù ya beena Amerike miyè dyàmwàmwà dya mbù, mu mvità ya ndekeelu eyi, bàmba ne kupita pa, ngeela meeji, cìvwa mbya pa lukàmà bu makumi mwandamutekèke. . . Mòna's, mpindyewu, anjì indilaayi kakese, ngeela meeji bàvwa mbasatu pa banaayi bàvwà bayè dyàmwàmwà dya mbù, bàvwà bakàji baabo bashipè naabò mabàkà kumpàlà kwa kwalukilabò. Ne mutù wàci wà bwalu munene wùdi wàmba ne: "Cìdi cyenzèkèle nsòmbelu mulenga wa beena Amerike beetu ncinyi?" Nudi bavùlùke ne nuvwa bawùmòne anyi? Nwènù bònsò nuvwa bawùmòne, ngeela meeji. "Cìdi cyenzèkèle nsòmbelu mulenga wa bakàji beetu beena Amerike ncinyi?" Mu byapù, bàdi bàkwàta mudimu kuntwaku ne balùmè bakwàbo. Nditùngà dya mwànà mukàji. Cyàpetàdi ncinyi? Nzambi muntu mukàji, anyi nzambi mukàji.

²¹² Mpindyewu, pashiishe, paanyimà pàà cyôci aci, mèmè kukùdimuka e kutàngila. Ki mèmè kumòna États-Unis ewu munkaci mwa kwoshika cyenzè mùdi mushiki wà bintu wòshika amu, mbwebwe yìvwa mitaayisha. Ne ùvwa wòshika cyenzè mùdi mushiki wà—wà mudilu munda mwa bitùpà bya nkùnyi, amu, anyi cintu kampànda cimulàkùshe mudilu. Ki mèmè kutàngila too ne kùvwà mèsù àshiikila aku, ditùngà dìvwa ditaayisha dishàale anu tusùnsukilà. Ki pashiishe cikèenà-kumòna aci kunguumukaci. Bitaanu pa bisatu abi bikaadi byenzèke. . . anyi, bitaanu pa mwandamutekète's wè, bikaadi byenzèke.

²¹³ Kadi's ki cyôci cìdi cìlwa cileeja eci. Ki pashiishe mèmè kudyànjila kwamba. Kacya ncitukù mwambe ne Mukalenge ngudi mucìngambile to, kadi, mèmè mwimane mu dinda adi mu ekeleeziya, mèmè kwamba ne: "Mushindu wùdi maalu ènda àya kumpàla. . ." Mèmè ntu mwalùkile too ne ku ndekeelu kwa lumbu lwàbò alu, ne mèmè kuya lubilu too ne ku ndekeelu mukwàbo wa lumbu alu. Mèmè kwamba ne: "Mushindu wùdi maalu ènda àya kumpala, nèndyanjilè kwamba ne cikondo. . . Ncyèna mumanye ne ndi ncyàmba bwa cinyi to. Kadi ndi ndyànjila kwamba ne nebyènzèkè byònsò pankaci pàà mpindyewu mene, cidimu cya 1933 eci, ne cya 1977."

Kadi ncìyi mucìmanyè to, Nzambi ngudi mumanye mwoyi wànyì, ncìvwakù mucìmanyè to too ne makèèlèlà awu ne, cidimu cya 1977 ncyà cibìlù cya disànta, kabidi kwenzèke anu menemene cikondo bùngì bwa mwomùmwe bwàkapèèshàYe

Izaleela abu, ne bikwabo byònsò ku ndekeelu. Pa nanku tudi ku. . .Kadi's ki twètù aba ku ndekeelu kwa cikondo, ku dilwa dya lumingu lwa makumi mwandamutekète. Katwèna bamanyè ne ndìbà kaayi dyàya Ekeleeziya to. Kaa, ekelekele! Citùdi mwa kwenza ki cinyi's, nwènù balundà bàanyi? Tukàadi penyì?

²¹⁴ Nudi bamòne citùdi mpindyewu anyi? [Disangisha didi dyàmba ne: "Amen."—Muf.] Nudi bumvwè mpindyewu lumingu lwà makumi mwandamutekète lwà Danyèle alu anyi? ["Amen."]

Mònaayi, mpindyewu, patwàtùngunukà bwa kubwela mu Bitampì ebi ne bikwabo, tukàngula Bitampì abi. Cya kumpàla cìdì cìpàtuka, mubàndi wa pa kabalù katòòke, ne mwikàle ne butà bwa mikete mu cyanza. Tàngilàayi ne mulùmyàna awu nganyi. Tàngilàayi mubàndi wa pa kabalù katòòkòlòke udi paanyimà pèndè awu. Nwamònu anyi? Tàngilàayi ne nganyi mwine awu, ne tàngilàayi mùdìbo bàlwa. Tàngilàayi mùdì binunu lukàmà ne makumi anaayi ne binaayi abi bilwa. Tàngilàayi pàdì virgo mukùtakàne awu ùlwa. Pashìishe tàngilàayi mùdì bintu byònsò ebi byènzeka: dipòngolola dya Mpànza, Makènga, nyuma ya bukooyà yisatu mifwànàngàne ne ndimbà ayi. Tàngilàayi bintu abi mùdìbi bikùmbanangana anu menemene mu makènga awu, anu menemene pàdìwu àpòngolodiibwa apu. Musangu wònsò wùdì Citampì cikàngudiibwa, dikènga didi dipòngolodiibwa, ne dibùtudiibwa dilwa. Kadi tàngilàayi cìdì cyènzekà mpindyewu mene kundekeelu aku.

²¹⁵ Nenku, kaa, tàngilàayi bapròfetà basatu aba. . .anyi bapròfetà babidi aba, pàdìbo bàjuuka kaaba aka. Kadi munkaci mwa lumingu, bàdì bùumushiibwa mushindu awu, ne pashìishe Mvità ya Harmaguédon yìdì yikùtuka. Pashìishe Nzambi ùdì ùbanga kwakula, Yèyè mwine, pashìishe ùdì ùjuuka ne ùbanga kulwangana mvità. Bapròfetà abu bàdì bàtuuta buloba. Bàdì bàyiisha Dìna dya Yesu Kilisto. Bàdì bàbàtiiza mushindu wumwewumwe awu. Bàdì bènza cintu cimwecimwe, cyàkenzà beena mpenta bàà kumpàla, ne baataatù aci, ne bààbùngì bàdì bàbàlonda. Kadi aba bàdì badyènzè nsangilu abu, bulongolodi abu, mbutùngùnùke anu ne kuya, ne nansha mene bukolè bwa bapròfetà abu kabwàkabùcibula to. Ki ndekeelu wa byònsò kwambò ne: "Netùcìvwijè cyònsò bulongolodi bumwepele." Nenku ùdì ùbweja (ncinyi aci?) cinyangu, cyena Loomò, bwa kutàmba kupaasalaja cintu cyònsò nkòong, cìdì cìvwija dibùtuka aci. "Cinyangu cìdì cìvwijà dibùtuka" aci, cìdì cìbweja byònsò, "bukooya."

²¹⁶ Vùlukàayi ne, maamù ndumbà wa kale uvwa musòmbe pa nyama wa lwonji, uvwa muvwàle bilàmbà bikùnze kùnzuù mushindu awu awu, nyama awu ùvwa ne mitù mwandamutekète ne nsèngù dikumi. Nudi bavùlùke aci anyi? "Ne yèyè ùvwa ne lupànza mu cyanza, lwà bukooyà bwa cinyangu cyèndè." Aci cìvwa ndilongesha dyèndè dyàkatangalajilaye bantu. Kadi's ki

bwalu mbwòbù abu, nwênù bânà beetu. Tukàadi ku cikondo cya nshìikidilu.

217 Nwênù bânà bakese, katwènakù bamanyè to, tudi bafwànyine kubènga kwikala ne mwoyi bya katùyikù mwa kwalukila kabidi dilòlò edi to. Tudi bafwànyine kubènga kwikala ne mwoyi bya katùyikù mwa kumòngana kabidi muntu ne mukwèndè to. Ncyèna mumanyè. Kadi, ndekeelu ùdi pabwìpì menemene, ndekeelu ùdi pabwìpì menemene. Mufùndù's ngwòwò ewu. Kakùyì mpatà to, ki cilejeji cya mu Mifùndù ncyòci aci, cipwàngàne.

218 Mpindyewu, kwòkù cintu kampànda cyùdi kùyì muumvwè to, mfùndilè kabèji ùcimmanyishè. Nwamònu anyi? Ambàku cintu kampànda. Bàmwè bàà kunùdi nwênù bânà beetu bàdi bàtèelejà mikàbà ya mèyì kuntwaku abu, mu bitùpà bikwabo, kwòkù cintu kampànda cìndiku mwa kwenza bwa kunùkwàcisha, nùmmanyishaayi. Wèwè udi mwa kubènga kutwà ku cyànyì, ne mèmè ndi mufwànyine kubènga kutwà ku cya bulongolodi bwenu; kí ngwèwè to, kadi ndongolwelu wa bulongolodi bwenu abu. Ncitu mubènge kutwà ku cya beena Katolike to. Ncyèna ngamba ne ncyèna munangè beena Katolike, ne ncyèna munangè bantu bàà mu bulongolodi to. Kí nranku to. Ntu munangè bantu bònsò, kadi ndi mbèngangana ne ndongolwelu udi kacya wàshààla anu munùbàmbidìkile panshì awu. Ki cidìku ncyòci ncyaci, ndongolwelu waci awu. Ki cyòci aci.

219 Mèmè ncìvwa mubèngàngàne ne Allemagne to; cìvwa n'Nazisme. Ncìvwa mubèngàngàne ne beena Italie to; bwalu bùvwa—bùvwa mbwà dibèngangana ne Fascisme. Nenku vùlukàayi ne, ngàkadyànjila kwamba dikwabo díyì mu ciine cikondo aci, anu díyì didyànjila kwamba cyanààna, ne bààbùngì bàà kunùdi nwênù beena kale abu mbacivùlùke. Ngàkamba ne: “Kùdi tusùmbù tunène tusatu tùdi tuteeta kwangata bukòokeshi pa buloba leelu ewu: Fascisme, Nazisme, ne Communisme.” Kadi ngàkamba cinyì? Twònsò atu tùvwa mwa kuya kuupuka mu Communisme.

220 Pashiishe mèmè kunwàmbila bònsò bwa kucyàmbulula ne: “Ikàlaayi ne mèsù matàngija pa Russie.” Nudi bavùlùke aci anyi? “Ikàlaayi ne mèsù matàngija pa Russie. Yèyè yònsò neàkuupùkè mu Communisme.”

Nenku pashiishe neàkuupùkè yèyè yònsò, ndekeelu wa byònsò, mu cyena Katolike. Vùlukàayi ne, byònsò nebìkuupùkè mu cyena Katolike. Ncyà bushuwa menemene. Aci nku Mvità ya Harmaguédon, kule *emu* nunku, pààlwà Kilisto, Yèyè mwine.

221 Kadi baprófetà basatu aba... Bidimu bisatu ne cyàbìbìdì cimwe ebi's wè, aci m'Bwàkabuulwibwà 11.3, nukàadi bamubalè misangu ne misangu: “Ndi mufile bukolè kùdi bantèmù Bàànyì babidi, ne bòbò nebàmbè biprófetà munda mwa matùkù cinunu

ne nkàmà yibidi ne makumi asambombo.” Mbûngì kaayi abu, matùkù cinunu ne nkàmà yibidi ne makumi asambombo? Bidimu bisatu ne cyàbìbìdì cimwe. “Ne pashìishe nebàshebeyiibwè mu mùsèèsù,” anu munkacì mene mwa lumingu lwà makumi mwandamutekète elu’s.

Pa nanku, nwamònu mwaba wùdì mbingu makumi mwandamutekète ya Danyèlè yìsanganyiiibwa anyi? Nudi bamòne mwaba wutùdì ne mwoyi anyi? Tukàadi ku ndekeelu, nwènù balundà bàanyi bananga. Tukàadi ku ndekeelu. Matùkù. . .

Matùngà àkaadi àpanduluka, Izaleela nyewu
ùtàbuluka,
Bimanyinu byàkadyànjilà bapròfetà kwamba;
(S’ki twètù aba.)
Matùkù a bàà Bisàmbà bya bendè mmabala,
(*Apa’s.*) mùle tètè ne bintu bìdì bikwàcisha
bwòwà;
“Alùkilaayi, Éyì nwènù bàdì batangàlàjìibwe,
kùdì beenu sungasunga.”

Tùwìmbàayi:

Ditùkù dya bupikudi dikaadi pabwîpì,
Myoyi ya bantu yìdì yàmba kwimana bwa
bwòwà;
Ujìibwàyi ne Nyuma, ikàlaayi ne myèndù yenu
milongolola ne misukula,
Bàndulukàayi! Bupikudi bwenu bùkaadi
pabwîpì.

Kaa, ekelekele! Abi kí mbilenga bilayà anyi?

Matùngà àkaadi àpanduluka, Izaleela nyewu
ùtàbuluka,
Bimanyinu byàkadyànjilà bapròfetà kwamba;
Matùkù a bàà Bisàmbà bya bendè mmabala,
mùle tètè ne bintu bìdì bikwàcisha bwòwà,
“Alùkilaayi, Éyì nwènù bàdì batangàlàjìibwe,
kùdì beenu sungasunga.”

Bònsò pàmwè mpindyewu:

Ditùkù dya bupikudi dikaadi pabwîpì,
Myoyi ya bantu yìdì yàmba kwimana bwa
bwòwà;
Ujìibwàyi ne Nyuma, ikàlaayi ne myèndù yenu
milongolola ne misukula,
Bàndulukàayi! Bupikudi bwenu bùkaadi
pabwîpì.

Lekàlaayi mèmè nnwìmbilè citùminyi cikese.

Bapròfeta bàà mashimi bàdi bàshima, bàdi
bàvila Bulelèlèlè bwa Nzambi,
Bwa ne Yesu Kilisto awu ki Nzambi wetù;

Bàdi bàMuvwija Mupersona mwisâtù kampànda. Aci nudi
bamanyè. Kadi, kî ncidì Ye nansha. Yèyè ùdi Nzambi wetù.

Kadi twètù netwèndelè myaba yàkadyatà
bapostolo.

Bwalu ditùkù dya bupikudi dikaadi pabwîpì,
Myoyi ya bantu yìdi yàmba kwimana bwa
bwôwà;
Ujìibwǎyi ne Nyuma, ikàlaayi ne myèndù yenu
milongolola ne misukula,
Bàndulukààyi! Bupikudi bwenu bùkaadi
pabwîpì.

²²² Kanwènaayikù ne disànka anyi? Alùkila ku Mukenji, wèwè
mwanèètù! Alùkila ku cya ku cibangidilu. Alùkila ku mpenta!
Alùkila ku dibènesha dya cya bushuwa! Alùkila ku Dìná dya
Yesu Kilisto! Alùkila ku dibàtiiza dya Nyuma Mwîmpè! Alùkila
ku bimanyinu ne maalu a kukèma! Alùkila ku mpenta! Shààla
kule ne bulongolodi! Alùkila ku Nyuma Mwîmpè! Yèyè ki
Mulongeshi wetù.

Bwalu ditùkù dya bupikudi dikaadi pabwîpì,
Myoyi ya bantu yìdi yàmba kwimana bwa
bwôwà;
Ujìibwǎyi ne Nyuma, ikalaayi ne myèndù yenu
milongolola ne misukula,
Bàndulukààyi! Bupikudi bwenu bùkaadi
pabwîpì.

²²³ Abi kî mbilenga bilayà anyi? Cyàkambà mupròfeta ncinyi?
“Nekùlwe cikondo kwikalàku, kùyi mwa kwamba ne mbufùku
anyi mmundaamuunyà.” Tàngilààyi mùdiku. Nwamònu anyi?
Kaa, kubi be, munda mwa bikondo byònsò bya ekeleeziya!

Kadi ne—nekwikalè Bukènkè ku ìbaamulòòlò,
Kajila kàà ku Butùmbi nenùkàpetè bushuwa;
Mu njila wa màyi mmùdì Bukènkè leelu,
Bajiika mu Dìná dya mushinga dya Yesu.
Batekète ne bakolè, nyingàlalaayi ku
mpekaatu yenu yònsò,
Nyuma Mwîmpè neàbwelè cya bushuwa;
Makènkè a dilòòlò aa àfikì,
Mbulelela ne Nzambi ne Kilisto badi Umwe.

Nekwikalè Bukènkè . . .

Bònsò pàmwè!

... ku ibaamulòlò,
 Kajila kàà ku Butumbi nenùkàpetè bushuwa;
 Mu njila wa mâyi mmùdi Bukênkè leelu,
 Bajiika mu Dîna dya mushinga dya Yesu.
 Batekète ne bakole, nyingalalaayi ku
 mpekaatu wenu,
 Nyuma Mwîmpè neàbwelè cya bushuwa.
 Bwalu Makênkè a dilòlò àfikì,
 Mbulelela ne Nzambi ne Kilisto badi Umwe.
 (Kî mbasatu to; kadi Umwe!)

224 Alùkilaayi ku Mukenji! Alùkilaayi ku cibangidilu!
 Alùkilaayi ku cyàkalongeshà Pòlò! Alùkilaayi ku dibàtiiza
 dyàkabàtiizàye yèyè naadi adi! Yèyè wàkamòna bantu
 babàtiijiibwe mushindu mukwabo; kubàmbilayè bwa kulwa
 kubàtiijiibwabò cyàkàbìdi. Wàkamba ne: “Mwanjelo mulwe
 ùfuma mu Dyulu, mulongèshe cingà cintu nansha cinganyi,
 Yèyè èdiibwè mulawu.” Pa nanku, ndyalukila dya cyàkàbìdi ku
 Mukenji’s, mulundà wanyi! Dìbà dikaadi ku ibaamulòlò.

225 Kaa, mèmè ndi muMunangè bikolè be, kadi
 nwènù? Mbanganyi bàdi bà mòna lumingu lwà makumi
 mwandamutekète lwa Danyèlè mpindyewu, ne bà mòna cidi
 lumingu lwà makumi mwandamutekète? Mbanganyi bàdi
 bàciitabuuja? Ambàayi ne: “Amen.” [Disangisha didi dyàmba
 ne: “Amen.”—Muf.] Amen! Butumbi bwikalè kùdi Nzambi!

226 Mpindyewu, cintu cidi cìlondà ncinyi? Bitampi
 Mwandamutekète mpindyewu. Netùbwelèmu buludì, piikalà
 Mukalenge mwa kwanyisha. Ndìbà kaayi dikalàci, ncyèna
 mumanye to. Anu dìbà kanà dyònsò dyàcìfilàYe adi, dìbà adi
 netùbwelèmu buludì. Dìbà adi netwènzè disangisha dile, dile
 menemene, bwalu nebyàngatè kuumukila ku nshapità mw16 too
 ne ku wa 19, bwa kucijikija, bu mûndi nya naabi bitùùlùbitùùlù
 emu.

227 Mpindyewu, ncyèna muswe bwa muntu ùmukè mwikàle
 ùmwva cyòci eci bibi to. Mukàbà wà mèyi wùcidè anu
 wùnyunguluka. Ncyèna muswè bwa muntu kuumvwayè bibi
 to. Mpindyewu kanùmvukù bibi to, nwamba ne: “Mwanèètù
 Branham wàmbi ne Yesu neàlwe mu cidimu cya 1977.” Mèmè
 ncyènakù mwambe cintu bu nanku nansha. Bìdi mwa kwenzeka
 ne Yesu àlwe leelu ewu. Kadi mèmè ndi mudyànjlile kwamba
 ne pankaci pàà cidimu cya ’33 ne cya ’77 cintu kampànda
 ncifwànyine kwenzeka, ne bintu bìndi mumòne byènzeka, mu
 cikèènà-kumòna ebi, mbifwànyine kwenzeka. Ne bitaanu bya ku
 byòbì bikaadi byenzèke. Ne ndi ngeela meeji ne, ne bintu bya
 mushindà bitùdi naabi mpindyewu ebi. . .

228 Kadi nudi bamòne cidi Mfumu wetù wa ditùnga ùfuma
 ku dyamba aci anyi? Ùkèba mikwabo mvità. Mmuswe kufidila
 cileejilu pa—pa Berlin, mwàmbye. Ùvwa muswe kufila cileejilu.

Kadi bìshi bwa Cuba udi mumfundu mwetu ewu? Bwa cinyi kubènga kufidila cileejilu pa yêyè awu? Bishi bwa awu awu? Kaa, s'mmacimbu anu ètù a cya bushuwa aa! Nwamònu anyi?

229 Kaa, mwanèètù, twètù's tukàadi anu ku ndekeelu. Bôbò's nebiikalè mwa... Nebilwe kujika anu mùdi Nzambi mwambe ne mmùvwàbi amu, pa nanku bìdi ne dikwàcisha kaayi—kaayi bwa kwenza nî ncinyi cyònsò pamutù pàà kubala anu cyanàànà bìdiYe Yèyè mwambe, ne kwikala badìlongòlòle, ne kudìlongolola ku cyòci aci. Ne kuyilekela yilwa, dîbà adi. Tudi bayìndile.

Tudi bindile dilwa dya Ditùkù dya disànkà dya
 Bukalenge bwa bidimu cinunu adi,
 Dyàlwà Mukalenge wetù mubènesha bwa
 kwangata Mukaj'Èndè-musela udi mwindile;
 Kaa, buloba bùdi bùtwa mikèmù, bwèla mbilà
 bwa ditùkù adi dya disùngidiibwa dya mu
 kalolo,
 Dyàlwà cyàkàbìdi Musùngidi wetù pa buloba.
 Kaa! Mukalenge wetù neàlwe cyàkàbìdi pa
 buloba,
 Eyowa, Mukalenge wetù neàlwe cyàkàbìdi pa
 buloba,
 Kaa, Sàtaanà neàswikiibwè bwa bidimu
 cinunu,
 Katwàkwikala ne muteecyanganyi dîbà adi
 nansha,
 Paanyimà pàà Yesu mumane kulwa cyàkàbìdi
 pa buloba.

Mbanganyi bàdi badìlongòlòle? Ela cianza muulu. Kaa, ekelekele!

Kaa! Mukalenge wetù neàlwe cyàkàbìdi pa
 buloba,

Tùjuukilàayi anu kuulu cyanàànà tùlabulanganèku ku
 cianza muntu ne mukwèndè.

Mukalenge wetù neàlwe cyàkàbìdi pa buloba,
 Kaa, Sàtaanà neàswikiibwè bwa bidimu
 cinunu,
 Katwàkwikala ne muteecyanganyi dîbà adi
 nansha,
 Paanyima pàà Yesu mumane kulwa cyàkàbìdi
 pa buloba.

Kaa! Mukalenge wetù neàlwe cyàkàbìdi pa
 buloba.
 Eyowa, Mukalenge wetù neàlwe cyàkàbìdi pa
 buloba,

Kaa, Sàtaanà neàswikiibwè bwa bidimu
cinunu,
Katwàkwikala kabidi ne muteecyanganyi dîbà
adi nansha,
Paanyimà pàà Yesu mumane kulwa cyàkàbìdì
pa buloba.

Dilwa dya cyàkàbìdì dya Yesu nedùikalè
dyandamuna ku tunyinganyinga ne myadi
ya buloba,
Bwalu dimanya dya Mukalenge nedyùlè pa
buloba, pa mbù ne mu dyulu;
Nzambi neùmushè mabèèdì ônsò ne binsònjì
bya ku màsaamà nebìkamè.
Paanyimà pàà Yesu mumane kulwa cyàkàbìdì
pa buloba.

Kaa! Mukalenge wetù neàlwe cyàkàbìdì pa
buloba,
Eyowa, Mukalenge wetù neàlwe cyàkàbìdì pa
buloba,
Kaa, Sàtaanà neàswikiibwè bwa bidimu
cinunu,
Katwàkwikala ne muteecyanganyi dîbà adi
nansha,
Paanyimà pàà Yesu mumane kulwa cyàkàbìdì
pa buloba.

²³⁰ Kaa, ekelekele! Kanwènaayikù nudyùmvwa bilenga anyì?
Anjì elààyìbì meeji, nwènù balundà bàanyi, eci's mmpenta,
dikuukwila! Eci mmpenta. Tùtuutàayi bikàshi ne tùwìmbàayi.
Beena Mpenta, bantu bônsò, dilekèlèlaayaaku mpindyewu,
umùshaayi bintu bya kale bya kwisùkwisù bya ci-Méthodiste abi
mpindyewu. Tùyaayi, tùwìmbààyaaku!

Kaa! Mukalenge wetù neàlwe cyàkàbìdì pa
buloba,
Eyowa, Mukalenge wetù neàlwe cyàkàbìdì pa
buloba,
Sàtaanà neàswikiibwè bwa bidimu cinunu,
Katwàkwikala ne muteecyanganyi dîbà adi
nansha,
Paanyimà pàà Yesu mumane kulwa cyàkàbìdì
pa buloba.

Kaa! Mukalenge wetù neàlwe cyàkàbìdì pa
buloba, (Ki mùdì Bible wàmba!)
Eyowa, Mukalenge wetù neàlwe cyàkàbìdì pa
buloba,
Sàtaanà neàswikiibwè bwa bidimu cinunu,

Katwàkwikala ne muteecyanganyi dībà adi
 nansha,
 Paanyimà pàà Yesu mumane kulwa cyàkàbìdì
 pa buloba.

Nudi baMunangè anyì? Eyo. Mèmè ndi muMunangè. *Ndi MuMunangè*, Mwanèètù wa bakàjì Gibbs. Kaa, twèlààyi anu byanza byetu muulu cyanàànà kùdìYè.

Ndi muMunangè, ndi muMunangè
 Bwalu Yèyè wàkannanga kumpàla
 Ne wàkampetela lupandu (Penyì? Pànwapa
 mene ku Kalvariyo.)
 Pa mucì wà Kalvariyo.

Ndi muMunangè, (Butùmbi's wè!) ndi
 muMunangè
 Bwalu Yèyè wàkannanga kumpàla
 Ne wàkampetela lupandu
 Pa mucì wà Kalvariyo.



LUMINGU LWÀ MAKÙMÌ MWANDAMUTEKÈTÈ LWÀ DANYÈLÈ LUA61-0806
(The Seventieth Week Of Daniel)

DILONDANGANA DYÀ MALONGESHA PA MBINGU MAKÙMÌ MWANDAMUTEKÈTÈ YÀ DANYÈLÈ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dinda, mu matùkù à6 a ngondo wa mwandamukùlù, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org